

(國學文庫第二十八編)

站

赤

上冊

北平隆福寺街 文殿閣書莊印行

(國學文庫第二十八編)

站

赤

上冊

北平隆福寺街 文殿閣書莊印行

站赤上冊目錄

| | |
|-----|-----|
| 站赤一 | 一 |
| 站赤二 | 三三 |
| 站赤三 | 五〇 |
| 站赤四 | 七七 |
| 站赤五 | 一〇八 |
| 站赤六 | 一三七 |

站赤一（永樂大典卷一萬九千四百十六）

丹墀獨對站赤。孟子曰。速於置郵而傳命。註曰。郵。駢也。卽今之驛馬也。如漢五里一置也。左傳。楚子乘駢會師。如漢以枸醬天馬而征羌夷。唐以荔枝而通嶺海之貢。傳車之交。且若星火是也。元設立水站馬站。其馬疋船隻皆依品從。非理乘驛者有禁。應合給驛者有程。正官宿頓分例。米一升。麪一斤。羊肉一斤。酒一升。柴一束。油鹽雜支鈔三分。從人每米一升。經過皆減半。選保站官長官提調法至良也。照刷祇應體覆消乏意至美也。天曆詔站戶消乏。仰廉訪司依例體覆明白。隨卽補簽。諸衙門營私馳驛就便糾治。佛家奴策世祖龍興爲驛傳不可不講。遂有站赤之置。其設法也有馬站。有水站。有車站。有江船站。水站。馬站。則通客旅。車站。江站。則通貨則簽馬一匹。則爲田三千畝。水站江站半之。北方諸站。則驗孳畜之多者應之。南方諸站。則驗田畝簽之。每十五里爲一郵亭。每六十里爲一候館。上有通政以掣其綱。下有郡縣以贊其力。而又有脫脫禾孫以驗使命之真僞。北方諸站。則置驛令。南方諸站。則設提領。凡百戶。人夫。庫子。庖丁。廝養。俱有定額。寢處則備於帳幄。器什則急於七挾。際畱谷粟滋生。鷄鶩以爲使官之供。上都大都。大駕經行。每遇巡幸。則先給官資。未嘗不爲站戶惜也。元史兵志。站赤。元制。站赤者。驛。

傳之譯名也。蓋以通達邊情。布宣號令。古人所謂置郵而傳命。未有重於此者焉。凡站陸。則以馬以牛。或以驢。或以車。而水則以舟。其給驛傳璽書。謂之鋪馬。聖旨遇軍務之急。則又以金字圓符爲信。銀字者次之。內則掌之天府。外則國人之爲長官者主之。其官有驛令。有提領。又置脫脫禾孫於關會之地。以司辨詰。皆總之於通政院。及中書兵部。而站戶闕乏逃亡。則又以時僉補。且如賑卹焉。於是四方往來之使止。則有館舍。頓則有供帳。饑渴則有飲食。而梯航畢達。海宇會同。元之天下。視前代所以爲極盛也。今故著其驛政之大者。然後紀各省水陸凡若干站。而遼東狗站亦因以附見云。太宗元年十一月。勅諸牛鋪馬站。每一百戶。置漢車一十具。各站俱置米倉。站戶每年一牌。內納米一石。令百戶一人掌之。北使臣每日支肉一斤。麪一斤。米一升。酒一瓶。四年五月。諭隨路官員。并站赤人等。使臣無牌面文字。始給馬之驛官。及元官皆罪之。有文字牌面而不給驛馬者。亦論罪。若係軍情急速。及送納顏色絲線。酒食米粟。段匹鷹隼。但係御用諸物。雖無牌面文字。亦驗數應付車牛。世祖中統四年三月中。書省定議。乘坐驛馬。長行馬。使臣從人。及下文字曳刺解子人等。分例乘驛。使臣換馬處。正使臣支粥食解渴酒。從人支粥宿頓處。正使臣白米一升。麪一斤。酒一升。油鹽雜支鈔一十文。冬月一行。日支炭五斤。十月一日爲始。正月三十日終住。支從人白米一升。麪一斤。長行馬使臣齋聖旨。令旨。及省部文字幹當官事者。其一二居長。

人員支宿頓分例。次人與粥飯。仍支給馬一匹。草一十二斤。料五升。十月爲始。至三月三十日終止。白米一升。麪一斤。油鹽雜用鈔。一十文。投呈公文。曳刺解子。依部擬宿頓處批支。五月雲州設站戶。取迤南州城站戶籍內選堪中上戶應當馬站戶。馬一匹。牛站戶。牛二隻。於各戶選堪當站役之人。不問親軀。每戶取二丁及家屬。於立站去處安置。五年八月詔。站戶貧富不等。每戶限四頃。除免稅石以供鋪馬祇應。已上地畝全納地稅。至元六年二月詔。各道憲司如總管府例。每道給鋪馬劄子三道。七年正月省部官定議。各路總府在城驛設官二員。於見役人員內選用。州縣驛設頭目二名。如見役人。即是相應站戶。就令依上任事。不係站戶。則就本站馬戶內別行選用。除脫脫禾孫。依舊存設。隨路見設總站官罷之。十一月立諸站都統領使司。往來使臣。令脫脫禾孫盤問。八年正月中書省議。鋪馬劄子初用蒙古字。各處站亦未能盡識。宜繪畫馬匹數目。復以省印覆之。庶無疑惑。因命令後各處取給鋪馬。標附文籍。其馬匹數付驛吏房書寫畢。就左右司用墨印印給馬數目。省印印訖。別行附籍發行。墨印左右司封掌。九年八月諸站都統領使司言。朝省諸司局院及外路諸官府應差馳驛使臣所齎劄子。從脫脫禾孫辨詰。無脫脫禾孫之處。令總管府驗之。十一年十月命隨處站赤直隸各路總管府。其站戶家屬。令元籍州縣管領。十三年正月改諸站都統領使司爲通政院。命降鑄印信。十七年二月詔。江淮諸路增置

水站除海青使臣及事干軍務者方許馳驛餘者自濟州水站爲始並令乘船往來十八年閏八月詔除上都榆林迤北站赤外隨路官錢不須支給驗其閑劇量增站戶協力自備首思當站十九年四月詔給各處行省鋪馬聖旨揚州行省鄂州行省泉州行省隆興行省占城行省安西行省四川行省西夏行省甘州行省每省五道南方驗田糧及七十石者准當站馬一匹九月通政院臣言隨路站赤三五戶共當正馬一匹十三戶供車一輛自備一切什物公用近年以來多爲諸王公主及正宮太子位下頭目識認招收或冒入役下戶計者遂致站赤損弊乞換補站戶從之十月增給各省鋪馬聖旨西川京兆泉州十道甘州中興各五道二十年二月和林宣慰司給鋪馬聖旨二道江淮行省增給十道都省遣使繁多亦增二十道給之七月免站戶和願和買一切雜泛差役仍令自備首思十一月增給甘州行省鋪馬聖旨十道總之爲二十道十二月增各省及轉運司宣慰司鋪馬聖旨三十五道江淮行省十道四川行省十道安西轉運司分司二道荆湖行省所轄湖南宣慰司三道福建行省十道行省十道荆湖北道宣慰司二道所轄路分一十六處每處二道山東運司二道河閒運司七道宣德府三道江西行省五道福建行省所轄路分七處每處二道司農司五道四川行省所轄順元路宣慰司三道恩州播州兩處宣撫司各三道都省二十道四月定增使臣分例。

正使宿頓。支米一升。麪一斤。羊肉一斤。酒一升。柴一束。油鹽雜支增鈔二分。通作三分。經過減半。從者每名支米一升。經過減半。九月給阿里海牙所治之省。鋪馬聖旨十道。所轄宣慰司二處。各三道。二十二年四月給陝西行省。并各處宣慰司。行工部等處鋪馬劄子一百二十六道。二十三年四月福建東京兩行省各給圓牌二面。奧魯赤出使交趾。先給圓牌二面。今再增二面。於脫歡太子位下給發。南京行省起馬三十四。給圓牌二面。剏立三處宣慰司。給劄子起馬三十四。二十四年四月增給尚書省。鋪馬聖旨一百五十道。并先給降一百五十道。共三百道。五月揚州言徐州至揚州水馬站兩各分置。夏月水潦使臣勞苦。請徙馬站附併水站。一處安置。馳驛者白日馬行。夜則經由水路。況站戶皆是水濱居止者。庶幾官民兩便。從之。七月給中興路陝西行省廣東宣慰司沙不丁等官鋪馬聖旨一十三道。二十五年正月腹裏路分三十八處。年銷祇應錢不敷。增給鈔三千九百八十一錠。併元額七千一百六十九錠。總中統鈔一萬一千一百五十錠。分上下半年給降。二月命南方站戶以糧七十石出馬一匹爲則。或十石之下。八九戶共之。或二三十石之上。兩三戶共之。惟求稅糧僅足。當站之數不至多餘。卻免其一切雜泛差役。若有納糧百石之下。七十石之上。自請獨當站馬一匹者。聽之。世祖紀至元二十五年二月己卯。以江南站戶貧富不均。命有司料餉合戶。稅至七十石當馬一匹。並免雜徭獨戶稅無七十石。願入站者。

聽。合戶稅不得過十戶。獨戶稅無上百石。五月。增給遼陽行省鋪馬劄子五道。十一月。福建行省元給鋪馬聖旨二十四道。增給劄子六道。二十六年正月。給光祿寺鋪馬劄子四道。二月。從沿海鎮守官蔡澤言。以舊有水軍二千人於海道置立水站。世祖紀至元二十六年二月丙寅尚書省臣言行泉州府所統海船萬五千艘以新附人駕之緩急殊不可用宜招集乃頤及勝納合兒流散戶爲軍自泉州至杭州立海站十五站置船五艘水軍二百專運蕃夷貢物及商販奇貨且防禦海道爲便從之三月給海道運糧萬戶府鋪馬聖旨五道。四月。四川紹慶路給鋪馬劄子二道。成都府六道。龍興行省增給鋪馬聖旨五道。太原府宣慰司及儲峙提舉司給降二道。八月。給遼東宣慰司鋪馬聖旨五道。大理金齒宣慰司四道。九月。增給西京宣慰司鋪馬劄子五道。江淮行省所轄浙東道宣慰司三道。紹興路總管府給降二道。甘肅行省所轄亦集乃總管府沙州肅州三路給六道。十一月。增給甘肅行省鋪馬聖旨七道。二十七年正月。增給陝西行省鋪馬聖旨五道。二月。都省增給鋪馬聖旨一百五十道。江淮行省一十五道。六月。給營田提舉司鋪馬聖旨二道。九月。江淮行省所轄徽州路水道不通。給鋪馬聖旨二道。二十八年六月。隨處設站官二員。大都至上都。置司吏三名。餘設二名。祇應頭目攢典各一名。站戶及百者。設百戶一名。七月。詔各路府州縣達魯花赤長官。依軍戶例兼管站赤。奧魯非奉通政院明文。不得擅科差役。十二月。增給

省除之任官鋪馬聖旨三百五十道。二十九年三月。命通政院分官四員。於江南四省整理站赤。給印與之。三十年正月。南丹州洞蠻來朝。立安撫司於其地。給鋪馬聖旨二道。三月。兩淮都轉運鹽使司。增給鋪馬聖旨。起馬五匹。五月。給淘金運司鋪馬聖旨。起馬五匹。大司農司。起馬二十四匹。六月。江浙行省言。各路遞運站船。若止以六戶供船一艘。除苗不過十四五石。力寡不能當役。請令各路除苗不過元額二十四石。自六戶之上。或至十戶。通融僉撥。從之。八月。給劉二拔都兒圓牌三面。鋪馬聖旨一十五道。十月。增給濟南府鹽運司鋪馬聖旨一道。三十一年六月。給福建運司鋪馬聖旨。起馬五匹。成宗大德八年正月。御史臺臣言。各處站赤合用祇應官錢。多不依時撥降。又或數少不給。遂令站戶輪當庫子。陪備應辦。莫若驗使臣起數。實支官錢。所在官司依時撥降。令各站提領收掌祇待。毋得科配小民。似爲便益。詔都省定議行之。十年。從江浙省言。命站官仍領祇待。選站戶之有餘糧者以充庫子。止設一名。上下半年更代。就准本戶里正主首身役。武宗至大三年五月。給嘉興。松江。瑞州三路及汴梁等處管民總管府鋪馬聖旨各三道。四年三月。詔拘收各衙門鋪馬聖旨。命中書省定議以聞。省臣言。始者站赤隸兵部。後屬通政院。今通政院怠於整治。站赤消乏。合依舊命兵部領之。制可。四月中書省臣又言。昨奉旨以站赤屬兵部。今右丞相鐵木迭兒等議。漢地之驛。命兵部領之。其鐵烈干納鄰末鄰等處蒙古站赤。仍

付通政院。帝曰。何必如此。但今罷通政院。悉隸兵部可也。閏七月。復立通政院領蒙古站赤。八月。詔大都至。上都。每站除設驛令丞。外設提領三員。司三吏名。腹裏路分衝要。水陸站赤。設提領二員。司吏二名。其餘閑慢驛分。止設提領一員。司吏一名。如無驛令。量擬提領二員。每一百戶。設百戶一名。從拘該路府州縣提調正官。於站戶內選用。三歲爲滿。凡濫設官吏頭目人等。盡罷之。十一月。給中政院鋪馬聖旨二十道。仁宗皇慶二年四月。增給陝西行臺鋪馬聖旨八道。六月中書省臣言。典瑞監掌金字圓牌及鋪馬聖旨三百餘道。至大四年。凡聖旨皆納之于翰林院。以金字圓牌不敷。增置五十面。蓋圓牌遣使初爲軍情大事而設。不宜濫給。自今求給牌面。不經中書省樞密院者。宜勿與。從之。延祐元年十月。沙瓜州立屯儲總管萬戶府。給鋪馬聖旨六道。五年十月中書兵部言。各站設置提領。止受部劄。行九品印職。專車馬之役。所領站赤多者三千。少者五百戶。比之軍民體非輕細。柰何俸祿不給。三年一更。貪邪得。以自縱。今擬各處館驛除令丞外。見役提領不許交換。從之。七年四月。詔蒙古漢人站赤。依世祖舊制。悉歸之通政院。十一月。從通政院官請。詔腹裏江南漢地站赤。依舊制。命各路達魯花赤總管提調。州縣官勿得預。泰定元年三月。遣官賑給帖里干木憐納憐等一百一十九站。鈔二十一萬三千三百錠。糧七萬六千二百四十四石八斗。北方站赤每加津濟。至此爲最盛。四川行中書省所轄。陸站四十八處。

馬九百八十六匹。牛一百五十頭。水站八十四處。船六百五十四隻。牛七十六頭。雲南諸路行中書省所轄。站赤七十八處。馬站七十四處。馬二千三百四十五匹。牛三十隻。水站四處。船二十四隻。
甘肅行中書省所轄三路。脫脫禾孫馬站六處。馬四百九十一匹。牛一百四十九頭。驢一百七十一頭。羊六百五十口。經世大典站赤者。國朝驛傳之名也。凡站。舊書作驛。陸則以馬以牛。或以驢。或以引車。水則以舟。其應給驛者。皆以璽書。而軍務大事之急者。又以金字圓符爲信。銀字者次之。其符信皆天府掌之。其出給在外者。皆國人之爲官長者主之。他官不得與也。馬數多寡。視官品高下。公事大小。止則有館舍。頓則有供帳。饑渴則有飲食。事畢則以符信歸諸所受之府。不敢三日稽也。祖宗之法。至如今守之。其官爲驛令。小者皆設提領。又置脫脫禾孫於都會關要之地。以詰其姦僞。總之以通政院中書兵部。站戶有闕乏逃亡者。則以時而僉完周卹之。我國家疆理之大。東漸西被。暨于湖南。凡在屬國。皆置驛傳。星羅棋布。脈絡通達。朝令夕至。聲聞畢達。此又總綱挈維之大機也。遼東大站亦附見云。太宗皇帝元年己丑。十一月十五日聖旨戒飭諸牛鋪馬站。大意若曰。若有起驛馬者。驗之如無牌面文字。其始初給馬之驛官。徒二年杖七十元。差官斷按答奏罪。有文字牌面而不給馬者。驛官亦坐罪。除顏色絲線酒米官中段匹係官物外。不得與驛馬事件。每一百戶站置漢車一十具。各站俱起米倉。站戶每年一牌內納米一

石。專令百戶一人用車牛送與商賈作客之人勿騎驛馬違者斷按答奚罪。如有送絲線顏色物料并外國使臣將禮物段匹及有急速勾當來者應付鋪馬如各驛馬牛闕少本百戶規措是月制曰上天眷命錫皇帝之徽名大蒙古國眾寡小大罔不朝會訓之曰一乃心力其無二凡我國內黎元其聽朕命循先訓舊章續用弗成者其罪當死爾等允漢眾官暨降民凡若干先來服役忠貞者有之詔妄者有之以宿舊之故委用信任一切不須詰問爾等自以不經詰問乃謂詔妄者當如是爾勿存是心轉加恣橫如此明諭其或不悛爾等罪愆何遠之有皇帝訓諭下項一使臣不經由鋪路往來者斷按答奚罪戾無牌子有文字往來者亦斷按答奚罪將帶隨投下牌子文字往來人等強要鋪馬取要口食者仰收捉枷禁擗逐根腳來歷明白端的緣由至時免放似此使臣人等不爲收捉卻稱彼中騷擾如此奏告來者官員亦斷按答奚罪委係朝廷差去使命有牌子文字者若不聽從之人亦斷按答奚罪戾仍處死一使臣人等每人日支肉一斤麪一斤米一升酒一瓶仰如數支破州城官員人等爲係使臣如自願饋獻些小禮物者聽不得附餘多索仍不得强行乞取如違者斷按答奚罪戾據上項物件不得於係官課程稅石科差內支破其差去使臣若依理勾當迴日朝廷約量給賞四年壬辰五月二十五日聖旨諭隨路官員并站赤人等如使臣無牌面文字爲始給馬之驛官徒二年杖七十元差官斷按答奚罪有文字牌

面而不給馬。亦徒二年杖七十。若軍情急速事件。及進納顏色絲線酒食米粟段匹鴈隼。但係御用諸物。雖無牌面文字。亦仰驗數應付鋪馬車牛。如不應付。亦依上斷罪。六月十六日聖旨。節該西京下水弘州三處。置立馬站。仰各站不得令來往馳驛使客。因而將隨站馬匹打過。如有過越者。仰各站當管官司。陪償馬匹。據三站合用馬匹。仰照依本路見在戶計。一例科著無得分毫違錯。五年癸巳二月五日聖旨。據太原路達魯花赤塔塔不花等奏。太原府內見有達魯花赤。并久住使客諸投下人等。取酒肉米麪數多。每年該羊一千四百餘頭。塔塔不花等情願自備糧食。不關祇應等物。如此百姓似爲容易。準奏。宣諭太原路舊嘗有旨。令課稅所官二員支糧。餘官不會令支。今後往來使臣。依先例應付。餘者盡行罷支。其管民管匠達魯花赤。若有己身糧食者放支。如無每人日支米一升。如有依前亂行取酒肉米麪之人。并斷按答奚罪。仰塔塔不花等抄錄御寶文字。差人齎擊就便行移十路。依上一體施行。七年乙未三月二十四日聖旨。諭管站乞里台。并隨處站赤。若曰據邊關急速公事使臣。爾輩何故有健馬不與。令其乘車。今後不得如此。若依前給車。遲悞公事。定是斷罪。可令諸站驛人知悉。六月十七日聖旨。據燕京咸得不奏告。每年進呈御酒。沿路官司爲無御寶文字。不肯疾早應付鋪牛。以致遲滯到闕事。今降御寶文字前去。仰元來送酒人石抹神撒堆刺兒等收此。仍仰經過去處。卽便應付與鋪頭口者。不得遲滯。

若因別事起要頭口。並斷按答奚罪戾。九月六日聖旨。據濟南府張榮奏告。經過使臣。不肯令驗降去御寶文字。卽取鋪馬準奏。如聖旨到日。除軍期急速事物。并進呈諸物人等。依驗物件應付外。不以是何使臣。若不令看過元降文字。卽取鋪馬者。開具姓名。聞奏治罪。若看徇不驗。輒給驛馬者。亦罪之。二十日奉旨。闢出太子軍前使來。沿路驛站斷絕。令忒末兒赤刺溫等。往諭西京應州崞縣。忻州太原。及太原。至潞州酌中地。又潞州椀子城。懷州各立一站。馬各二十四。黃河岸。令劉甫立一站。馬三十四。西京應州。令塙端躬往建立。太原州城八哥。潞州椀子城秀才。懷州合思迷里。各躬往建立。黃河渡口劉甫專一勾當。上項站馬。別用火印烙記。止令闢出太子軍前使臣騎坐。其餘並不得應付。如有別使欲騎。給者受者。並斷按答奚死罪。每站須管立。有心力能幹官一員。提領勾當。如法養飼。不得死損。如死逐旋補數。若上項委官差故。仰各人名下見在官員。準上勾當。若有違慢。並斷按答奚罪。軍前來使。若遇不選是何作商賈回回人等。可奪馬馳驛不與者。亦斷按答奚罪。九年丁酉八月二十三日奉聖旨。若曰。聞各路往來使臣。在城別無公事。不經站路走遞。稱有牌劄。索取祇應。有公事使臣到城。走馬二匹。或三匹。卻領不干礙十人。二十人。及牽私己馬匹。取祇應草料。應付諸牛馬糊糲等肉。不肯食用。須要羊肉。縱與羊肉。卻又稱瘦。回回使臣到城。多稱不食死肉。須要活羊。又不肯於館驛內安下。止欲於達魯花赤管民官家內。

止宿。如此刁蹬。公事了畢。推稱事故。不肯起發。除正使臣應付與鋪馬外。其餘親隨鋪驢車牛遞送。須要鋪馬。若到前路站赤。又不交替遞送。及有長行車具。到城又要倒換新車。及取繩索。如此騷擾。聖旨到日。今後如有朝廷差去使臣。齎把御寶文字之人。依分例日支米一升。麪一斤。肉一斤。酒一瓶。其餘親隨并隨授下諸衙門差去人。催糧絲線顏色官吏人員。支米一升。如無牌劄。不得應付。公事了畢。若得鋪馬不得稱瘦倒換。若到前路站赤。即便交替。及不得倒換長行車具。取要繩索。無事不得入城。若有多索酒食活羊馬匹草料之人。仰達魯花赤管民官。差人一同前去斷事官折證治罪施行。仰宣德州達魯花赤管民官收附。遍行諸路。一體施行。十年戊戌六月二日聖旨諭札魯花赤大官人胡都虎塔魯虎解訛魯不等節該目今諸路。應有係官諸物。及諸授下宣賜絲線匹段。並由燕京宣德西京經過。其三路鋪頭口。難以迭辨。今驗緊慢。定立鋪頭口數目。驗天下戶數。通行科定。協濟三路。通該舊戶二百一十七戶。四分著馬一匹。新戶四百三十四戶。八分著馬一匹。舊戶一百六十九戶。二分著牛一頭。新戶三百三十八戶。四分著牛一頭。聖旨到日。仰就差人與各路差去人。一同前去所指路分。著緊催促。驗數分付各路收管者。見得以南路分馬匹牛畜艱難。今約量定立到每馬一匹。價銀三十兩。每牛一頭。價銀二十兩。仰各處皆驗燕京酌中時估。折納輕齋匹段紗羅絲綿絹布等物。用鋪頭口轉遞交付。卻令三路置庫收貯。明附

文曆支銷。回易諸物。於迤北民戶內。逐旋倒換頭口用度。若各路自願計置頭口分付者。聽從民便。不得因而刁蹬抑勒。多要輕齎。只令一次諸路協濟。已後止令三路逐旋補數。其各鋪所置頭疋。仰三路各差本處州府司縣官一員。專一提控。轉差官一員。專一管勾其草料。於三路各驗民戶多寡。均科應付。若非理死損。並勒提控官親管勾當。官均陪。若因病倒死。卽仰作急貨賣皮肉。逐旋補買。不得闕數。若使臣非理騎坐死損者。仰依條令使臣陪償。若蹉程死損者。每三次罰馬一匹。與被蹉之鋪充鋪馬用度。除各路另給御寶文字外。據協濟路分。仰欽依作急應付施行。十一年己亥十月十五日奉旨。驛傳勿給懷駒牝馬。如違給者乘者。各杖五十。使臣若無急事。令乘牛車。十二年庚子十一月二十三日奉聖旨。據燕京路達魯花赤禿魯別迭兒管民官鋼疙疸奏。過往使臣多有無牌劄。及增乘驛馬。多索分例祇應草料之人。乞禁約事準奏。仰禿魯別迭兒鋼疙疸等委人辨驗過往使臣有無牌劄。增乘驛馬。及不合起馬之人。并據合得分例祇應。照依已降分例支遣。兼有長行馬匹草料。自十月一日草枯時爲始放支。至向前四月一日住支。每馬一匹。依準大軍體例支料三升。草一秤。若十四以上不得支遣。本處如有官中勾當公事使臣。依例祇應。如無勾當。許令應付一日。次日不得支遣。如違。照依大札撒。將犯人枷鎖前來斷罪。出軍之人。不在此限。十二月十三日聖旨。據李利解都魯班等奏。告前來奉降札撒據。運酒米中站內。

諸人不得經行。今來卻有不合經行人等。於站內經行。及射野物事。聖旨到日。仰將射野物人等。隨逐塔海欠不出軍者。若不會射野物。於中站經行人等。據應有頭口內。各斷一半沒官。甲辰年三月。朝命節該據東平府路。萬戶總管軍民長官嚴忠濟奏。隨城郭居住。別投下開鋪營運之家。不肯協濟本路祇應。準奏。仰照依元降大札撒協濟祇應。如違治罪。世祖皇帝中統元年五月奉聖旨。於望雲立一站。又於榆林望雲之閒酌中處立一站。五月二十一日。中書省官忽都不花奉旨。縉山至望雲。速取徑道。立海青站者。中書議差斷事官亦捏哥等。赴宣德州置縉山。靜邊。望雲三驛。撥榆林站肥馬五十四匹與縉山。雷家店站馬四十匹與靜邊。宣德州站馬四十匹與望雲。就令各站頭目馬主。備馬腳澁子。使臣飲食等具。近者二日期。遠著三日期。達于新站當役。違者以失悞軍期論罪。仍從宣德州擇能幹官一員充脫脫禾孫除遞傳。諸侯王哈必赤來使外。餘不得給其榆林雷家店宣德州三站。增補馬各二十五匹。每匹支價鈔元寶鈔二十貫。總計三十定買備訖。是月奉聖旨。今後使臣官員。除軍情急速公事。有海青牌者入望雲站。直截前來。其餘使臣。仰榆林站官楊李欒解詢問。如無急速公事。海青牌者。不得縱令。縱由望雲止。令入大站。如違治罪。七月劉天麟奏告。故劉權府元受先帝聖旨。賽典赤處關鈔一千錠。規運利息。專與燕京置買。在城使臣騎坐小鋪馬。除已納訖。乞換授事准奏。給降聖旨付天麟。照依已前體例。從長

規劃。不得違錯。二年二月奉旨大名等路宣撫司所管州城諸色人匠織造到係官段匹雜造到應用生活。并採捕到皮貨。翎毛。鷹鶴。及年例應有進呈等物。起發來時。依例合應付腳力者。仰宣撫司照依舊例斟酌物件輕重。卽出給鋪頭口文。而不得遲住。今後若無宣撫司文。而州城站赤不得一面應付腳力。違者治罪。據出給入站文面。廻程時。卻令赴本司繳納。若各管頭目已有奉到許令人站聖旨。并各投下令旨。亦仰經由宣撫司照依各得體例應付。與鋪車頭口。如有不應。開具緣由申省聞奏。仍下所屬去處照會。四月中書省奏。宣撫司若遇緊要。并機密公事。須當赴朝省計稟。卽乘坐鋪馬走遞。如是尋常公事。止令人遞轉發除。降去起馬劄子外。本司不得別給。宣撫使起馬五匹。副使四匹。委差官令史等三匹。又宣撫司官及領俸以來。權依使臣分例批支。五月十九日奉聖旨。節該南合奏也里海牙所轄州城。宣使軍馬多素祇應。民戶至甚苦之。定到分例。每人日支肉一斤。麪一斤。米一升。酒一瓶。乞降聖旨。事準奏。今後無得分外取索騷擾。違者治罪。十二月聖旨。諭濟南瀆。益都路宣撫司。節該已前體例。隨路管軍官管民官。見來時俱各騎坐自己馬匹往來。今官員有朝廷勾當。將引一行人吏。不計匹數。盡行騎坐鋪馬。以致站赤困乏。今後除有聖旨宣召人員。自有定去鋪馬數目外。據朝見官員須合來者。仰計稟過本路宣撫司。騎坐自己長行馬匹前來。不得乘騎鋪馬。三年三月中書省奉旨。今後但發鋪

馬劄子。皆從蒙古文字。已經欽依給降。及追收各處漢字劄子。凡遞運驗物重輕。應付頭匹押運之官物少者。起馬一匹。酌中者二匹。多者不過三四匹。外又爲西京等路宣慰司鋪馬疲勞。擬令押運官坐車騎驢。奏奉聖旨。今後隨路車運官物。止令押運官坐車騎驢。不須給馬。都省欽依遍行照會。四月聖旨。諭開平路達魯花赤管民官。并榆林管站官。節該今後但有騎坐鋪馬使臣人等。仰照依已降聖旨。不得於望雲取直道上經行。奪要鋪馬。止令經由撫州宣德府正站。若有軍情急速公事。海青使臣徑直望雲鵬窩路上經行。若元騎鋪馬困乏。依例倒換。如馬不乏。並不得強奪人馬。因而騷擾百姓。及過往客旅。七日中書省奏。蒲元圭鎮戍邊城。凡有急務遣使赴朝。乞給降海青圓牌鋪馬劄子。奉旨可與海青牌一面。鋪馬劄子一道。十日中書省奏。蘭州路當衝要。又是邊城。當站頭口勞斃。百姓逃徙。誠可矜憫。乞給孳畜白金以振其民。奉旨可委陝西行省斟酌與之。十二日聖旨。諭元帥阿朮據管下應管軍官。元關海青牌面。今差官前去拘收。如到除阿朮元帥府許存畱海青牌三面外。據管下軍官在前應關訖海青牌面。並仰收拾盡數分付差去官收管前來繳納。毋得漏落。萬戶怯烈二面。也速解兒二面。興元成都潼川路都元帥鐵的等牌三面。闡蓬廣安順慶夔府等路都元帥欽察三面。二十日聖旨。諭各路宣慰司。節該據管下總管府。先爲計稟軍情緊急勾當。俱有關降海青牌面鋪馬劄子。卽日軍民分豁。凡有民

閒公事委付宣慰司通行管領。已後仰就便申覆宣慰司。據元關海青牌面鋪馬劄子。今差官前去拘收。如到除將宣慰司先關訖鋪馬劄子。許令存畱。若有海青牌面盡數分付差去官外。其餘管民總管府應有海青牌面鋪馬劄子。亦仰盡數分付差去官收。管前來邀納。毋得漏落。順天。真定。大名。河閒等路。陝西行省。東平。濟南等路。北京。開元等路。西京。平陽等路。河南路。山東路。四年三月中書省定擬乘坐驛馬長行馬使臣從人及下文字曳刺解子人等分例。劄付左三部遍行遵守。乘驛使臣換馬處。正使臣支粥食解渴酒從人支粥宿頓處。正使臣白米一升。麪一斤。酒一升。油鹽雜支鈔一十文。冬月一行日支炭五斤。十月一日爲始。正月三十日終住支。從人白米一升。麪一斤。長行馬使臣如齋聖旨令旨。及省部文字幹當官事者。其一二居長人員。支宿頓分例。次人與粥飯仍支給馬一匹。草一十二斤。料五升。十月爲始。至三月三十日終止。白米一升。麪一斤。油鹽雜用鈔一十文。投呈公文曳刺解子。依部擬分例宿頓處批支。四月二十八日聖旨諭中書省節該來奏開平站路斷絕。有礙使臣客旅行程。乞安置事。今令此中講究到立站去處。并合該戶計牛馬數目。開寫前去。所據站戶或令隨路減下牛站人戶充當。或於附站鄰近州城擡撥。速爲從長擬定。令差去霍木海即便安置。仍仰本省亦差能幹官一員。與霍木海一同勾當。欽此外據合用走遞牛馬。若令新撥站戶便行剏置。唯恐生受遲滯。除已別行定奪。

今歲不令出備。候至新年正月內。照依各站已定數目。全要置買入站走遞。帖里站。南口牛站一處。二百五十戶。牛五百隻。爲新店地近設置馬站。北口牛站一處。二百五十戶。牛五百隻。土慕牛站一處。二百五十戶。牛五百隻。爲榆林近下不設立馬站。槍杆嶺一站。五百戶內。馬站二百五十戶。每二戶半養正馬一匹。貼馬一匹。共計二百匹。內將雷家店馬站存畱一半雷家店走遞。標撥一半馬匹并戶計。槍杆嶺走遞。餘上不敷。貼撥就數。所有牛站。依舊應當。牛站二百五十戶。牛五百隻。鵬窩站一處五百戶。內馬站二百五十戶。正貼馬共計二百匹。牛站二百五十戶。牛五百隻。下項七站。依鵬窩站一體設立。蝦蟆嶺。赤城。河察兒八眼。撒赤古。桓州。李老站九處。專一搬運段匹雜造皮貨等物。每一站一百五十戶。內馬戶五十戶。正貼馬共計四十四匹。牛戶一百戶。牛二百隻。宣平一站。於宣德州見設馬站內標撥正馬二十四匹。并合該戶計。入宣平站走遞。牛站依舊應當外。據宣平新增牛站。依數標撥。其餘八站。照依今定戶計。牛馬數目。差撥安置。五月十七日聖旨諭隨路宣慰司。節該上都以西。隆興府道立李老站。上都以南。望雲道立車站。并馬站。隆興府以南望雲道。偏嶺以南至燕京漢地。合設站亦。令漢人站戶應當。西路隆興府以北及南路。偏嶺以北至上都。令達達貼戶應當。漢民津貼。據偏嶺以南。隆興府以南。起移前來。立站戶三千七百戶。今差斷事官阿昔鐵木兒。宣使紀忙兀解前去。與宣慰

司一同於隨路馬站內。驗中書省坐去均定。合起戶數。揭照各站籍定文冊。依驗丁多及富強戶內。選揀堪中上戶。其外數目。仰於步站內。亦依上例選揀堪中上戶。馬站戶。馬一匹。車站戶。牛二隻。於各戶下選擇。堪以當站好人。不問親軀。每戶止取二丁。同來人家屬。起移前來。於指定立站去處安置住坐。仍就於各站元設官吏內。亦行選揀堪充站戶官吏。管押前來。據選揀到戶數。定立到頭目。并其餘不該起移津貼步站人戶。各另開坐花名。丁口事產。呈省聞奏。河東西路。西京等路。十月十一日聖旨。諭中書省節該。據隨路到隆興府雲州道上迤南立站人戶。今起蓋房舍。準備來年當站。除依例應付站鋪頭口首思外。仰經過使臣軍馬人等。毋得於站戶處。非理騷擾。取要飲食。及奪要一切物件。各住地面所屬官司。亦不得分毫騷擾。如有違犯之人。其各站頭目於總管隨路站赤達魯花赤霍木海處說知。令轉行申省究治外。有站戶元住處家屬。仰各路宣慰司嚴行禁約。管民官司。及元管頭目。既是各家前來應當站赤身役。並不得科取錢物。侵擾不安。違者治罪。五年五月七日。樞密院據成都四川等路行樞密院參政呈劍關係田元帥所管地面。乞於劍州置司。摘軍看守劍門。更於人頭山添設驛站。庶省鋪戶不致失悞事情。奏奉聖旨准。八月九日。中書丞相線真等奏。站戶貧富不等。每戶可限四頃。除免稅石以供鋪馬祇應用度。已上地畝。令全納地稅上之。是月聖旨諭中書省節該。所奏隨處漢地站驛。宜屬州府親

管其使臣起數。鋪馬強弱合無令霍木海提領。事準奏。據隨路站赤。仰照依已前體例。止令各處管民官親行管領。使臣起數。鋪馬強弱。霍木海常切提領。子細詢問。往來使臣人等。除依例合得鋪馬首思外。無得分外取要飲食諸物。霍木海各站內並不得添差頭目。如已有委付之人。並行革罷。管民官亦不得於站戶處擅便科差。侵擾不安。仍仰點視鋪馬。加意喂養。須管肥壯。不悞走遞。至元二年正月六日。中書丞相線真塔察兒。平章阿合馬等。奏雲州見設站戶。乃迤南州城遠來之人。別無田產。宜令近縣人戶。交換應當。乞召集各州縣官吏。齎民戶見當包銀丁口。鼠尾文冊前來。品答定奪。上曰。此輩何可委付。其令來此。從卿等區處可也。閏五月六日。中書兵刑部據西京路總管府申。渾源弘州等處。不係立站驛程。順天真定德興等路。使臣往來。背道經行。索換鋪馬。乞照驗本部申奉中書省劄付。行下各處站官。令兀刺赤等。今後引送往來使臣。止由正站走遞。毋得徑行不立站驛之處。倒換鋪馬。是日管領諸路蒙古漢人甲匠。阿昔寒言。各路額造皮鐵衣甲。應期送納。及關撥物料。俱各給驛。庶免遲悞。省部准擬。遍行諸路。如遇阿昔寒所管局分送納衣甲。及關撥造甲物料。往來驗數遞運。仍給押運人鋪馬。二十三日。丞相塔察兒等奏奉聖旨。四川鋪馬祇應。從行省從長規劃。今後遇有往來使臣。止用鷄猪魚鴨祇應。開具四川定立站馬匹祇應等如後。四川總四十一站。舊有二十五站。新增一十六站。馬站二十九驥。

站一十二。馬一千八十八匹。牛二百五十七頭。種田及驅駄用驢一千一十三頭。祇應和買猪
鷄鴨鈔七十二定。三十五兩。長生孳畜。就支每月造酒麴米麥二百九十八石。是月大明等路工匠府。
言起運常課。只孫段匹。至洛州路總管府。不應付押運官鋪馬。乞明降事。都省議令兵刑部下隨路照會。
如遇各局送納係官段匹。照依舊例。應付押運人鋪馬二匹。

站赤二（永樂大典卷一萬九千四百十七）

經世大典至元三年四月三日。中書右三部奉中書省判送斷事官只八兒忽解迤南公差回還。言沿途鋪馬數少不繫於廐。頭目人等多不在站。至甚不整。仰行下各站。今後須令如法養飼驛馬常存合用之數在廐。以備走遞。其頭目人等亦須常川在站。無致失悞。四月五日。制國用使司奏準聖旨。計置驢車三十輛。春月運物赴上都。至夏拘車在官。驢令佃戶飼養以助耕力。秋來肥健取發於中都遞運官物。

六月。制國用使司言河南府路榷課稅。每歲差吏赴省計撥稅糧。總管府轉運司人吏來時。許給鋪馬三疋。行移合屬。照會施行訖。八月九日。丞相安童伯顏等奏納鄰站鋪馬。使臣經過本路州城來索諸物。臣等議使臣若無城中公事。不得輒入索物者。亦不得應付。上從之。十月中書右丞相安童等奏西涼甘州莊浪等處增站事。今議除甘肅瓜州。其閒合立站赤。候阿沙來時區處外。就令鳳哥斟酌到中興西涼蘭州甘州信嵬添設站。可用馬一百三十五疋。牛六十八隻。驢六十頭。於官錢內買置。奉旨準。十月二十三日。中書省奏近以西夏之西。近川黃兀兒于量站塔失八里站。攬出去站。此三處闕鋪馬。奉旨令塔察兒奪羅不解。與都省制國用

使司馬區處增置之。今已定擬合增羊馬牛之數。委麻合馬航木里等。如彼買備。奏取聖裁。上從之。黃兀兒于量站。令阿木干駢馬民戶出驕馬一百五十四。牡馬五十疋。牛五十隻。外增買走遞驕馬牡馬二百疋。孳生牝馬一百五十疋。塔失八里站。元存羊一百二十口。外增買走遞驕馬牡馬二百疋。孳生牝馬二百疋。羊一百八十口。攬出去站。增買走遞驕馬牡馬二百疋。孳生牝馬二百疋。羊三百口。四年正月十四日。線真脫歡等。傳旨送茶速禿之地至燕乙裏。剏立驛館一十四處。圖本與中書省令與制國用使司官同議。規劃驛船鋪馬人糧之數。續奉旨。每站給羊二十口。羖羶三十口。乳牛九隻。強牛一隻。其價與買驛馬錢共斟酌支給。制府欽遵放支鈔四百疋。下陝西等路轉運司。於五月內和買。給付各站去訖。茶速禿至燕乙裏。立十四站。拽船牛二百二十隻。驢二百二十頭。馬二百二十四。孳生羊二百八十口。羖羶羊四百二十口。乳牛一百二十六隻。強牛一十四隻。船五十六艘。人工二千名。備三月糧。常役水手二百二十四人。兀刺赤一百一十人。遞送小站者七十人。計四百四戶。四月中書省遣忙古解鎖赤等。賚奉御寶聖旨。諭阿出鳳哥東勝達魯花赤等官。及八令迭兒朵魯不解納鄰站民。仰從應理。下至東勝站十所。用水手二百四十人。驛船六十艘。宜令應付者。五月二十一日。中書省據西夏中興等處宣撫司呈東勝合立三站。本路合立七站。除從權以東勝見在船二十一艘。散給各站行用外。未造船三十

艘。擬用已伐到大通山木植。其餘物料計該價鈔四十餘定。及工匠糧食合無令轉運司應辦。又忙古解回稱只打忽等處。舊有船三十六艘。合令修整。七月一日。中書省奏準新造船三十艘。修整舊船三十艘。一切物料口糧鐵木之工。官爲應付。據水手二百四十名內。擬令各投下差撥一百六十二名。中興府民戶內差撥六名。西京抄海所管水手內。差撥七十二名。每站給牛一十隻。祇應羊一百口。起置館舍衾褥。擡撥種養之地。劄付制府。及西夏中興等路宣撫司施行訖。七月十七日。都元帥也速解兒言乳山口守城千戶忽特木兒。申南兵船隻往來。必合隄備。其鐵哥等各千戶行營相離。帥府九百餘里。並無站道。凡有急使。請令經過州城。換易鋪馬。庶不失悞軍情。省府以乳山口之地屬益都路卽墨縣。相去海口三里。也速解兒見於萊州等處行營事。宜應援劄付右三部行下所屬。今後如委有邊報軍情急務。海青使臣。仰經過州城。倒換鋪馬。其餘常事。沿站經行。不得指例。背驛乘傳。五年二月。制國用使司言。拘收翎根納官。除應付綱運外。其押運之人。合無乘驛馬事。都省令右三部行下合屬。應付鋪馬一匹。三月四日。中書右丞相安童奏。霍木海呈中統四年奉命總管諸路站。令各路管民官掌管。霍木海提領使臣起數鋪馬。強弱勾當事理似不歸一。誠恐兩耽。臣等議得止。合依至元元年定制。上從之。六月十九日。中書左丞相安童等奏。濟南濱投下所出物貨。勞民遞送。有司請以蒙古戶計。

立站外。有二站乞差撥本投下漢民設立。臣等議得事關大體。別無此例。上曰。塔察大王漢站。其始如何。定立。可再議聞奏。

十二月二十四日。樞密院官奏萬戶黃急答兒言也。孫托非理起移托鉢地界站赤。合無遣使前去。只令依舊置立。奉聖旨。且曰。令黃急答兒差人去者。六年二月。御史臺呈奉中書省定。

擬司官巡歷合屬。如無馬站去處。就乘州縣官馬匹。依例更換。爲例施行。

是月御史臺定擬憲司遣官詣朝廷計事。合依總管府例。約量差起鋪馬。每道給鋪馬七匹。劄子三道。計一十二道。發下各司。遵守施行。

三月制國用使司據運司申爲制府所屬合用鋪馬。就本路總管府出給劄付。恐本司有故遣使。總府不準應付事。制司議行下合用鋪馬。除就發常行劄子外。若有不敷。斟酌可用幾何。依舊例關總管府取給。

五月十二日。中書右丞相安童。平章政事忽都答兒奏。中都至上海站亦以聚會故。遞運係官及投下諸物數多滯不能發。至甚勞苦。臣等與樞密院制國用使司。御史臺宣徽院。及四怯薛官同議。洪贊至獨石四站。各增車驥三十具。榆杯站增牛驥十具。總計價鈔一百五十六定。自火你赤爲始。至上海蒙古四站。於四怯薛內。差撥牛畜助運一月。官給路貲。似爲便益。奉聖旨准。六年六月。西京路申驛使到站。往往不知姓名。又不明示起馬劄子。及所幹之由。乞下鄰境官司。開拆文字照會事。省部準申行移各處官司。今後起發印信關文。應付鋪馬施行。

十一月制國用使司言。巡鹽官吏弓手。舊例每名官支米

一升馬粟三升。芻一束。雖多不過十人。草青之時。不支芻粟。今所支多於元定之數。擬合轉運司課稅所。今後差官出巡。明給公文。具人馬實數。令所至官司。依上應付。都省準擬。十二月河南道提刑按察司。言河南兩路鋪馬。前都元帥四萬戶。統軍司等。泛濫給驛事。河南行省移咨軍前行省。各令照會都元帥。及總管四萬戶。河南統軍司。沿邊監戰萬戶。今後遇有給驛。申省斟酌緩急起馬。毋得擅行。其河南兩路。總官府轉運司。并迤北差來南京軍前計事者。亦驗緩急應付。各官司毋容輒準給發。七年正月十一日。中書省臣阿里傳旨。若曰內外諸處往來使臣。須憑印信文字給驛。無文憑而起馬。給馬者皆有罪。都省劄付右三部。遍下合屬。欽依施行。二月中書省據左三部呈。與右三部議擬。站赤事理下項。一總管府在城驛。設官二員。就於見役人員內。擇有根腳經事者任之。直隸總官府。不得用私己人。一州縣驛。設頭目二名。如見役人。即是相應。站戶就令依上任事。不係站戶。則就本站馬戶內別行選用。一府州司縣官站官。皆不得借乘鋪馬。影占站戶。及擅科差發侵擾。仰總管府常切體究。違者治罪。一從站戶自買肥壯齒小無病馬匹。喂養走遞。有司及諸人無得結攬。一站亦合供報文字。總管府依例行下合屬縣分取勘申報。一除脫脫禾孫。依舊存設。據隨路見設總站官。截日革罷。於內若有祇受聖旨。令旨。中書省劄付。及歷事年深別無過犯者。保申合于上司區用。一照依舊例。經過使臣。開具各位下姓。

名。并鋪馬數目。賚擎是何官司起馬。蒙古字劄子。從某處前往某處。幹辦是何公事。各站每季造冊申報總管府。不過次月初十日以裏申部。六月十二日速古兒赤明安答兒對中書省臣奏京兆府營葺館驛。不令使臣止宿。卻於民家安泊。豈不擾民。奉旨若曰。既有使臣驛舍不令安止。乃宿民家。騷擾百姓。安有此理。省部欽依。遍行革正訖。二十日樞密院奏。先奉體例。禽獲走小路賊人。并細作人所有。南貨一半充賞。一半沒官。臣等議得。札撒聚會時。宜以沒官物充使臣飲食之費。從之。七月九日。益都路言各位下使臣給驛。各齎令旨起馬。本路合無再出劄子。其馳運物貨鋪馬。未審如何應付。乞明降事省部。照得舊制。段匹皮貨例從車運。至如各位下進納海青鷹隼人員。委有印信文字。所起鋪馬。與見納堪中鷹隼數目相同。本路不須再給劄子。若實起鋪馬。比元文數少。令各路明具關文。相沿倒換。八月省部定擬都元帥府。統軍司招討司。遇有蒙古軍人與民相關。及軍前公事。從本府遣使就乘長行馬。於差劄上明具人名馬數公事之由。給限應付分例。其餘萬戶千戶。不得指例。如非軍前公事。及無印署文憑者。皆禁止之。九月二十八日。大理鄆闡金齒等處宣慰司呈。準差來立站使臣帶木解亦只里等文字。該與帖古解相接立站。卑司卽便和買到鋪馬一百五十四。并察罕章分到站戶五百戶。已於西番小當當地起立馬站畢。外據大理寺等一十四處。見今鋪馬闕少。站戶消乏。爲此本公司大小官吏。出私己錢買到馬。

二百匹官錢和買八十匹。乞照驗事都省移咨尙書省。照驗去訖。十月二十六日司農司言四道巡行勸農官乘驛勸課。所過無站之處合無從按察司巡歷體例。乘坐馬匹。請區處事都省準擬依上施行。十一月河北河南道提刑按察司言河南轉運司起納課程。除駕鈔鋪馬外。止合差官一員。起馬一匹。不應多起庫子馬一匹。事收銀庫呈若止差庫官一員。難以照略。申奉河南等路行尙書省擬送本司。今後起納課程差庫官庫子各一名。就用元降本司劄子起馬二匹。是月九日始立諸站都統領使司。兀良哈解斡脫哥欽奉聖旨專一管領站赤公事來往使臣。令脫脫禾孫盤問無聖旨牌面起馬者。裁減之。非急務則應付牛驢。事速則馳驛。一切整治委命兀良哈解斡脫哥霍木海三人主之。有不聽其號令致鋪馬倒死。首思失悞者罪之。八年正月二十五日中書省議鋪馬劄子初用蒙古字。其各處站赤未能盡識。仰繪畫馬匹鑄造小印。於劄子年月日之後。墨印馬匹數目。復以省印覆之。庶無疑惑。因令今後各處取給鋪馬。標附文籍。具馬匹數付譯史房書寫畢。就左右司用墨印。印給馬數目。省印印訖。別行附籍。發行墨印左右司封掌。四月陝西四川等處提刑按察司言書史書吏奏差。元例給鋪馬一匹。似爲不敷。御史臺議擬每道增給鋪馬八匹。如書史書吏奏差。侍官巡按量地之近遠。事之閑劇。給馬不得過二匹。同日繳納。照會爲例施行。五月御史臺言監察御史各道按察司巡按體察公事合乘鋪馬。呈省出給

劄子。不惟遲悞。亦有事涉機密。如制國用使司。樞密院遣使。俱自出給劄子。合無依例。就便斟酌出給事。都省準呈。下尙書兵部。遍行照會。六月一日。東路都元帥也速鰣兒軍馬南征。經莒州莒縣宿頓。憑樞密院劄付。坐下千戶一員。日支羊半口。重一十五斤。取於縣司。既而本縣照議。先欽奉聖旨。出征聚會軍馬經過本處宿頓。每千戶一員應付羊半口。一十斤。今所支過多。遞申省部區處。戶部照得至元六年十一月十二日。中書已擬千戶宿頓。支羊半口一十五斤。仰照驗施行。八月六日御史臺據河北河南道提刑按察司申。體知在城館驛多爲有司官占居。卻令使客於民家安下。問得本路館驛四位。爲達魯花赤同知已占其二。理體不宜。卑司除已行移本路起移各官外。申乞照詳。十二月山東東西道提刑按察司言。各路官員乘驛品秩或同。起馬卻有多少。乞區處事。兵部照擬隨各路官員。若奉特旨或省部明文。以急務乘驛者。依舊例三品五匹。四品五品四匹。六品七品三四匹。八品以下止給二匹。仍申事例如後。一隨路總管府官。監捕蝗蝻。達魯花赤總管。起鋪馬三匹。同知治中府判二匹。一運司每季差押運官一員。庫子一員。赴部納課。元給劄子起馬二匹。令運司既罷總管府依例送納。一各路交鈔庫子庫官。赴都關支鈔本。解納昏鈔。從各路總官府就給劄子起馬二匹。一隨路局院。起納段匹。雜造軍器等官。生活。各路就起劄子應付押運官鋪馬一匹。一隨路府運司等。每歲計撥稅糧。考校課程人吏。今運司

既罷。各路依例就給劄子起馬三四匹。一隨路係官局院差人赴都。及於他處關撥物料。起馬一匹。上年不會馳驛。不在此限。一隨路差人根檢急遞鋪。遺失損壞文字。本路就給劄子起馬一匹。一隨路差人押運進呈御饋野物。本路給劄子起馬一匹。一隨路運司馳運鹽引。驗斤重給馬。今改立都鹽使司亦依例應付。是月中書省據御史臺呈。軍中差人辦事。及取發年銷紙劄。委官各處歸問軍民詞訟。并出征人員。合無給劄子起馬事。送兵部議得。沿邊萬戶遇軍情急務。差人飛報。各許給鋪馬一匹。又統軍司都元帥府。差官直赴朝廷。計會軍情事務。合乘鋪馬。不過二匹。並從統軍司都元帥府給劄子。至如差官各處歸問軍民詞訟。取發年銷紙劄。別無乘驛之理。其軍官出征。自有征行馬匹。難議馳驛。遍行爲例。九年五月中書工部差委造甲官馳驛。引領作頭等人。前去隨路指使造甲。送戶部定擬分例。所至應付。罷役住支。知會造甲官。宣德府甲局。劉應日支白米一升。麪一斤。肉一斤。鹽油菜燈等物。作頭一名。日支白米一升。麪半斤。肉半斤。油鹽菜等。八月中興等路提刑按察司言。五品以上長官俱得進表。稱賀。止令乘己馬。預期來上。照得中興等路行省。每遇聖節元日。差人進表。俱各乘驛。卑司相去朝廷。不啻萬里。今後合無依行省例。馳驛進表。一就赴臺計稟公事。似爲便益。省部議得。各路計稟公事。及押送諸物人等。尙得馳驛。其賚擎表章人員。皆以臣子赤誠。若由常行馬匹。於禮未安。據中興等路道途迢遠。今後

遇天壽聖節元日。差人捧表詣闕稱賀。擬合起馬一匹相應。所據各道按察司并隨路總官府五品以上及直隸省部官署。一體施行。移文遍諭遵行。是月西京路脫脫禾孫昔班盤詰。使忽賽因及無劄子起馬之人劄璘親乘鋪馬。押送二人赴諸站都統領使司區處。西京路言昔班乘驛非法。都省下本司推問。昔班引據舊制云。脫脫禾孫盤問下使臣夾帶物貨許從鋪馬押送。今次已嘗白於西京路達魯花赤等官。令遵先例送上。以故起馬非我罪也。諸站都統領使司議。昔班因公馳驛初不爲過。省部準擬。今後脫脫禾孫若有公幹。合行馳驛。即於本路官司出給劄子方許起馬。照會各路依上施行。又諸站都統領使司言。朝省諸司局院及外路諸官府應差馳驛使臣。所賚劄子從脫脫禾孫辨詰。無脫脫禾孫之處。令總管府驗之各站明白相關所差之由。如干軍務急速公事。依例走遞事。苟細緩而非理馳驛。所過州城探親飲酒畱滯。及至上馬兼程走驟傷損鋪馬者。當治罪勒償相應。都省準呈施行。十一月河閒路備清州會川縣言。本縣路當山東益都淄萊濟南等處衝要。卻無設立站赤。不時驛使經過索換鋪馬。除將官吏已馬應付外。又復邀奪船隻。客旅及坊郭軍民馬匹乘傳。騷擾不安。因而死損民馬。多致訴訟。合無令自大都迤南。并益都淄萊濟南站赤。凡往來起馬人員。今後並由站路經行。嚴諭各站官吏及回馬之人。須令引送前路立站去處換馬。毋取小道似望商民安便。省部準擬行下合屬。依上施行。十年五

月。陝西提刑按察司僉事董奉議言。至元九年十二月至太原介休縣見蒲元帥一行起馬二十四匹。又至平陽霍州站見合刺統軍起馬三十四匹爲數太多。乞定奪事都省照會樞密院議擬到軍官合騎鋪馬數目行下合屬遵守施行。四川行院長官起馬八匹。次二官起馬六匹。次三官起馬五匹。次四官起馬四匹。軍官萬戶起馬五匹。餘者馬三匹。六月十六日中書省議今後遣使回日須將元給牌面鋪馬劄子隨卽繳納。違者究治。遍行中外。照會施行。十八日兵刑部侍郎伯朮奏失呵兒斡端之地產玉。今遣玉工李秀才者採之。合用鋪馬六匹。金牌一面。上曰。得玉將何以轉致。至此對曰。省臣已擬令本處官忙古解拔都兒於官物內支腳價運來。上曰。然則必得青黃黑白之玉。復有大者可去其瑕璞起運。庶幾驛傳輕便。九月中書兵部議諸官府出使事非急速往往在路停止及至上馬兼程奔驛。遂將鋪馬損斃。今立程法遍行遵守。一驛使到站先驗起馬劄子。其事干軍務急速卽仰如數應付良馬。毋得停滯。如係緩慢公事當日行過三站復欲起馬或無劄子不得給行。一依驗劄子應付正馬外其元來兀刺赤已給馬者聽無馬者徒步引送許乘正馬以回。仍關前路照會。一馳驛使臣合祇應飲食分例不得闕悞。若有長行官員雖賚上司文字令應付飲食者州縣與之站赤毋得擅給。一諸府州縣官迎迓官員不得差人乘驛馬。一今後除朝廷軍情急速公事之外毋得擅差鋪馬亦不得亂行前路文字。一今

後使臣人員乘前站馬匹。遇晚到站不可還者。仰本站依例遞相飼秣。毋得闕悞。一站內槽前鞍轡繩索。一切什物須要完備。仰各處提調官每日點視。母令短少。馬匹不得瘦弱。闕役。十月中書省所委整點站赤。斷事官亦捏哥呈擬便宜二事。其一謂隨路總管府差人馳驛。不計事之緩急。輒起鋪馬三四匹。兀刺赤馬一匹。此時軍務方劇。竊恐所起數多。馬匹疲瘦。久而失悞公事。宜令今後以軍情要務遣使者。量起鋪馬一二匹。餘事止乘己馬相應。省部準擬。其二謂隨路差人吏赴省部照算稅課送納軍籍者。自始發及回日。不論緩急。日夜奔驟。走損鋪馬。又於站赤取索鞍轡雨衣氈褥。動致弊壞。合無令乘驛人吏自備鞍轡雨衣。應限到部事畢。依程從緩還役。省部議得。馳載係官文字。當從站赤應付苦氈。餘令人吏自備。本路承受部符之日。卽合起遣應限。毋致遷延至期。致令人吏兼程馳驟事畢。亦須徐緩還家。十二月諸站都統領使司言。本公司品同部院。各路總管府合聽指揮。今總管府親臨站赤。本公司係總要上司。據隨處站戶同軍戶奧魯擬屬元籍州縣外。其立站去處。合無革去州縣一重官府。止令徑隸總管府。依樞密院例。並聽使司指揮。易爲責辦。二十一日省部照擬站戶同軍戶奧魯擬屬元籍州縣外。據立站去處。止令直隸總管府仰總管府。並聽使司指揮。遍行照會。隸十一年五月。諸站都統領使司言。朝廷遣使幹辦諸事。每員鋪馬不過三四匹。此常制也。今省院諸司凡差人員往往起馬四匹。乞區處事。省部議得除奉

使遠方。及非常例事干急速者。隨時斟酌。其省院臺部諸衙門。常例遣使馳驛。多不過三四匹。仰依上施行。

十月十二日。益都路總管府言。先奉諸站都統領使司照會立站去處。革去州縣一重官府。直隸總管府。並聽本司指揮。續奉禮部符文。卻該諸站都統領使司各路總管府並聽指揮。別不曾云立站去處。直隸總管府請明降。事省部照擬得隨處站赤止令直隸各路總管府外站戶家屬擬合元籍州縣管領。仰依上施行。

十二年二月七日。中書省奏奉聖旨。增給東西兩川鋪馬。祇應中統鈔二百錠。是月河南等路宣慰司言。各路押軍及運兵器人員。每人起馬三四匹。以致站赤消乏事。都省議下南京路。今後若有差遣押軍及運兵器者。起發鋪馬不過二匹。河北諸路亦從此法施行。

三月七日。中書省奏甘州所管長行站納憐站。其站戶多有投訖各投下者。以致見當站役者貧乏。又批支不敷。站中常闕鋪馬。往復使臣勞苦。臣等議乞差人往問。果是站戶悉令還之。奉聖旨準。

十二日。中書平章政事阿合馬張右丞奏。諸王只必帖木兒所置三站之糧來請接濟。臣等議每站二十人計六十人。一年之食以羊準支。其久遠口糧。每人給乳羊五十口。奉旨準。

六月中書省所委點站斷事官滅里吉解言。隨路計撥稅糧考核司吏。初非急切之事。往往走驛驛馬。乞禁約事。省部準言。遍行禁約。

十一月二日。中書兵刑部據濟寧路備兗州曲阜縣言。本縣路當連海徐沂等州。本非驛道。使臣之來需換鋪馬。稍或分辨動遭笞罵。今年

自春及秋泰安州濰州鄒縣數送使客。經行縣司。慮失公事程期。未免以官吏弓兵之馬。及驅逼居民過客。所騎馬匹以代驛傳。常有死損。竊照省部定例。差委官員須經正站。乞區處禁約事。省部議下合屬。今後無令兀刺赤人等引送使臣人員。無站去處經行。是月河南等路宣慰司言蒙古千戶百戶俱有常俸。而所過宿頓復需飲食分例。騷擾不便。中書照會樞密院。照擬得蒙古萬戶千戶百戶遠近出征經過及聚會去處。合用飲食。令有官署州縣照依定例應付。如鎮店坊人煙稀少之地。不合取要相應。都省準呈下合屬照會施行。十三年正月十五日諸站都統領使司言伏自大元立國以來。軍站爲重。至元七年。上命設立本司掌管漢站。兀良哈解翰脫哥霍木海三人同事。照依樞密院例委各處達魯花赤管民正官兼管遇有裁決不定事務。止申本司乞更官署之名。省部行移翰林院擬改爲通政院。奏奉聖旨。何用此名。回奏爲行移公文之用。上曰。旣爾與之可也。十八日都省命降鑄印信。改立通政院訖。七月。中書省議時當暑月。道途泥潦。諸官府不分事之巨細。緩急泛濫給驛。今後各路官司及諸色人員遇事須申上司區處給驛。果有急務。就便起遣。毋致泛濫。遍行遵守。十四年二月七日。中書左丞相合伯平章政事阿合馬奏永昌路山丹城許速土帖里減土火郎各站請給立站錢六十定。又乞以鈔千定。令其規運息錢。補增五站祇應。不致失悞。又諸王只必帖木兒言永昌府站戶一百二十戶。當役困乏。鬻其妻。

子地產。先奉上命賜寶鈔五十定贖還。又用三十一定買馬八十四匹當站。止存一十九定贖其妻孥。尙闕三十一定。乞矜憐給賜之。臣等議得依數支給。俱奉聖旨準。十五年二月諸路皮貨都提舉司言舊制拘收皮貨人等合乘鋪馬皮毛腳力亦當應付。乞區處事都省下兵部仰照舊例驗物輕重應付腳力遞運。是月中書省定擬隨路站赤官爲應付祇待羊口皮毛納官頭蹄肚臘等折計斤兩準肉支用送兵部依上施行。五月六日中書平章政事哈伯等奏中慶路至烏蒙賽典赤所管之地立訖九站烏蒙北五站不得立烏蒙土官稱使我屬賽典赤則可立站。臣等議差人諭塔里不罕能主張立站則立之不能則委賽典赤領其地以立站。又烏蒙北至敍州若造船立訖水站則陸路七八日程順水一日可到俟立訖來由水由水路去者使由陸路爲便並奉聖旨準。是月益都路淘金總管府言十三年設立官署於淄萊路。萊州置司歲辦金課除於淄萊路取給驛馬馳載及押運官乘驛赴上進納外年例起解并考核人吏合給鋪馬預乞區處事省部照擬除考校課程人吏別議開定納課乘驛數目仰益都路遵守應付施行府官一員關端赤駝駄馬共三匹收金庫官馬一匹馳金馬一匹六月十五日承旨火魯火孫等奏甘州宣慰司呈敬奉只必帖木兒王令旨在先接濟站赤給降鈔一千定禿兒干站以不會奏聞不得乞依山丹城等五站例與鈔二百六十定奉聖旨準七月河南等路宣慰司言今後除朝廷大官

蒙古使臣。及不食死肉官員。依例應付羊肉活鷄。餘者給猪肉。又泰安州言。屠戶供備羊肉。官價有虧。無可從出。省部議。依河南宣慰司所擬一體應付。行移合屬。依上施行。十月中書兵部照得諸衙門尋常差委之人。站赤亦同。朝省大官蒙古使臣。一例應付猪羊肉分例。或一名起鋪馬三匹。全支分例。復需酒饌。常行馬芻粟。又不於館舍安宿。以此相度。除朝省大官蒙古使臣。及不食死肉官員。與隨朝尙書等。依例應付外。其不相干官府所差之人。驗差劄應付正人分例。食以豬肉。宿以館驛。如無許給。常行馬芻粟文字。不得應付。行下合屬照驗施行。十二月大名路滑州內黃縣。言比者有人自稱校尉。需求分例。卻無許支文憑。本縣路當驛程。常有似此之人。難辨虛的。今後若有校尉承差。乞給文憑。事省部依準劄付宣徽院。但差校尉依例令當該部分。出給文憑。於合屬應付飯食。仍遍行照會。若有似此無文憑者。不得支給。十六年正月。南京路言。速忽都公主至許州。命取盃酒。已於官務應付外。設有不測。朝省蒙古漢人大官。似此需求。無可應付。又保定太原等路。大都廩給司各言。如上位及諸王位下使臣。祇應盃酒。合無設立官務醞造供給。兵部議。得祇待使臣官員盃酒。合照依舊例醞造。祇待呈奉都堂鈞旨。送本部斟酌施行。二月中書省所委照勘南京等處稅課官馮八兒。言東昌路抑奪民車。運載金銀至茌平縣。不爲交換官司遞運。明出官錢。和顧民車。或差撥站車。豈有脅奪百姓車輛之理。都省送兵部遍行各路。

禁約施行。四月大都路脫脫禾孫言濟寧府等路差來使臣所賚起馬劄子雖寫蒙古字卻云漢語。又且字有差訛。乞下合屬路分改正書寫蒙古字語。通政院具呈省部照擬得濟寧路別無蒙古譯史。以此不能如法。擬合令翰林院先發譯史於各處就役。然後改正書寫遍行各路。今後凡遇差人起馬劄子。書寫蒙古語言字樣。仍取問見役譯史。是否翰林院所發人數呈省。五月二十日臨洮府脫脫禾孫塔察兒言臨洮鞏昌通安等十站富者出籍貧者充役。比年災傷闕食驛馬倒斃數多。官政逼迫未免鬻妻賣子以至逃亡。或有投充諸王位下。昔寶赤怯憐人匠等戶規避站役者。至元十四年十五年伯答罕土里叛亂人不聊生。官司又復拘收馬匹及倍程乘坐車馬過站。科差和買雜役站戶難以存止。乞照詳事是日中書平章政事合伯御史大夫玉速鐵木兒。樞密院官朶兒朶呵李羅通政院官兀良哈解等集議定一十五事。塔察兒對仗奏告俱奉聖旨準省臺欽依下合屬施行。一言先奉上命除帶新圓牌聖旨外。凡以公文遣使者。鋪馬勿與。今諸王及諸官府因公移文遣官如何給驛。臣等議得軍情重事擬帶圓牌。此外不以是何公事。諸官府行以公文若阻滯之。竊恐不宜。一言總帥所轄城邑有站戶三百四十戶。今皆投充諸王只必鐵木兒駢馬愛不花投下戶臣等議依先例回當站役。一言只必鐵木兒王位下使臣已給鋪馬祇應外其長行馬匹復索芻粟宿頓等物。今後似此者勿得支與。一言臨洮府站赤元

有牧地。今只必鐵木兒王令旨。令海陰禿昔刺陳鐵木兒不花。三人爲主。臣等議令審實回付站赤。一言僧俗之官。把執諸王鋪馬。令旨者有之。臣等議得合行追收。一言民戶及諸王布施之物。有給鋪馬行者。今議諸王布施許起鋪馬。其餘僧人毋得給驛。一言諸王位下細茶飯。五戶絲及軍人錢物如何。給驛將送。臣等議得此係已先行。不宜遽罷。一言斡脫息錢。合無收拾給驛。今議如舊制。一言總帥總管府。按察司官給驛合無減省。臣等議得果有軍情急務。許由鋪馬經行。此外站赤不得給驛。其干民事者。州城有司應付起遣。一言諸官府遷轉。往來官員合無減省給驛。今後鋪馬不與。一言諸王作佛事寫經等。取運物色合無減省給驛。今議並依已行。一言諸王所過民間。不置行幕。卻仰站赤行止。今後若有急務。須乘鋪馬。餘者準備宿頓之所。迤邐前來。一言黃水站有乘舟復換鋪馬者。請減省事。今議似此一次二次。可省者從之。一言土鉢地。差去使臣除元來鋪馬定數外。復將大王國師鋪馬文書物件以行。臣等議得元來鋪馬文書已上。不令增給。一言都省樞密院。御史臺通政院。王相府以公文起發鋪馬。合無減省。臣等議得諸公事在先擬從鋪馬辦集。豈可罷之。但依先例施行。是日中書平章政事合伯。御史大夫玉速鐵木兒等奏臨洮府脫脫禾孫塔察兒。阻遏隴右河西道提刑按察司巡按人員。不給驛馬。臣等謂總帥府總管府按察司等官。因公起馬。固不可省。奉旨若曰。此等果有軍情急

務。合給驛馬。餘者則不得給。其干民事者。經由城邑以行。二十七日。中書省臣奏奉聖旨。往來使臣人等。或無文憑。輒於沿路站赤。取給飲食馬匹芻粟。今後皆勿與。欽此。都省下兵部。遍行合屬照會。是日中書省奏。愛不花所治州城。議立二十三站。合用牛三百隻。車二百輛。牛價就彼支鈔。及令西京準備車輛。奉聖旨準。二十九日。中書省臣桑哥等奏。李陵臺管站官吏。侵盜祇應官錢。科取百姓物色。事發詞伏。計贓二百三十二定。已追二百定。未追三十餘定。且如一站追至此數。其餘似此者多矣。臣等議令通政院官李欒解等追理。仍遍行禁治。如有侵盜之人。自首於官者。免其罪。奉聖旨準。六月三日。中書省奏。西域之人。有自河西來者。往往假公營私。每於諸王只必鐵木兒府。告給驛馬。不得。則求於宣慰司遞傳以來。合無戒飭宣慰司。今後詰其所由。可者遣來。其不可者。勿從其請。奉聖旨準。九日。中書平章政事合伯參政耿仁。參議禿烈羊阿等奏。臣等與兀良哈解阿合馬等議。木八刺沙所言。達達四站事。榆林站元僉一千二百七十戶。洪贊。鵬窩。獨石等三站。每站止僉八百戶。今自西川拓跋河西等處來使。皆由此三站。若比榆林站戶之上。又增八十戶。每站一千三百五十戶。三站總計五千四百戶。方爲得宜。又在先四戶養一馬。今議五戶養一牛。猶慮新僉站戶事未慣習。於舊站內差一百戶。新撥二百五十戶。每站三百五十戶。以充車牛之役。舊站一百戶。卻以新撥戶補之外。一千戶充養馬之役。選差廉幹頭目。以董

其事。令宣德府西京北京三處。差撥二千七百戶。近裏城邑差撥二千七百戶。以充新撥之數。每站增置馬一百五十四。牛二百隻。車具全。每馬一匹價鈔一定二十五兩。車價一定。數內達達車二百輛。漢車五十輛。如此規劃。未審可否。上曰。達達站赤。如何區處。兀良哈解對曰。容臣再議敷奏。是月大名路申使臣盃酒。在前定到萬戶日支酒三十升。千戶二十升。百戶十五升。使臣人員一升。爲不見軍馬宿頓。斟酌合支多少。都省令樞密院議。定萬戶日支酒三瓶。千戶二瓶。百戶使臣例同。日支一瓶。見出征軍人下各路依上應付。仍定每瓶準酒一升爲數。行移合屬照會依上施行。七月五日。兵部侍郎忽都答兒奏先嘗有旨。謂來往使臣除衾褥外。餘物鋪馬上勿載。如有從脫脫禾孫搜取之。今使臣凡有所將。悉爲脫脫禾孫之利。江南使客實多。恐無此理。上曰。朕未嘗言之。今後毋令搜者。省部欽遵爲例施行。是年。潭州行省。以公事遣傳總把者馳驛。由南京路站道經行。爲所乘馬步驟不佳。在途奪乘本站回站馬。奔走倒死。省部議合陪償。咨潭州行省施行。十七年二月。上都留守司言。每歲支持糧斛。全藉北京收羅。民力運送。官民勞費不便。又興州道站赤相接。北京路豐臺站。歲運迤東高麗耽羅東京等路。進獻御饋鷹隼。諸物往來。官吏頻數。人馬闕乏。莫若將放罷牛羣頭等四站。蒙古戶計。徙至興州道上。立懶道禿七箇營。蒙古兩站。卻以懶道禿等漢人站戶分立尖山。新店。湧泉三站。每站擬設三百戶。除舊戶四百二十八戶。

外合擬北京路附近相應當差四百七十二戶。總九百戶應當站役。與蒙古站接連遞運。似爲官民兩便。設如力有不迨。量顧民丁。終是省費。請區處事。是月四日。玉速鐵木兒朵兒朵合等奏取聖裁。上從之。都省欽依劄付兵部北京宣慰司通政院施行訖。九日通政院言宣州林原等站。並無分例食羊。止憑站戶捕獵野物。祇應使客。今奉聖旨禁斷軍器。拘收弓箭。無可採捕。失悞祇應。四月二十五日。中書省臣李羅等奏奉旨射野物者。許執弓箭可也。二十八日。平章政事阿合馬奏和州言民戶祇應往來使臣。首思以故困乏。請爲奏聞優增物力。庶幾休息。臣等議得鋪馬首思。乞從中書斟酌與之。奉聖旨準。是年春江淮行省言各處安置水陸站赤遞送使臣。事干軍情急務。則給馬。緩者乘舟。卻有殿逼站官必須馳驛者。往往損斃鋪馬。失悞站赤。除已增補水站船隻。及令馬站約量存畱驛騎外。今後擬令本省宣使人員。無間緩急。止從水驛來往。自朝廷以至諸王公主駢馬。省臺樞密院差來使臣。亦請一體於劄子上該寫。自邳州爲始。應付站船遞送迤南。委是便益。都省劄付通政院。呈擬水程八十里。增立一站。依例撥戶官支口糧。和買船隻。各馬站斟酌存畱馬匹。以備劇務走遞。除照勘增置水站地方。及存畱馬數。別行具呈外。都省議得今後除海青使臣。軍情急務。方許馳驛。餘者自濟州水站爲始。乘船往來。所給劄子明白。該寫相應。遍下合屬。依上施行。四月三日。左阿刺太子位下來使鐵赤速都寒奏臣等馳驛至豐州站。

待至日暮無祇應者。遂問得州官。言往者有司管站。未嘗若此怠慢。今無人鈐束故也。奉旨若曰。今後使臣赴上計事。似此怠慢失慎必矣。其與中書省言之。都省欽遵劄付西京上都站赤戒飭官吏從朝至暮。不得擅離。及差官點視。如有違慢一次者斷罪。再犯者黜代之。十五日中書參政耿仁等啓皇太子曰。去年五月臨洮府脫脫禾強塔察兒奏奉聖旨遷轉官已後毋得給驛。今年正月御史臺奏南方及河西西京京兆府差去官員不能自達定議二千里之外乘驛。二千里之內者備已力以行令旨嘗可其事。今管民之職似此遠行合無依御史臺所奏一體施行奉令旨準。七月十二日中書參政耿仁尙書阿里等奏白宣慰言大江南北各站多有消乏合無定議江南行省各道宣慰司總管府萬戶千戶除奉上命赴朝外。若以公事歷本境之地者止乘己馬。果有軍情急務則遣使往來馳驛。臣等以爲諸官被召及機密軍務宜從行省迤邐乘傳。其朝見及言利便者止乘己馬或妄說官中公事而給驛者罪之奉聖旨准。十八年二月少府監旱年例召集各路放還人匠沿途合用飲食腳力請應付事都省下兵部照驗。如是起到人匠前來照依年例應付粥飯腳力施行。二十三日樞密院奏重慶至荆南府二千里水站凡十四處其閒多闕站船若於夔府之下巴東之上巫山縣增立一站復以峽州白沙站移至下流黃牛廟前安置似爲便益。今蠻夷宣撫司郭漢傑言有亡宋養種戶三百乞斟酌撥充站戶臣等議得種田戶勿

與以鈔二百定與之。奉旨準。本院具呈中書給降鈔數。差官點視自敘州至荆南府各各水站除舊有一十九站。一千四百一十八戶。船一百二十九艘。外新增站夫六百八十二戶。船七十三艘。四川南道宣慰司領巫山縣一站。與荆湖北道宣慰司所領歸州萬流一站。總計二十一站。二千一百戶。船二百一十二艘。四月二十九日。御史大夫玉速鐵木兒。樞密副使朶兒朶海。僉樞密院事暗伯。中書省左丞耿仁等奏諸王阿只言舊站消乏。不能增新站物力。乞賜矜憫。依先例津濟。只令遞運租賦。上曰。彼處站赤乃茶合解兒所立。今朕增興物力。專令遞運租賦。除朕以急速事遣使外。不以是何昆弟使臣。此站勿得行。五月十七日。尙書何里。奏先嘗奉旨造海青牌。每一面或兩面造成。卽逐旋送上。一人不得納。須令兩人。蓋防盜之也。令大都中書省臣阿合馬等議。合無令因公差去之人就便附納。庶省鋪馬。取自聖裁。上曰。阿合馬之言是也。有誠實之人可就致之。不必特送。六月十六日。省部定擬下益都路等處。今後凡遇起運官物。令元發官司於差劄上。具押運官姓名所乘人物斤重。可用船車。防送人數預定起程。所至日期。行移前路官司驗憑。別無詐僞附帶。依數應付遞送。仍令經過去處。季申遞送車船。起數到部。七月二十九日。中書左丞耿仁。奏。汪左丞四川分省請給圓牌用備馳傳。奉旨準給。八月八日。尙書阿里。左丞耿仁等奏。隨路祇應官吏。數年以來。多有姦弊。侵盜官錢。臣等今議立法繩之。奉旨若曰。此乃卿等之職。

其自裁處之。閏八月中書省定議隨路站赤祇應奉聖旨。此乃中書所職之事。卿等處之二十四日都省遍行各路諸寺監宣慰司欽依施行。一中書省以下諸官司所差使臣。今後推故違慢。追陪元支。祇應治罪。一諸使不得將引家屬需求飲食及常行馬芻粟除軍務急速不拘程限餘事各計往迴幹辦公事。小大程期明書差劄令所過官司站赤辨驗其無故走死鋪馬或違限遷延行程多支祇應無省部許支文憑取要家人飲食常行馬芻粟者並勒陪償治罪。一諸驛擇有家業廉謹之人充站官月具支過省臺部院等來使分例起馬之數各因是何公事申報省部通政院及元差官府勘會。一除上都榆林迤北站赤外據隨路道元撥官錢不須支付驗其閑劇量增站戶協力自備首思當站。是月二十五日張右丞郝左丞等奏隨路管站官吏減剋使臣祇應多書文籍及冒破常行馬匹芻粟罪不勝紀臣等議令樞密院御史臺行省并諸官府凡差遣使臣逐月報省仍令驛站亦具數目兩各查勘其弊自見庶幾後人懼罪懲戒奉旨曰善其行之。九月通政院言東平路在城站連年死損站馬蓋因驅運重物損財破脊不堪騎乘合無定擬凡係解納沉重之物以舟車昇載似爲便益都省準呈仰依上施行。十一月通政院呈應運重物所在官司應付疾便腳力既費官錢和買又且騷擾車戶請區處事都省送兵部遇有合運官物驗緩急依例遞運施行。十九年正月中書省奏奉聖旨腹裏飛放騰房子人員可與

分例酒移文有司行之。都省欽依送兵部遍行合屬照會。三月二十一日脫鐵木兒刺真等奏自鴨池地經過塔兒八合你其道可以立站。奉旨準。都省欽依移咨雲南四川行省欽依施行。四月九日參知政事阿里奉聖旨朕聞拓跋之地多有持都省劄子而乘驛者。對曰豈惟拓跋諸官府皆然臣等凡以錢糧庶務遣使並乘鋪馬或與一二常川劄子者有之。行省給劄子來往者亦多有之上曰自行省來者聽之。今後中書勿與鋪馬文字給降聖旨可也。十九日又奉旨凡公差人齎去牌面聖旨回日不卽於該吏處繳納者有罪。該吏見而不拘者笞決。都省欽依施行。二十三日中書參知政事阿里奏江南省臺按察司宣慰司路府官署但凡遣使就給鋪馬劄子又使臣不食猪肉魚鷹鷄鴨等必須羊肉江南羊價每口計鈔七八十貫實害站赤奉旨可卽移文省諭毋令出給鋪馬劄子使臣到館有猪肉則與之無則與飯。其地必多魚亦可與之無則亦不必與至如羊肉鷺鳴飛禽等不得與之此二事速令截日罷去。

二十七日中書左丞耿仁參知政事阿里等奏先嘗奏旨謂省臣不當妄給僧人使臣鋪馬劄子於吐蕃來往數多騷擾百姓今驗於公文皆從功德使司傳奉聖旨給驛每恃上命趣行何敢不與上曰朕言尙有妄傳者何況都省文字卿言是也今後不得朕言慎勿與之五月二日中書左丞耿仁參知政事阿里等奏貴赤中有乃蠻解者今赴和林管課種田請給驛馬四匹奉聖旨可與之九月中書參政阿里

等奏準各處行省給降鋪馬聖旨五道。如本省有使在朝就令齋去無者遣使送致之。異時斟酌增給。
楊州行省。鄂州行省。泉州行省。隆興行省。占城行省。安西行省。四川行省。西夏行省。
甘州行省。每省五道內五匹。四匹。三匹。各一道。二匹。二道。二十二日樞密副使李羅。中書右丞劄散
奏邇者石宣慰言南方驗田糧及七十石者。準當站馬一匹。富人多有隱匿糧數。取貧下者副之。就執馬
役。請覆驗之。已嘗奉旨。若馬兀李溫公事畢時。與之議抄籍。今石宣慰請給鋪馬五匹以回。候馬兀李溫
至日議行。奉旨令回去者。九月十二日通政院言隨路站赤三五戶。共當正馬一匹。十三戶共車一轍。
自備一切什物公用。遞年以來多爲諸王公主及正宮太子位下頭目識認招收。或冒入投下戶計。未嘗
考究版籍。一概給據出役。曠離站赤復有省部行下或承令旨補換戶計。新者未得。舊役已除。三二年不
能勘會補完。以此站赤損弊漸不可支。今後乞擬換補站戶俟本院勘會事完已補。新戶入役然後舊戶
聽歸所屬相應都省準擬遍行爲例。二十四日四川行省言鴨池之地經由塔八合你而來。嘗奉上命
於道上立站從本省出馬。僉戶置納鄰小站近差成都府同知李庭筠雅州知州趙文貴相視其地。李庭
筠冒中瘴毒而死。從塔八合你至相公嶺一百六十里。三月爲始毒龍瘴氣生發。九月方息。犯之者致疾
以死。竊立站之後損傷使客又兼見差站戶皆是遠來貧民勢不可以久居。請議更革事通政院具奏。

奉旨。有煙瘴處勿住。何礙立站。欽此。回咨四川省施行訖。是月兵部言隨路驛舍冬無暖室。夏無涼所。飲食器皿牀榻鋪陳之屬。俱不整齊。不惟虛費官帑。當館者得以怠肆。擬令各路州縣長官。不妨本職專一提調。委按察司常切計點。若有似前怠慢者。責問任滿於解由。內開寫相沿交割。庶望稍成次序。仍令隨路出榜曉示使臣人員。不得因而騷擾。省準遍行爲例。十月中書省體知蒙古人員。因公在外經過去處。依例應付粥飯安宿。不與飲食安宿。劄付兵部遍行合屬。今後遇有隨朝蒙古人員。因公在外經過去處。依例應付粥飯安宿。房舍其人卻不得非理擾民。二十四日中書右丞相火魯火孫等奏。前者西川及甘州中興京兆泉州五處行省各降鋪馬聖旨五道。今來俱言數少。臣等定議西川京兆泉州三處繁劇。各增給十道。甘州中興各增五道。聖裁上從之。十一月二十九日中書右丞相火魯火孫奏。每年各路進獻果食藥品。今爲不給鋪馬劄子。無從給驛。以故不來。上曰。彼以諸物來貢。即是鋪馬顯驗。省部欽依施行。

站赤三（永樂大典卷一萬九千四百十八）

經世大典中統二十年二月十二日。中書省議近令民間應付過往怯薛解蒙古人員。粥飯安宿。今聞百姓仍舊不與。致有爭訟不便。再下兵部遍行合屬。丁寧省諭府州司縣。村坊道店人民。今後遇有怯薛解蒙古人員經過去處。依理應付粥飯。夜則止宿。毋致爭訟。如蒙古人毆漢人。不得還報立證。訴於有司。其違犯者。嚴行治罪施行。十五日丞相火魯火孫等奏。和林宣慰司答木丁乞降差使鋪馬聖旨。臣等議給二道奉旨準。三月二十一日中書省奏爲官之人考滿自來求仕。既已注授。則稱地遠皆請給驛。臣等集議似此一概準給。驛馬旣損。且不能遍給。宜定其制除西川福建兩廣遠地給以驛馬。此外勿從其請。奉旨此議是矣。從之。五月四日殿中侍御史沙的等奏。江淮行省官闢闢你敦言元降鋪馬聖旨數少。請增給事都省議。以起馬一疋。聖旨十道給之。又都省亦爲往來遣使繁多。乞增發起馬一疋。聖旨二十道。上可其奏。七月中書省劄付通政院議。各路站赤戶計自備。首思免其和買和顧。雜泛夫役。有無便益事。本院行據大都路良鄉等驛申站戶自改法應當雜役。官降首恩以來。困乏尤甚。蓋有司復令站官關錢祇待。不能應卒。往往假貸於民。使站赤重負逋息煩累官牘。理訴實繁。如將和顧和買鹽折草車。

牛丁匠社長主首行例等役。奏免仍令站戶自備驛使下馬日。首思似爲便益。通政院以爲大都上都站赤係天下之總。舊制官降首思。非他路之比。雲南。甘肅。陝西。四川等處。皆是邊遠。江南新附州郡。難同腹裏。合從行省官司。從長議擬。今權擬大都路一體自備。經過使臣下馬日。首思如各路站赤。委若祇應不前。合擬增戶。庶得官民兩便。是月二十四日。通政院使慤刺哈兒副使也只列。參議中書省事明里不花等。奏準聖旨。除免站戶和顧和買。一切雜泛差役。仍令自備首思。省部欽依遍行合屬照會。如使臣經過已支當日首思。次日以公務未行者。仰管民官司於年銷祇應錢內。依例應付。每季具站戶自備。及官支分例正從之數申報。十月二十二日。丞相火魯火孫。右丞阿難答等。奏奧魯赤挑河運糧令自海道以來。其餘官物。取東阿至御河。立陸站以致之。誠爲順便。上曰。御河朕曾見所議是也。又奏濟州迤南潭口站。徙於新開河邊魯橋鎮置立。使臣無急務者。從此一站令由水驛。則剩一馬站。又且直捷。上曰。是也。今從水站行者。十一月二十日。右丞相火魯火孫等奉準增給甘州行省鋪馬聖旨十道。通前共計二十道。是月彰德。真定等路。言閒有使臣乘長行馬到驛者。亦於站戶處支取當日下馬分例。伏慮未應合。無從官應付。省準。十二月五日。右丞相火魯火孫等奏揚州。荊湖。四川。福建行省。及四川轉運司分公司。湖南宣慰司。各言元降鋪馬聖旨不敷。請增給事。臣等議斟酌各處辦事之緩急。分增鋪馬聖旨三十五道。奉

旨準。江淮行省增給起馬一疋者五道。二疋者五道。四川行省增給起馬二疋者五道。一疋者五道。安西轉運司分司增給起馬二疋者一道。一疋者一道。荆湖行省所轄湖南宣慰司增給起馬二疋者一道。一疋者二道。福建行省增給起馬二疋者五道。三疋者五道。二十七日丞相火魯火孫等奏雲南隨站船運一切官物已設人夫今過往使臣卻令扛運駕馱人數不敷又於民閒起點乞目今除進呈上位官物諸王物令見設人夫般運外其餘使臣駕馱不得差起民夫奉聖旨是矣過往使臣勿令多將駕馱欽此。二十一年二月九日中書右丞相火魯火孫右丞麥朮丁奏軍前賞與孳畜去官合無乘驛或於斡脫見在馬疋內與之奉旨宜給驛馬令去。十日參議中書省事明里不花學士阿難答等奏準事理。一荆湖占城等處造舟運糧供給占城之役合增各官司鋪馬如左本省增起馬二疋劄子十道。荆湖北道宣慰司增起馬二疋劄子二道所轄路分一十六處每處增起馬一疋劄子二道總三十二道。荆湖北道澧州路辰州路沅州路靖州路河南道全州路衡州路道州路柳州路桂陽路永州路廣南西道邕州路肇慶路容州路橫州路海北海南道廉州路化州路一山東運司辦課甚重行鹽之地數千里及宣德府所合準備車駕納鉢北平王掃里各擬增給鋪馬山東運司增起馬一疋劄子二道河閒運司增起馬二疋劄子一道一疋劄子六道宣德府增起馬二疋劄子一道一疋劄子二道一江西等處

行省增給起馬一疋。劄子三道。二疋劄子二道。一福建行省所轄路分每處給降起馬一疋。劄子一道。二疋劄子一道。總計一十四道內一疋七道。二疋七道。興化路。泉州路。南劍路。建寧路。邵武路。汀州路。漳州路。一司農司掌隨路斷沒財產人口孳畜屯田供儲事甚繁重。擬給起馬二疋。劄子二道。一疋三道。一四川行省所轄順元路。宣慰司及思播兩處宣撫司擬給鋪馬順元路。宣慰司給起馬三疋。劄子一道。二疋劄子二道。思州播州兩處宣撫司各給起馬一疋。劄子二道。一都省增給起馬二疋。劄子十道。三疋劄子二十道。十七日通政院奏譯史阿散來自女直之地。據信站戶告言打捕鷹房官忽都魯者由川路回過本站見在之肉不食必需活羊烹之後來者若復倂此實難供給上曰此站何遇而與之今後見在有肉則與之與而不食雖水勿與可也。二十九日伯哈納塔魯忽禱楊同僉等奏昂吉兒言謂如頒降聖旨諸官具公服迎迓今使臣賚捧鋪馬聖旨所過未嘗具禮漢人南人得無輕視是皆阿合馬所使然也請更其制令省部臺院各出鋪馬文字給驛臣等議往時以濫乘鋪馬故罷除各衙門文字今復其舊於理不宜奉旨若曰非阿合馬之謀也朕實行之其諭昂吉兒令守口供職可也。四月陝西漢中道宣慰司言使臣分例內每員油鹽菜等支鈔一十文市易不敷乞增給事省部定議正使每員油鹽菜等日支增鈔二分通作三分遍行合屬照會施行。是月通政院言使臣分例乳酪柴炭灯油似無

定數。都省照得正使油、鹽菜等鈔數。每員增作三分。其首恩已有定例。如每月乳酪於分例酒肉內。準折應付。正使宿頓支米一升。麪一斤。羊肉一斤。酒一升。柴一束。油鹽雜支鈔三分。經過減半。從者每名支米一升。經過減半。閏五月。濟寧路言大清河漕運南糧。卻有行省所差押綱頭目。亦稱宣使。所過強需飲食。擾民不安。乞禁治事。省部議咨江淮行省。凡差押綱運糧。并乘長行馬足公幹之人。明給文憑。開具正從合支分例。仰過經官司依例應付。如無憑驗。妄需飲食。及馬足芻粟者。所在官司就便追究施行。是月御史臺言。內外官府出使人員。每至城邑。持威挾勢。頤指風生。一身而支分例二三名。或從者同正食。又或嗜味索饌。命妓縱酒。無所不至。會計祇應文籍。不過常制。蓋是有司委曲包容。袁民媚上。若上禁止。官民俱受其弊。今後莫若定擬內外大小出使人員。除正從外。不得多餘支取分例。及廣需精饌。計諸人告言。各道按察司嚴加體察。犯者抵盜官物罪。追陪元數。取與同坐。似望管站出使之人。各知懲戒。蠹弊可除。都省準呈定擬。今後遣使從本衙門定其正從之數。始自脫脫禾孫。及站官印署公文。遞報前站。依上祇應。如有多取者。職官具其姓名來上。餘人就追賞之。管站人員。亦不得過當應付。飾名虛破官錢。違錯。劄付御史臺。及遍行合屬照會。六月六日。襄陽路言。竊見雲南四川諸部蠻夷進獻馬足諸物。經過於內多有得代。及因事赴都官員。初無來歷文憑。詐冒需支飲食馬足芻粟。凌轢官府。動擾百姓。乞區處。

防禁事。都省議得今後遇有進呈之物。本處官司驗數斟酌。明書差劄關文。行移前路應付腳力遞運至交割之所。飲食草料。依例施行。下合屬照驗訖。十五日中書參知政事老哥尙書答失蠻等奏阿諦遠來朝現。自乘己馬到京。今馬已損弊。乞依信苴日例給鋪馬。其從者給鋪車而回。庶見優卹。奉旨準。八月二十九日中書右丞相火魯火孫等欽奉聖旨。諸城毋得與錢祇應使臣。皆爲站官所侵盜。來使二三人。或書作二三十。今後使臣止令站戶祇應。蓋物從己出。不致多支。若有諸侯王如減里干等來時明以官錢應付可也。九月十六日火魯火孫等奏乞給阿里海牙所治之省十道鋪馬。聖旨內起馬三疋者五道。二疋者五道。又所轄二處宣慰司。每處給起馬二疋劄子三道。上可其奏。十月四日火魯火孫等奏前者奉旨。今竇吉刺闢闢出二人。從脫歡太子出軍。令已至矣。若由己力而行竊恐遲悞。合無今同阿里海牙來使乘傳前去。其人有馬七疋。始置于此。卻令阿里海牙照數給與之。奉旨準。十二月十日丞相不魯迷失海牙。參政拜杭等奏火魯火孫在省之時。欽領鋪馬聖旨一百七十三道。因公給發一百五十八道未回。今及年終。見議差官疎決罪囚。復有其餘庶務。必伏鋪馬劄子馳驛。乞給發事。奉旨與之。二十五日中書參知政事撒的迷失帖木兒等奏鄂州行省言元頒鋪馬聖旨。內阿里海牙賚去者有之。以他事遣使者有之。伏慮分張不敷。請將起馬三疋劄子五道。回易一疋者五道。二疋者五道。上曰與之。

二十二年正月七日。樞密院副使吟答等奏諸侯王阿只吉言。請於別失八里立站以便使客來往。奏准。通政院欽依以是年立別失八里站赤。置馬六十疋。牛驢各二十五隻。歲支首思羊一百口。解渴酒一千五百升。各給價錢買備。仍與鈔六百錠。規運息錢以供後來之費。都省准擬。四月二日。中書右丞相不魯迷失海牙等奏。陝西行省并各處宣慰司。行工部等處。請給鋪馬二百三十二疋。從之。總給鋪馬二百三十二疋。計劄子一百二十六道。一陝西行省起馬五十四。計劄子一十九道。內五四者三道。四匹者二道。三四者四道。二疋者五道。一疋者五道。一各處宣慰司。每處起馬一十疋。計劄子七道。總計八處。起馬八十疋。劄子五十六道。甘肅宣慰司。成都路宣慰司。湖北道宣慰司。江西道宣慰司。浙西道宣慰司。燕南河北道宣慰司。河東山西道宣慰司。山東東西道宣慰司。一行工部每處起馬一十疋。計劄子七道。內二疋者三道。一疋者四道。總計三處。劄子二十一道。浙江行工部。江西行工部。荆湖行工部。一大司農司。起馬一十五疋。計劄子八道。內三疋者二道。二疋者三道。一疋者三道。一慶元都提舉暗都刺昔思之任。馬四疋。計劄子一道。一濟寧漕運司。起馬五疋。劄子四道。內二疋者一道。一疋者三道。一順元路宣慰司。增起馬三四。劄子三道。一上都畱守司。增起馬六匹。劄子六道。一遼陽道宣慰司。回易所收開元宣慰司。鋪馬四匹。劄子三道。內二疋者一道。一疋者二道。一雷州總管田任之任七十

餘里。以邊遠故。許起馬四匹。劄子一道。一玉速帖木兒大夫投下全州。達魯花赤禿忽魯等之任。鋪馬九匹。劄子二道。全州路達魯花赤禿忽魯。馬四疋。縣達魯花赤二員。馬五疋。一丞相相威江淮行省之任。馬十五疋。劄子一道。一董參政江淮行省之任。馬七疋。劄子一道。是月中書省準雲南諸路行中書省咨。中慶路申至元五年閒。前宣慰都元帥寶合丁。設立站赤時。將各戶合著差發。補買馬疋。所種地畝稅糧就充往來使臣人員祇應米麪杯酒。并鋪馬料粟等。自收自支用度。本省所轄路分民戶散漫。每歲差發課程數少。及有拖欠。不能盡實到官。卽目雲南王領兵征緬。所用軍需支持浩大。尙自不敷。緣腹裏站戶止免各戶差發。自備鋪馬。官給支應。合著地稅卻赴官倉送納。此閒站戶差稅除免自收自支。卽與腹裏事體不同。如準依舊。止令站戶將合納稅糧就充祇應。官民皆便。準此。撒里等奏奉聖旨準。中書省回咨雲南省欽依去訖。十一月六日。刺史奏在先赴雲南有二道。事不急者由水站。急者取道建都。今一切使臣皆往建都道。站中鋪馬十四二十四多者止三十四。使臣既多。站赤消乏。四州建都雲南站馬。乞增作五十六十七十四。差人前去措辦。奉聖旨準。十二月三日。中書參知政事禿魯花鐵木兒桑哥等奏。舊制遠方之任官員。許給鋪馬可否。乞聖裁。上曰。與之。二十三年四月四日。參政禿魯花鐵木兒奏。也先鐵木兒鐵木兒不花兩界。其閒烏蒙地可立站。一站用馬十五匹可也。奉旨立站。則是但肯從

其言立之乎。如何則可立可與共論之。是日中書省奏準事理。一福建東京兩行省各給兩牌二面。一奧魯赤出使交趾。先給圓牌二面。今再增二面於脫歡太子位下給發。一南京行省起馬三十匹。給圓牌二面。一那立三處宣慰司合給劄子起馬三十四匹。六月十二月中書平章政事阿必夫哈忽都等奏納速刺丁挈家之官請給鋪馬二十四匹奉旨與之。二十八日通政院奏邇者隨路拘刷驥馬。都省定擬令站戶每人存畱馬兩匹。餘者皆拘入官。一戶兩馬當站。竊恐不敷。臣與玉速鐵木兒等官議。每戶存馬三四匹。餘者入官。奉旨三四匹尙少。增之可也。對曰。今存四匹足矣。奉旨準。七月三日通政院奏大都上都兩路當站者。告言在先和顧和買。不料站戶止令自備飲餚。祇待使臣去年改定官給祇應。令站戶例當和顧買之役。有司又復欺隱官錢。全不支與。是以困乏。請從先例站戶出備祇應免和顧和買及其餘差役。庶得官民兩便。奉旨準。十三日御史大夫玉速鐵木兒中書平章政事忽都等奏和林宣慰司言諸侯王使臣經過者多請給祇應首思錢五千錠。奉旨勿與之食粥可也。八月二日江西行省遣宣使魏義翼等解寶鈔二十萬錠金銀諸物限九月終至都來咨已達。官物不到。部省移準行省咨該竊慮所過水陸途程。應付腳力遲滯。是致耽悞。既而魏義翼等押物赴官收貯外。省部議得各處行省宣慰司。每歲起納錢物數多。其經過官司爲無統攝。不卽應付腳力。停滯來使五七日方得起行。耽悞未便。遍

行合屬。今後如承前路官司公文遞運官物卽仰本處正官一員措備水陸車船隨時接運毋致畱難。如押運人員到部告言稽滯去處罪在當該正官首領官吏。九月十七日中書平章政事薛徵干左丞鐵木兒等奏前者省臣阿合馬等定擬邊遠官員憑省劄乘傳旣而火魯火孫奏給起馬聖旨今來議得劄子文字旣定其名比至回納恐不可復用莫若以省庫所存劄子一百道頒給遠方庶官於省劄書上其姓名將來回納劄子又可別給奉旨準十二月十一日中書左丞鐵木兒奏起補馬者已降給聖旨其從水驛乘舟者若例與聖旨竊恐太多宜令中書省移文起遣上從之十三日火兒赤塔里牙赤等奏闢關你敦今赴哈刺章行省請給鋪馬往者脫鐵木兒去時給馬三十四數涉太多乞與二十四匹奉旨準二十四年閏二月二十八日平章政事桑哥右丞阿魯渾撒里等奏前者八兒思赤烏馬兒來自河西務爲無驛傳奪乘民馬以此奏準聖旨議立站赤今乞令通政院官分撥鋪馬或十匹或二十四匹於河西務伺候不須立站上從之三月中書省會驗各處站赤鋪馬瘦弱司驛者不得其人館內鋪陳什物闕損祇應首思失悞蓋是已委正官意於提調以致此弊劄付兵部遍行合屬督責已委正官照依累行事理親行提調點視完備仍選信實之人當館從朝抵暮專一祇待使臣依例應付首思毋致除剋冒破仍令本道宣慰司卽便差官往來點勘如有失悞怠慢去處取提調官招伏關部呈省其餘人員就便斷罪。

四月二日。參知政事忻都等奏。先給尙書省鋪馬聖旨一百五十道。卽今發遣已盡。請增給一百五十道。奉旨準。遂給起馬五匹者五道。四匹者五道。三匹者三十道。二匹者五十道。一匹者六十道。十八日怯里馬赤阿散奏。腹裏州城軍民官。每日迎送往來使臣。曠失公事。合無令都省定擬。移文省諭。凡降聖旨至某處城邑開讀。其本處軍民官須令迎送。其餘往來經過免令迎送。似爲便益。聖旨若曰。諸使臣復令迎接見於公文者。書其姓名來上都省。欽依移咨各省施行。二十五日。尙書省定擬廩給司。久館使臣分例。令通政院兵部一同分揀起數。行移合屬。依例支給。廩給司支八起。一拜八千戶子母二人。一阿魯渾大王下使臣寄住馬。奉聖旨賜亡宋宮女朱熹熹等三人。及從者一名。一回回太醫也薛哈欽四人。一熬沙糖倒兀等二十七名。一海都大王位下小云赤二人。一蒙古生員三十名。一高麗公主下王俊等四十人。內親屬三十四口。驅六口。一賽因不花大王遺下唆郎哈真等四人。戶部支鹽糧五起。一織佛人匠李元傑等二十人。內大十五口。小五口。一回回礮手闊里吉思等八人。一太史院鄒子龍田惟詔等三十二人。一日本國引道人烏馬兒答刺冲近先等四十一人。一日本國引道葉茂盛等五人。分令各衙門區處八起。宣徽院二起。照御花園子例。一我種萋藤阿亦伯下刺真昔蘭等四人。一栽種沙糖的等八人。太醫院二起。一編修本草劉仲思正從各一名。

一編修本草潘嚴杜章王彬等三人。詹事院四起。除學生隸國子學外同本授下怯憐口。一學生蔣武子一名。一彈絃子八的魯四等四人。一繩人馬馬撒等五人。一繩人撒蠻答速等一百四十人。住支。一回回陰陽人阿倫一名。一開硬弓八里彎一名。是月濟州泗汶漕運司言催運南糧人員合給站船差劄二道事。通政院謂鋪馬站船卽係一體。合降御寶聖旨爲便。中書省照擬站船從省劄發遣。已有奏準定制。除依上出給站船差劄二道。各船一艘。仰發濟州泗汶漕運司收用施行。五月十一日省臣乘哥奏。面京豐州亦刺真站廢弛。有司請給鈔整治。臣等議得支錢買馬。豈不遲悞。乞從都省通政院差官前去西京於刷到馬羣內支六十四當站似爲便益。上從之。十二日尙書省奏大都館驛久畱使臣數多。請罷祇應。各與米糧奉旨準。都省欽依分別人數放支訖。十三日丞相乘哥奏揚州省忙古解。言徐州至揚州水馬站兩各分置。夏月水潦滿道鋪馬使臣勞苦。又因屯田修築堤堰凹洼。聚水之地甚多。請徙馬站附併水站一處安置。馳驛者白日馬行。夜則經由水路。況站戶皆是水濱居止者。庶幾官民兩便。可否取裁制可。七月二十四日參議中書省事阿散等奏。準應付雲南四川甘肅福建兩廣之任官員鋪馬。遍行照會。同日阿散復奏。尙書省平章政事乘哥言。中興路陝西行省廣東宣慰司沙不丁等官未給鋪馬。聖旨以是來請。臣等今議與之。奉旨準。沙不丁烏馬兒各給起馬二匹劄子二道。

一匹者二道。廣東市舶司一匹者五道。鳳翔府一匹者一道。中興路一匹者三道。十月六日。平章政事
藥哥等奏。去年和林宣慰司請給諸侯王使臣祇應錢五千錠。上命勿與。止令食粥。今北安王甘麻刺太
子大王駢馬復請祇應。奉旨勿與。之食粥可也。是月尙書省定議。高麗老公主下王僕以下親屬三十
三名。奴六口。內正十名。擬支羊肉五斤。其餘依元定減半。驗月日支付。親屬三十三名。日支總計羊肉五
斤。麪一十六斤半。粳米一斗六升半。柴一十六束半。鈔七錢。奴六口日支米六升。二十五年正月。兵部
據各路申近年以來。田禾不收。百物踴貴。及有刦立水陸站赤去處。祇應繁重。已撥額鈔不足支用。以致
科借於民。其呈都省照得腹裏路分年銷祇應錢不敷。已擬增作鈔七千一百六十九錠。至元二十三年
爲始。分上下半年預期關撥去訖。今據見申。既是元降額鈔七千一百六十九錠。委是不足祇應。今驗驛
程緩急。從新增鈔三千九百八十一錠。自今年爲始。周歲總定額中統鈔一萬一千一百五十錠。仍分上
下半年預期撥降合屬。從實銷用。年終通算。不得科借於民。總計三十八路。直隸省部四路。保定路周歲
額撥中統鈔八百錠。元額四百錠。今增四百錠。河閒路周歲額撥中統鈔七百錠。元額五百錠。今增二百
錠。平灤路周歲額撥中統鈔二百三十錠。元額一百八十錠。今增五十錠。隆興路周歲額撥中統鈔三百
五十錠。元額鈔三百錠。今增鈔五十錠。南京等路宣慰司所轄五路。南京路周歲額撥鈔九百錠。元額

鈔五百錠。今增鈔四百錠。河南府周歲額撥鈔一百三十錠。元額鈔一百一十五錠。今增一十五錠。歸德府周歲額撥中統鈔二百五十錠。元額鈔一百五十錠。今增一百錠。南陽府周歲額撥鈔一百二十錠。元額鈔一百錠。今增二十錠。襄陽路周歲額撥鈔七十錠。元額鈔五十錠。今增二十錠。燕南河北道宣慰司所轄九路。真定路周歲額撥鈔一千八百錠。元額鈔一千錠。今增八百錠。順德路周歲額撥鈔一百三十錠。元額鈔一百錠。今增三十錠。廣平路周歲額撥鈔一百五十錠。元額鈔一百錠。今增五十錠。彰州路周歲額撥鈔一百錠。元額鈔八十錠。今增八十錠。衛輝路周歲額撥鈔一百五十錠。元額鈔一百錠。今增五十錠。大名路周歲額撥鈔一百二十錠。元額鈔七十錠。今增五十錠。恩州周歲額撥鈔二十五錠。元額鈔一十九錠。今增六錠。懷孟路周歲額撥鈔七十五錠。元額鈔五十五錠。今增二十錠。冠州周歲額撥鈔四十錠。河東山西道宣慰司所轄三路。西京路周歲額撥鈔一千五百錠。元額鈔一千錠。今增五百錠。平陽路額撥鈔八百錠。元額鈔五百錠。今增三百錠。太原路周歲額撥鈔七百錠。元額鈔四百錠。今增三百錠。山東東西道宣慰司所轄一二十二路。東平路周歲額撥鈔二百錠。元額鈔一百五十錠。今增五十錠。濟寧路周歲額撥鈔二百錠。元額鈔一百二十錠。今增八十錠。益都路周歲額撥鈔一百七十錠。元額鈔一百五十錠。今增二十錠。濟南路周歲額撥鈔一百錠。元額鈔八十錠。今增二十錠。東昌路周歲額撥

鈔一百錠。元額鈔六十錠。今增四十錠。般陽路周歲額撥鈔五十錠。元額鈔四十錠。今增二十錠。濮陽周歲額撥鈔四十五錠。元額鈔三十錠。今增一十五錠。高唐州周歲額撥鈔三十錠。元額鈔二十五錠。今增五錠。德州周歲額撥鈔三十錠。元額鈔二十錠。今增一十錠。曹州周歲額撥鈔三十錠。泰安州周歲元額鈔三十錠。寧海州周歲元額鈔五錠。遼陽等處行尙書省所轄五路。東京路周歲額撥鈔一百八十錠。元額鈔一百三十錠。今增五十錠。北京路周歲額撥鈔八百錠。元額鈔五百錠。今增三百錠。安撫高麗總管府。周歲元額鈔三十錠。瀋州高麗總管府。周歲元額鈔一十五錠。遼東道宣慰司下開元路。周歲元額鈔二十五錠。二十五日。通政院奏阿藍哈述言中興府朵兒滅站。麻沙應去里也孫帖里溫五站。富戶爲鷹房捕獵官牧等戶。隱占者多已議差官追理。據合該補買馬匹。其見戶雖稱不費官錢。自可應當。緣五站倒斃鋪馬。計二百有五四。先例每年省降官錢補買。乞定擬。比及拘刷隱占站戶以來。預給價鈔補買。庶使站亦不致墮廢。上曰然可遣人去者都省通政使遣使與甘肅行省委官體覆各站。倒死鋪馬就於本省參政迷兒火者收買馬內應付二百五四。二月尙書省奏陝西行省言所屬道通哈刺章緬國亦奚不薛之地。諸王公主駢馬使臣經過頻數。馬多勞瘠。雖委各路官提調。而州縣無職此者。自今請擇一員兼董之。臣等議得各站遠離總管府者誠有之。合令州縣達魯花赤長官提調爲便。上曰可。是月

尙書省奏。畏吾兒撒里言。南方置立馬站。每十戶七十石苗稅者。出馬一匹。免其一切差稅。有司容私僉撥納糧一百石上下富戶以當站役。又或有一戶之稅八石九石而令當站赤。所有餘稅將以他役及之。往往倚稱站戶。因而辭避。轉及下民。是故富者愈富。貧者愈貧。乞立法選委廉幹更事之人。與各路正官一員。協心分揀。以糧七十石出馬一匹爲則。或十石之下。八九戶共之。或二三十石之上。兩三戶共之。惟求稅石僅足當站之數。不致多餘。卻免其一切雜泛差役。若有納糧百石之下。七十石之上。自請獨當站馬一匹者。收係爲便。如此似望江南賦役惟均。窮民不致失所。奉旨準。移文江淮行省通政院欽依施行。

五月十三日。丞相桑哥等奏。遼陽行省元降聖旨起馬二十匹。今言所屬地廣軍民事繁。請增給鋪馬事臣等議。增起馬二匹。劄子五道與之。奉旨準。是月尙書省參議哈散奏。江南站赤內軍民官託事止宿。以鋪馬芻粟飼養長行己馬。似此者多。上曰。不以何人。勿容安下。違者記名奏來。都省通政院遍行照會。六月。河東山西道宣慰司言。晉陽驛久畱使臣常食正從分例實費官錢。開具到各各起數請區處事。省部定議。令本役下官錢內自支應付。一王府官宋獨解等正六人。從五人。鋪馬十四。自至元十四年三月二十日到館。一管撒下等正二人。從一人。鋪馬三匹。自至元二十四年三月二十日到館。一閨興等正一名。從二名。鋪馬三匹。自至元二十五年四月十四日到館。一泰不花等正三名。從一名。鋪

馬四匹。自至元二十五年四月十六日到館。一脫忽撒等正二名從一名馬三四匹。自至元十三年到館。
一十三年。一塔察兒正一名鋪馬一匹。自至元二十年到館五年。一脫歡察兒正二名從一名鋪馬
三四匹。自至元二十五年二月十八日到館。十四日通政院奏塔兒解言曩者愛牙合赤位下千戶伸思
伯八叛。驛道不通。國使行遼坊州。始達其地。尋常計程不過三日。乃遲一月之久。是故軍政失悞。今一千
戶之叛者悉已降附。請以其民就便立站少則僉戶補之。未知可否。上曰。塔塔兒解之言是也。可令彼省
官同議立站事。通政院欽詳彼方叛擾方寧。難俾站戶自備牛馬。擬從官給價鈔和買應付。後有倒死。令
站戶補置都省準擬。十七日忽刺忽兒等奏今春爲馬站消乏。曾遣幹羅茶兒前去整點。反命果言站
戶餓死者眾。仰給富戶孳畜乳食。乞津濟物力。今議於闢里吉思城邑。支兩月口糧以濟飢者。其怯薛解
合添物力。依已前各千戶分揀窮乏例。差人給賜之。乞降聖旨宣諭事。上準都省劄付戶部放支訖。是
月兵部定擬平灤路行用庫副將引庫子赴省闢撥鈔本一千定合令本路應付鋪馬一匹。都省準旱。
七月尙書兵部會計各路祇應過諸王親行分例。內有續添人數亦支其食及不遵照宣徽院元定明文。
過餘應付鷄鴈蜜餗果木茶食等物。自保定迤南路分所支羊酒米麪諸物多於良鄉等驛。多破正從人
數。復有不同。呈奉省劄分例之外。多破正從支訖飲食擬就判置官吏追徵償官。是月中書平章政撤

里等。奏哈刺所轄汝州蠻官。自言歸順之後。歲書四川造船木板。至元二十一年。爲省官侵害。故關貢賦。今來願貢氈衫四百領。又四十六國阿樓落冒高州上羅計下羅計等蠻官皆言。每年共入氈衫四百領。各請給驛臣等議。氈衫八百。每歲輸納合應付鋪馬一匹。奉旨準。九月四日。廣東道宣慰司月的迷失。言撫州至潮州。經由汀梅徑道一千六百餘里。比之福建。近便七百五十餘里。若於汀梅徑道立站。官民利便。事行省謂福建江南廣東地。面已嘗差官約會。相視可立站亦去處。繪圖連咨請區處事。都省議得既經相視。汀梅徑道一十七處。準擬回咨。如委便當就於附近緩慢站內。量撥驛馬安置。若有不敷。差撥相應戶計充之。十一月福建行省言。本道地遠。庶官難於往復。雖給驛赴任。考滿回途。則以己馬長行。合無令沿路館驛。應付飲食芻粟。請矜恤區處事。十三百尙書省奏。準聖旨。欽依定議。任回官員人馬之數。咨福建行省。今後給憑書其官品人馬數目。所過城邑。每起止支正分例一名。餘給粥飯。仍應付長行馬芻粟如至所止。卽於所在官司繳納元憑解部。且如左方三品之上。正從不過五人。馬不過五匹。四品五品正從不過四人。馬不過四匹。六品至九品正從不過三人。馬不過三匹。令譯史通事宜使人等。正從不過二匹。十三日丞相桑哥奏。元給福建行省鋪馬聖旨二十四道。今爲遣使繁多。起馬不足。伏請增給起馬二匹。劄子六道。上從之。十九日丞相桑哥等奏。前者奏除暗普充和林宣慰副使。與哈刺幹脫赤。

共董廩粟之政。今言合用鋪馬。請給降聖旨。事臣等議興起馬二匹。劄子二道。一匹者二道。六匹者四道。可否取裁。上曰可。二十六年正月二十二日。丞相葉哥等奏。光祿寺合給鋪馬。今乞給發劄子一匹者三道。二匹者一道。與之奉旨準。二十八日通政院欽奉聖旨。咸平府至延立一十五站。本院官與塔出同赴尙書省會議。每站置馬二十四匹。給價和買。奏奉聖旨就令塔出安置之。都省移咨遼陽行省欽依施行。二月十六日。尙書省奏泉州至杭州。陸路遠。外國使客進獻奇異物貨。勞民負荷。鋪馬多死。今有知海道者。沿海鎮守言。蔡澤言。舊有二千水軍。合於海道起立水站遞運。免勞百姓。又可戢盜。可否取裁。上從之。事下江淮行省。欽依施行訖。是月中書省據御史臺呈。按察司官分輪巡按遍歷所管地面。如無馬站去處。就乘各州縣官員馬匹。依例更換。不得違悞。都省準擬。又台州路達魯花赤刺史言。江南之任官遊邇不侔。已罷乘驛之例。至於兩廣。福建。江西。湖南。浙東等處。遠者數千里。梯山航水。況谿谷之間。素無邸店。居民聞馬嘶。輒閉戶驚竄。不免宿於空屋。人馬飢困。或遇盜賊。輕則掠貲裝。重則致傷人命。今後乞令之任官員宿頓館驛。給賜人馬食粟。庶免盜賊之害。浙東海右道提刑按察司以其言遞聞。都省議得。今後應赴任之官徑之任所。自起程官司辦驗。各官新授宣勅。許於館驛安下。驗坐去品給實。有人口應付粥飯。仍行移前路官司。依上施行。已準給驛者。不在此例。遍行各路施行。三品不過五人。

四品五品不過四人。六品至九品不過三人。三月二十日。尙書阿難答等奏給海道連糧萬戶府鋪馬聖旨五道。起馬五匹。奉旨與之。四月二日。尙書阿難答奏。準事理。一四川紹慶路。給降鋪馬劄子二道。每道起馬一匹。一四川成都府。給降鋪馬劄子六道。內一道起馬三四匹。二道各起馬二匹。三道各起馬一匹。二十六日。平章阿魯渾撤里等奏。準事理。一龍興行省。起運米糧縑帛衣甲。及以軍情馳驛者多。增給鋪馬聖旨五道。起馬五疋。一太原府宣慰司。及儲峙提舉司所供新城靜州。及沙井軍糧公事。給驛實繁。擬給鋪馬聖旨二道。起馬二匹。五月五日。中書省議。擬整治站赤劄付兵部施行。如左。一樞密院札魯忽赤御史臺。及各處行省遣使給驛。比之都省起馬居多。今後量事省減。毋令多附行李。越次選馬。非急速事。不得馳驟。一常使并回程者。走損鋪馬。已嘗禁治。今後非軍情急務。馳騁鋪馬。損斃。仰驛官具姓名申上。以憑追究。仍分別回使之閑慢者。從水驛舟行。一管站人員。凡在官者。不得承攬站戶當役馬匹。取斂芻粟錢物。違者罪之。一路府州縣提調正官。及諸在官者。多以駕鋪馬足。換易站馬。致令人戶消乏。今後犯者。嚴行追斷。是月中書省標撥大都。成東北無主荒地五十六頃三十畝。付大都站以充鋪馬芻牧之地。又兵部尙書桑哥言。因公自良鄉站回還。據站官告稱。諸使臣到站。皆需羊肉。不食猪肉。倘不如命。動遭笞罰。稟奉都堂鈞旨。除隨朝出使人員。及諸王駙馬大官經過應

付羊肉。餘使各支猪肉。行移遍諭依上施行。六月三日丞相桑哥等奏李陵臺站赤官吏犯贓追鈔二百三十二錠合無就此錢令通政院給付本驛以供使臣祇應之用奉旨准。七月十二日都省所委官都漕運副使馬之真呈開臨清等處河道已通先於二十三年九月省委兵部員外郎添置宿遷呂梁沛縣濟州至東阿水站每一大站置五十料船五十艘遞運物貨遠者相去二百餘里兩大站之間又立二小站各置二三十料船六七艘遠者相去八九十里近者六七十里今新河已成擬將亭子站船一十七艘徙置固賢村東阿站船十艘徙置周家店西每處增三十料船二艘該一十戶五十料船五十艘每艘該七戶計三百五十戶二料號船總用三百六十戶及於清平縣界曲呂店西南立一小站置三十料船一十七艘徙臨清大小站船四十隻於草廟兒安置革罷臨清站車五輛六十五戶擇其近上者以充船戶就以官降車驢價鈔回易增置站船祇應起蓋館舍比及完備預將亭子東阿站船移於小固賢村周家店安置以應卒用開具改移添設水站地里船數請照詳事都省準擬與通政院差官下合屬撫按安置訖。八月二十八日尙書阿難答等奏準一給遼東宣慰司鋪馬聖旨五道各起馬一匹一給大理金齒宣慰司鋪馬聖旨四道內三道各起馬一匹一道起馬二匹是日阿難答參議中書省事阿散等奏遼陽行省闕少圓牌給驛請發兩面與之奉旨不須給今後但遵賚牌定制酌量公事地理隨數

起馬執憑印信省劄行之可也。九月二十五日尙書忽都答兒等奏準三事如左。一西京宣慰司至元二十三年已頒鋪馬聖旨。起馬一十五匹。今言闕少。擬增劄子五道。各起馬一匹。一江淮行省所轄浙東道宣慰司。增給劄子三道。各起馬一匹。一江淮行省所轄紹興路總管府。給降鋪馬劄子二道。各起馬一匹。是日又奏甘肅行省所轄亦集乃總管府沙州肅州三路遣使頻繁。未給鋪馬聖旨圓牌。今乞給鋪馬劄子六道。各起馬一匹。圓牌不須應付。奉旨準。十月尙書兵部查照至元四年各路報到宿頓。使臣用過分例數內有規運本投下官錢。并醫工校尉還家取妻孥。僧道降香抄化及賚遠年文憑之類。其有本投下催取稅租使臣人員卽係公差。合無準算。或止準正三二名餘皆準作粥飯。具呈照詳。都省議得此等已支數目難以準算。其各投下公差人員支訖分例依準本部所擬。止準正三二名餘皆准作粥飯。今後諸王令旨公差乘坐長行馬使臣每起應付正一名從不過二名。行移合屬照會施行。十一月二十一日丞相桑哥等奏遠方赴任例給鋪馬聖旨。卽今差遣實繁。劄子闕少。乞預書起馬二匹。劄子二十五道。三匹劄子二十五道。以備給發邊遠赴任官員之用。奉旨準。是日丞相桑哥等奉準增給甘肅行省鋪馬聖旨七道。各起馬一匹。十二月兵部據秦王府典食司言爲管領河南等路打捕鷹房魚泊水陸地土山場洞冶提舉王興所辦精饌。襄猪魚鮓馬鞍鷹鵠等物。啓奉按攤不花太子令旨令河

南宣慰司依例應付鋪馬。本司照得至元二十二年二月。王興進納本位下物色。已經陝西漢中道宣慰司。下南京路應付起運。今請依例事。本部照得河南等路宣慰司。至陝西地里別無站車。但凡遞運腳力。必須支用官錢。況至元十四年二十五年。運物腳錢。卷內又無應付過王興運物腳力。呈奉都省定擬令本位下提領人員。自備起運。移河南等路宣慰司照驗施行。是年帖里干亦乞列速哥察兒。以至哈兒撒脫坤等。二十七站消乏。通政院呈擬每站增馬十疋。和買達達車十輛。都省準擬給散乞。達達車八百一十輛。該價錢中統鈔四百五十一錠。二十二兩。馬二百七十四匹。又濟寧路申站戶丁哇兒元係軍丁事。初丁哇兒父丁善。係濱州濱縣民籍。戊午年僉充正軍以張文貼役。己未年丁善年老子幼。盡以田產孳畜付於張文爲主當軍。哇兒未嘗津貼錢物。至元元年丁哇兒徙居魚臺縣。七年收作見戶當差。十二年僉充胡陵村站役。不謂張文於至元八年。收繫哇兒姓名入於軍籍。兵部議得張文旣承丁善物業當軍。其子丁哇兒又經別籍僉充站戶。兩無所事。合準已籍爲定。各當軍站都省準擬遍行合屬照會。二十七年正月十日。通政院按圖呈奏南京至正陽站。杞縣睢州等四十站。中牟鄭州等四站。唐州鄧州等四站。一歲之間。除按察司巡歷刷卷過者一二。餘無使臣往來。令乞罷去。增置南京至蔡州站車。卻以剩餘站戶馬匹。撥付東面水站添辦站船。似爲便益。奉旨是矣。其從之中書委官將革罷馬站二千五百二

十六戶增撥入歸德等處水站。汴梁等車站入役外。有餘戶六百二十五戶收係爲民。十二日丞相桑哥。平章政事鐵木兒等奏陝西行省近爲運輸甘州糧儲和買馬匹等事。給驛實繁。請增起馬聖旨一道。臣等以爲所請太多。乞鄰劄子五道。各起馬一匹。奉旨準。二月六日參政阿散等奏都省遣使實多鋪馬。劄子闕少。請增起馬聖旨一百五十道。內一百道各起馬一匹。五十道各起馬二疋。上從之。十二日尙書阿難答。參議阿散等奏準增給江淮行省鋪馬聖旨一十五道。內十道各起馬一疋。五道各起馬二疋。三月廿肅行省言。請於困塔蘭之地。暫置腰站。和買駱駒三十隻。馬二十四。接應走遞。都省準擬回咨施行。四月四川行省備右丞耶律禿滿答兒言。竊見烏蒙迤北土獠。水道險惡。覆壞船隻。黎雅站道。烟瘴生發。所過使臣艱難。人馬死損。本省南接雲南所管普安路。見立馬站。東建辰沅靖州站。已嘗令總把孟泉直抵雲南湖廣兩省立站地界。相視得普安路迤東羅殿貴州葛龍。俱係歸附蠻夷。隸屬四川省管下。可以安立四站。接連湖廣省所轄新添地面。安立一站。至黃平鎮。遠通辰沅靖州。常行站道。以達江陵路。觀其山勢少通。道徑平穩。又係出馬去處。比之黎雅烏蒙驛路。捷近二千餘里。如將雲南站道改由江陵路通行。若有綱運輶重物貨。依舊於烏蒙水站遞送四川站赤。稍得甦息。卻以黎雅等處罷閑鋪馬五百餘匹。站戶一萬五千餘丁。屯田納糧。或充鹽夫辦課。誠爲便益。二十七日中書參政刺真。參議

哈答等具奏且乞遣使詣雲南湖廣行省。詳度可否。然後施行。奉聖旨準。都省欽依遣使詣各省會議去訖。六月二十四日。丞相桑哥等奏僧哥必刺蠻二人。泉州得希奇物貨進獻。有司不給鋪馬。以是來請。臣等議乞進送物貨。從本處官司斟酌頭匹遞運。移文遵守。奉旨準。三十日參議阿散等奏見立營田提舉司管領江南僧寺錢糧事。凡有遣使必須乘驛。請給鋪馬聖旨二道。各起馬一匹。奉旨準。七月通政院言出使人員到站。非理撻辱站官頭目人等。致令懼避。因而遲誤。擬令使臣到站。站官失悞鋪馬首。思取招呈省申院科罪。無故不得箋撻站官。仍鈐東管站人員。常切在站祇應行省路分。就便行移禁約。都省準擬遍行。八月一日遼陽行省所轄澄州站戶李小三。金龍伊。自言貧乏不堪當役。有司移準按察司體覆相同。行省議於相應戶內補換。都省送兵部議得既經憲司體覆。宜準行省所擬僉戶補換。令李小三等爲民當差。都省從之。是日尙書阿難答。參議阿散等奏陝西行省言前者委田忙古解提調採取斗子鹽。歲進一千斤來上。所執駄鹽鋪馬一十三匹。聖旨上書其姓名。今田忙古解以罪被黜。而按禿俺卜實代之。比及運鹽起朝。請更名區處事。臣等議得田忙古解既有罪。按禿俺卜二人名字合換聖旨。使之運送相應。上從之。又奏甘肅行省言甘州兩經抄籍。站戶計一千六百戶。中統元年直渾都海軍興逃散。及僉充禿魯花卉僧人諸色隱占外。實有一百六十二戶當站。竊見斡魯思納憐胭脂城三處。

俱係邊遠沙磧之地。卽日遞運軍器米糧數多。請照寧夏府伯伯阿立八卽奏準定制。將各授下及諸人隱占站戶回付當站似望官事協濟。奉旨若曰。前者朕令傳命收拾已行文書問於屬吏可知矣。都省欽遵移文施行訖。又奏真定路管祇應首思人崔祐。告言因公借訖民錢六千四百七十八錠。穀四萬三千五百三十五石。應付祇待不蒙上司給付以致鬻產償納猶且不敷去年上位御幹魯朵北王甸中其人告奉聖旨。中書省果無錢令桑哥與之。今中書議真定路官吏百姓逋負係官錢糧頗多。又是阿合馬當國時所行事他路似此借貸錢糧皆無回與之例。若擬回付恐有倣效。又況錢物數多不支爲愈。奉旨物回與之。十七日尙書阿難答都事別不花等奏平章沙不丁上言今年三月奉旨遣兀魯解阿必失呵火者取道馬八兒往阿魯渾大王位下同行一百六十人內九十人已支分例餘七十人聞是諸官所贈遺及買得者乞不給分例口糧奉旨勿與之。九月都省議下通政院行移各道宣慰司總管府令提調正官親詣各驛整點馬匹須要肥壯鞍轡苦氈繩索館舍陳設並須完備有不如法或失悞驛傳祇待騷擾站赤者當該及提調官吏皆有罪。十一日丞相桑哥等奏江淮省所轄徽州路水道不通合給鋪馬走遞請降聖旨二道各起馬一匹奉旨準。十一月十一日丞相桑哥等奏闊里吉思投下軍士於真定府飛放徵取站赤飲食芻粟撒里奏奉聖旨拘執前來食訖之物勒其償納今其人合無發還闊里思

投下。奉旨陪償之後。可諭闢里吉思知之。十二月二十六日。丞相桑哥等奏。只兒哈忽言前年秋以忙
吉兒禿之掃里牧地。給佃歲賦粟麥四百二十石。今彼處站赤人馬闕乏糧斛。請以所賦地租與之上準
奏。

站赤 四（永樂大典卷一萬九千四百十九）

經世大典至元二十八年三月十七日。雲南行省言中慶經由羅羅斯通接成都陸路。見立納憐等二十四站。其相公嶺雪山。大渡河。毒龍瘴氣金沙江烟嵐。自建都武定等路分立站赤。夏月人馬不能安止。中慶至烏蒙路。結吉舊路。陸站一十一所。山路修阻。泥潦難行。業稍填水至敍州四站。江河險惡。舡隻不可進。本省差官歷視得中慶。由必畔至烏蒙結吉站路平且近。可設七站。預爲措置定立。外土獠蠻道通烏蒙路地。面華帖蠻井必撒老雅乙抹。分立陸路四站。又接連敍州管下慶符縣合立陸路一站。無問冬夏使臣馳驛前來。雲南別無煙瘴險阻。比之納憐舊站便捷多矣。俟開通之後。卻將大渡河羅羅斯舊立納憐站亦約量存畱。實是便益。得此都省照得二十七年。四川省右丞耶律禿滿答兒所言之事。併令撒里蠻刺臣等官按圖呈奏。前事奉旨若曰。旣圖中道路便益。可依所議安立之。都省欽依移咨各省施行。

是月江淮行省備行泉州司言。蔡澤始陳海道立站。摘撥水軍招募。稍綻差設頭目。準備每歲下番使臣。進貢希奇物貨。及巡捕盜賊。且省陸路遞送之勞。以此奏準設置。今本省再令知海道人慶元路總管府海船萬戶張文虎。講究得下番使臣進貢物貨。蓋不常有一歲之間。唯六七月可以順行。餘月風信不便。

莫若將福建海站船隻。撥隸本處管軍萬戶府。其在浙東者。隸於沿海管軍上萬戶提調。聽令從長區處。以遠就近。屯住兵船。遇有使客進貢物貨。自泉州發舶。上下接遞。以致杭州常加整治。頭目軍器兵仗船舶。於沿海等處。巡邏寇盜。防護商民。暇日守鎮陸地。俱無防礙。公私順便。所據海站不須設置。都省準擬奏奉聖旨。令罷去之。又山東東西道宣慰司。呈乞禁治出使人員。於不設站亦去處。換乘鋪馬。取要祇應事。都省準呈。送刑部遍行。若出使人員於不設站亦去處。經行無得應付馬匹飲食。如違。卽仰具名來上。以憑科罪。二十五日。尙書省定擬見欽奉詔書內一款。差出使臣飲食。已有定到分例。在前官司給降錢數不足。其閒官吏又有剋除。致令社長大戶輸番祇待。百姓深以爲苦。今後合該鈔數以時從實給放。毋得斂及百姓。欽此。除至元二十八年。春夏二季鈔五千五十錠已支外。今續支申統鈔五千五十錠。照依坐去事理施行。

一見發鈔數。驗驛程綏劇均散。毋致剋減。比及支盡。預期申請。不得科斂於民。

祇應合用諸物。預須趁時準備。務省官錢。一司祇應者。月報元收已支之數。若有不應。卽勒當該人償官。一司祇應者。多餘破用。及使臣橫取者。具名申上司區處。仍從按察司糾彈。一支銷之外。見在數目。從本路正官常加檢照。五月十七日。中書平章政事麥朮丁忽木等奏。近除朵兒亦爲甘肅行省左丞。本官自福建遣人乘驛先期而來。附駄至元鈔三百錠。爲東平府脫脫禾孫拘糾。何以處之。取自望

裁。奉旨可令回與。是月兵部呈保定路至元二十四年二十五年二十六年祇應錢糧借支民閒鈔三千三百六十錠三十兩五錢。粟二百六十五石二斗六升一合。草三千三十九束。未曾撥降給主事都省議得隨路亦有自此錢糧俱不撥降送兵部照會。六月漢中道按察司言延州緩德州米脂獲州神木府谷縣等俱非驛程亦無站赤祇應其往來使臣不由驛路取徑經過威逼官司取給鋪馬分例站戶因而消乏所合禁約使臣今後毋令於僻路州縣經過庶望官吏無擾人戶稍安臺省準擬遍行禁約訖。是月監察御史察知昌平等站濫設站官百戶司吏提控總把庫子等人御史臺呈省區處禁革都省議得隨處站官擬設二員大都至上都置司吏三名餘設二名祇應頭目攢典各一名站戶及百者設百戶一名俱要詢眾公選廉慎行止不過犯相應人員補充其餘濫設人數截日悉革爲例遍行訖。七月二十一日通政院奏隨路站赤雖令達魯花赤總管府專一提調而州府司縣官司又復椿配站戶和雇和買雜泛差役比之民戶尤甚騷擾莫若令路府州縣達魯花赤長官依軍戶體例兼管站赤與魯非奉通政院明文不得擅科差役任滿俱解申院似望管民官撫安站戶奉聖旨所言誠善其行之具呈都省欽依遍行訖。二十四日通政院言肅州站赤係邊遠之地比年田禾不收應役頻併請除站戶和雇和買雜泛差役都省議得和雇和買已有定例雜泛差役毋令科配送兵部行移合屬照會二十五日中書

省據御史臺呈體知雲南行尚書省見欽領差使鋪馬御寶聖旨三十七道該馬一百二十九匹又敬領雲南王令旨一百七十道馬二百九十五匹通計馬四百二十四匹數多若不呈納雲南行省往往差遣任滿罷閑求嗣官員因幹私已勾當指稱別項差使濫給鋪馬起數以致各處站赤鋪馬祇應生受得此都省議得除元降差使鋪馬外據雲南王令旨擬合拘收移咨雲南行省拘收去訖是月徐邳州脫脫禾孫言朝省諸衙門遣使乘驛多裝行李若有私己物貨未敢驗視通政院定擬今後各處行省凡有起運諸物於押運官差劄內明白開寫起運物色囊橐數目似望防禁私弊易爲盤驗者省準擬遍行訖八月二十五日刑部呈差奏差赴檀州審囚乘常行馬匹關兵部應付飲食本部以爲別無呈準都省明文難卽區緣遣使宿頓合用粥食理宜應付庶免稽滯乞照驗都省送兵部行移各部若有必合公差人員呈稟以行是月通政院奉省劄兵部呈擬大都站戶自備首思卽與關撥係官祇應錢糧站赤上下承接合通行照算事都省議得既是站戶自備首思本部不須會計令通政院移文各站但凡祇應使臣置歷書計本院嚴加檢察毋致頭目人等多科侵貸作弊違者究治又通政院言大都站戶自備首思合無從本院會計都省議得站戶自備首思不須理算但令置籍附寫從本院檢察頭目人等毋得多取侵借九月十五日中書平章政事忽木等奏也先鐵木兒言黃河東南站赤四五戶共備一馬黃

河西北安西府等處。每一戶養馬四五匹。誠有偏負。歷年既久。人戶苦之。請依例增戶免致站赤墮廢。臣以爲在先立站。不知如何區處。合無差官與陝西省官覆實分揀定擬整治之方。至日別奏奉旨準。且曰站赤毋令斷絕可也。二十日月兒魯李羅解哈答暗伯奏奉聖旨令中書省官定擬於乞里吉思以至外刺之地。起立六站。數內乞里吉法帖烈因禿惠哈那思外刺四處各設一站。兀兒速設二站。每站各置驅馬三十四匹。牝馬一十四匹。羊五十口。今該價錢與之中書省欽遵移文通政院兵部施行。二十三日中書省據御史臺呈。陝西漢中道提刑按察司僉事暢師文言體知諸官府出使興元人員多係土居營構。馳驛到家託故逗留。遷延歲月。每日支取正從分例。羈繫鋪馬。彼旣貪冒無恥。所司又不究劾。濫用年銷官錢。有違諸路通例。今後凡有此等出使人員。本處有家不居館驛者。止合支下馬祇應。次日不須應付。如或過取濫給。追陪還官。日會不足。歲計有餘。亦省費節用之一端也。緣干諸路爲例事理。遞聞于朝。請區處事都省準擬劄付兵部遍行合屬依上施行。十月五日丞相完澤平章政事忽木奏江淮行省言行泉州司見收圓牌二面。復有鋪馬聖旨合無拘減圓牌奉旨拘收可也。是月尙書工部呈擬。今後隨路提舉使副正官每季押運段匹等物乘驛馬二匹。下次人員依先例給降一匹。省部議得各路局院起納段匹雜造軍器等物。旣令局院提舉使副正官每季親押前來合給鋪馬二匹。若差下次頭目人員。

依例給降一匹。行移合屬依上施行。十二月二十九日。丞相完澤等奏。準增給省除之任官鋪馬聖旨三百五十道。二十九年正月七日。中書省奏。福建宣慰司官高興言。本道每年遞運泉州貢賦。及外國來使赴上。皆仰民力。綱運重勞苦之。今沿途逃亡之屋甚多。良可哀憫。竊詳遠邇職貢驛傳爲先。請於建寧路建陽縣。崇安縣各立馬站一所。迤邐至鉛山州車盤站。至汭口下船直至大都。每處用夫二百五十人。所以放罷亡宋運銅錢。及鋪兵充站夫。又於福州懷安縣水口南劍。各置水站以達建寧。似望官民便益。奉旨若曰。亦黑迷失沙不丁曾至其地。可再問之。都省欽依。詢於亦黑迷失沙不丁。皆以爲便。差官與江浙福建行省從宜設置。差擬人夫。比之西路饒州等處驛道。計省五站。且近七百餘里。十五日通政院言。先爲衛輝。大名。彰德三路。站船數多。運物繁多。船弊畜喪。站戶貧困。擬合每站增作站船三十艘。於當差相應戶內僉撥站戶。或將火失不花取勘罷閑車站戶內。擇其有物力者以應前役。呈奉都省劄付。照得車站戶今歲科出中統鈔三十兩。津貼消乏站赤外。從本院區處今奉聖旨準行。若於汴梁等處。取勘到車站戶內。取其可役者以充水站戶。官爲計置站舟驢畜。後有損弊。卻令修補相應。兵部從之。都省定擬牽船驢畜。令站戶買備。全免今歲已科津貼鈔數。餘準部擬。大名路元設船一十五艘。今增五十料船一十五艘。撥站戶一百五戶。彰德路元置船一十艘。量增七十料船一十艘。用戶一百戶。五十料

船一十艘。用戶七十戶。衛輝路元設船二十艘。本驛係御河上源淺窄。擬增三十料船二十艘。用戶五十戶。又五十料船一十艘。用戶七十戶。三月二日。中書平章政事忽木。參議暗都刺等奏通政院言整理江南站赤。合立行院。臣等議謂不須別立官署。從通政院分官四員於四省整理。各絡印一顆。於事爲宜。上從之。是日又奏大都至。上都沿途站赤消乏。及東平府之地常役一萬餘戶。置立車站。在後開河遞運車站罷去。今歇役之戶約八千餘。合令出備物力津濟河閒保定以北。上都以南站赤。如此整治。庶幾便益。奉聖旨準。十四日平章政事忽木等奏真定路管祇應漢人崔姓者。累嘗經御告言阿合馬。當朝之時。於民間借貸鈔六千四百八錠。粟四萬三千五百三十五石。以充祇應。乞回給事。前者省官不準回付。臣等議得阿合馬在政時。各路似此借支者多。虛實難信。在後桑哥居省忻都等打算有理無理。袁取民財不可數計。今若準給此一路借過錢糧。則援例者多矣。不與爲便。奉旨可回諭其人。十七日中書丞相完澤等奏邇者令江南造舟至御河運糧。舟雖增而輓漕者少。復有南人在內。每歲陪償折耗官糧。窘乏莫甚。若釋之。以東平府所罷車站戶內近河家居者。二千戶供牽船之役爲便。上從之。二十一日中書參知政事暗都刺等奏。南京來言錢糧之廣。揚州爲最。請自本處至淮西立十站。又至歸德府立兩站。河南府立三站。以便輸運。臣等議得淮西立十站用民實多。未易輕舉。歸德河南則當置

立。取自聖裁。上從之。四月御史臺備燕南廉訪司言東平路驛傳至元二十八年官撥中統鈔二百錠。祇應不敷。以致借貸錢物。今年二月將終。猶未支除。本路正當南北衝要。所轄水陸七站。使臣絡驛。祇應實繁。官不支錢。何以爲具。況司縣官吏俸祿微薄。已且不贍。焉可給人。賒借之弊。因不能革。看詳年稍祇應錢。自省部撥降以至宣慰司路府州縣循給而下。轉發勘合放支。往往愆期。不及於用。今後莫若令各路就於課程錢內際畱。謂如至元三十年合撥官錢於二十九年冬季課鈔內際畱。發付有司買辦銷用。有餘則準下年見在之數。果若不敷。先斯申請。如此庶使更安其職。民樂其業。乞明降事。都省準擬。自至元三十年爲始。依上施行。五月十六日中書平章政事刺真忽木奏黃河迤南站赤三四戶養馬一匹。而京兆之地一戶養馬三四匹。爲役不均。宜加整理。蓋嘗體究京兆立站之始。與他方不同。每地一頃爲一分。一丁亦爲一分。總十四分。當站馬一匹。庶幾得中奉聖旨準。六月四日濟寧路差委朵魯赤赴都呈稟綾樣。爲元降鋪馬聖旨。他使賚捧未回。輒給差劄於本府驛內起馬一匹。令朵魯赤前來通政院爲有定制。諸官府不得就出劄子。遣使馳驛。濟寧路卽是違錯。除究治外。定擬今後似此擅給差劄騎坐鋪馬。必令遍行禁治。都省準擬送兵部施行。是月中書省委瀋州高麗總管府蒙古敎授明安答兒管押劄紙入站遞運赴遼陽等處行省交納。令兵部行移。

應付沿途粥飯以行。閏六月二十日通政院官平章刺真同知通政院事韓羅司等奏曩者以雲州獨石站道遙遠冬月人馬因乏奉旨於兩道之中增置一驛令中書省臣議先攻襄陽時取保定至大名路逕道立一十四站混一以來前站已廢若以此罷閑站戶於雲州至獨石中閒設置一站餘戶增撥入真定至大都消乏站亦允爲便益奉聖旨準是月中書兵部照得隨路遞運官物官支腳價近年戶部考校得運物斤重與鄰接路分所報多寡不同其始如二萬斤終增至三五萬斤者有之或押運附帶已物各官司作弊者有之將欲究竟反滯於事乞定擬隨處遞運官物自始發處正官一員對物權其輕重申命總府佐二官復實封印然後和履腳力支價運行關報前路及押運官差劄各書諸物斤重稱盤體覆官姓名若相接官司覆出多少罪其初委之官仍追多破少支錢數還官給主其實用價鈔每季備抄文憑申除如此非惟除弊事實便宜都省準擬遍行合屬依上施行七月中書刑部呈戶部高奏差殿擊昌平站供馬人王迺等又奏差楊德秀走死站馬一匹事除殿傷罪已追斷外議得楊德秀元乘鋪馬已回至站於四月二日五更方死似難追陪都省準呈爲例施行八月二十七日丞相完澤平章政事刺真奏濶來路今改爲般陽路元給起馬兩匹聖旨宜易郡名而與之奉聖旨倒換與之可也九月懷孟路言遞運官物車戶腳力官價不敷資費切照本路至衛輝路清河唐村馬頭二百七十餘里官有水站。

私通客旅。今後若將寶鈔金銀縑帛及急需錢物從陸程和雇腳力起行。每歲合起驛重物貨。卻自陸程以至衛輝清河站船接遞赴上。可省官錢八百餘錠。官民兩便。省部准擬下合屬依上施行。十月二十八日中書右丞相火魯火孫等奏江南漕運官物以無驛傳故奪民船車不便。合將官有船車修理立水陸站赤官民兩便。上從之。是月遼陽行省咨慶雲至哈里賓之地。酌量可立二十八驛。每驛用三十戶。每戶官給馬一匹。牛二隻。計用八百四十戶。除用舊戶外。尙少一百四戶。請區處事都省議得鋪馬不須制備。但每站用戶二十鋪。牛三十隻。漢車五輛以充遞運。自水達達八站三萬戶。以至哈里賓之界。別列怯里舊站三萬戶。以至女直接境。又自女直經行道上。各令計程置立。奏准聖旨。回咨遼陽行省放支牛價。欽依起立去訖。十一月御史臺呈江東建康道肅政廉訪司言宣慰司別無鋪馬聖旨差官乘驛。今後除進上有顯驗物色。欽依聖旨。事意施行外。其餘出使人員。合令欽賚聖旨乘驛相應。都省准呈遍行照會。是月通政院言至元二十年七月二十四日。二十三年十一月四日。二次奏奉聖旨。站戶自備首恩。除免和雇和買一切差役。今又欽奉聖旨。節該百姓消乏。其和雇和買不分軍站民戶。並令均當。切照站戶既備首恩。又當和雇和買差役。委涉重復。請區處事都省議得大都上都站戶多係迤南路分僉撥前來當役。相去窩遠。供給頻勞。擬依先降聖旨令站戶自備首恩。除免和雇和買一切雜泛差役。行移合

屬照會依上施行。十二月六日丞相完澤等奏東京路今改爲遼陽路其元降起馬一匹聖旨兩道宜易郡名而與之奉旨准。二十二日丞相完澤等奏樂實掌蒞站赤無問是否濫給鋪馬問之則言見收令旨四道各起馬一十五匹況復總管府及治下兩處官員軍官奧魯官等皆有鋪馬令旨似此准憑各投下大王附馬所行是致站赤消乏臣請與月兒魯撤里蠻答失蠻等共議定額奉旨若曰誠是也前者亦嘗言此馬速忽置而不舉今可爲之定論。三十年正月十日丞相完澤等奏去年南丹洞蠻來朝已立安撫司於其地今省官笞刺罕等言彼中往復辦集官事合給使臣鋪馬聖旨臣等議與聖旨二道各准起馬一匹奉旨准。二十三日中書省奏昨曾奉旨肇州至豪懿州置立站赤今臣等議於其地分置七驛每驛備遞運牛五十隻委伯帖木兒司之候至今秋買備上從之。三月五日平章政事帖哥等奏兩淮都轉運鹽使司言所轄出鹽地廣乞增十四鋪馬聖旨臣等議乞減半給降奉旨準。十二日通政院言比因遣使至雲州取馬於龍門口赤城站參詳今後馳驛使臣出離站道幹辦官事宜令所過州縣應付馬匹都省定議馳驛人員以公事遠背站道者所過州縣換馬送兵部行移通政院照會施行。四月十三日中書平章政事不忽木參知政事暗都刺等奏雲南行臺言自哈刺章建都之地來者一從本處驛道一自禿獠蠻境二者烟瘴遠險惟烏撒芒部有一徑道近可千餘里旣無瘴毒又皆坦途往者爲

其民植茶三百里。且有兜頑爲亂。故不之知。今已安靜。請改設站赤臣等議謂便益之事宜從其請。奉旨若曰。斯言至矣。其從之。是月監察御史言河南府湖城站駄運葡萄酒實爲正馬六十二疋。押運官及行李兀刺赤等復乘馬四十九匹。通計一百一十一匹。蓋因元發官司不謹其初。致令多冒夾帶。若定擬今後合起物貨斤重數目。封記發遣。明見於文約。量起馬所過從脫脫禾孫檢視相沿給傳。兀刺赤徒步以從。如盤獲過餘物貨。追沒入官。押運人與初發官司各有罪。如此庶革前弊。站赤不致困廢。都省兵部照擬得舊制出使除隨身衣衾雨衣外。餘物不得附帶。又除進上有顯驗物色。欽依聖旨。事意施行。其餘出使人員合令欽賚聖旨馳驛。此乃已行之法。令御史臺申言前弊。禁革相應。後有違犯。元發官司與脫脫禾孫亦當同坐。准呈遍行照會禁治訖。五月十四日中書平章政事帖哥等奏淘金運司官馬合麻木哈里請給聖旨起鋪馬五匹。蓋緣所轄六路出產金銀合無准給奉旨與之。是日又奏准給降大司農司鋪馬聖旨起馬二十四。二十一日通政院言良鄉涿州驛當通道內外運轉必由於此比之他路繁劇勞苦莫甚。其使客到站往往威逼官吏多取物色或羅織間罪搔擾站赤不便切見口北榆林站以路當通道。故設脫脫禾孫二員詰驗繆僞而燕南保定往者亦爲充貫。正南泉州至大名西南慶都至真定兩路設置脫脫禾孫二員以莅之。卽今泉州大名之驛已罷所掌惟保定至真定一道而已。若將此處

脫脫禾孫徙於涿州治事。似望約束非遠。官民兩便。中書省奏准聖旨遷置訖。是月通政院言各處之任官員。係於河閒真定起馬。今有宣撫忽里哥等赴長河西之任。未審如何應付。請區處事。都省定議。遠方之任官員。合起鋪馬減定數目。如通水路止給站船。陸路則自河閒真定爲始。如數應付。行移合屬。依上施行。一品元定八匹。今擬五匹。正從二品元定六匹五匹。今擬四匹。三品四品元定四匹三匹。今擬三匹。五品已下元定三四二匹。今擬二匹。六月江浙等處行省言平江路申遞運站船。若止以六戶供船一艘。除苗不過十四五石。力寡不能當役。且今池州安置遞運站一所。未有定議。請令各路除苗不過元額二十四石。自六戶之上。或至十戶。通融僉撥相應。都省准擬行移合屬依上施行。七月司天監答木丁。自言慣識江南行船之便。頗知灤河水勢。近用匾船運米十七石。已至上都八都兒倉。則知水利有益於國。十一日近臣奏奉聖旨。此誠美事也。可諭省院官舟楫之利。其卽治之。都省令答朮丁繪其船製。計用軍人水手一萬三千人。立五十八站船。一千八百七十八艘。請給半年之食。爲米二萬三千四百石。不五閱月。可致糧七萬五千石。省臣以爲事涉繁重。不宜輕舉。候回大都區處。奏奉聖旨。不須急始俟後議。八月二十日參知政事暗都刺等奏准給發劉二拔都兒圓牌三面鋪馬聖旨一十五道。九月十三日平章政事忽木等奏南京蔡州改爲汝寧府。乞換起馬二匹。聖旨與之。奏旨准。是日又

奉田家國。改立宣撫司。乞換起馬二匹聖旨與之。奉旨准。是月中書兵部旱。今後給驛之始。令站赤驗所由官司差劄分正從人員。移關前驛祇待飲食。如無關文。不許應付。仍罪失行官司。都省准擬。十月八日。中書省議通惠河已開。擬於李二寺安置水站。用船三十六艘。除舊有外。以通州車站戶補充站戶。官爲應付。安立訖。十四日參知政事暗都刺等奏。准增給濟南府鹽運司起馬一匹聖旨一道。總前共起馬七匹。十一月二十九日。中書平章政事刺真等奏。遼陽行省所轄武平路已改爲大寧路。元降鋪馬聖旨二道。各起馬一匹。今合更郡名換給之。奉旨。卿其裁處之。是月山東道廉訪司言。濟南路授下總管府所管人戶。既於本路額內應當係官差稅。別無擅科祇應錢物體例。已下本道取問。照勘見在鈔數追收聽候。至如公差使臣人員祇應。合從有司應付。事省部照得諸王令旨。差使乘坐己馬使臣。每起應付分例正一名。從不過二名。已有定例。所管戶下科取祇應。事屬不應。今後本投下使臣人員。若有事關本路者。驗所賚文憑別無詐冒。依例官爲應付。毋致科斂於民。下合屬依上施行。十二月大都路言。管轄河西務楊村馬頭。闕少館驛鋪馬事。通政院議。楊村河西務每處擬設正馬一十四匹。合用戶計。於附近河閒清滄二州相應戶內僉撥。關部呈省準擬。就令通政院差官與有司官措置起蓋館驛。及陳設什物。人夫祇應。完備開具站戶。住貫丁產館舍。閒坐地畝鋪陳什物。各各數目。鄰接站赤路里繪圖繳申都。

省。是年保定路慶都站立本驛路當衝要。無時官使往來。供給繁重。鋪馬勞苦。緣立站之時。馬價多不過十兩。豆粟斗直三二分。比年旱澇相仍。諸物騰踊。馬價少者八九定。又直收刷無從市易。豆粟斗直一兩有餘。比於初立增多。何啻數倍。站赤疲弊。職斯之由。切照每歲葡萄酒。酥油。水銀。西天布硫黃。西番僧皮。摧駄子。青麥鹽貨等類。每運馬八九十四匹。歲計千餘匹。上項諸名件。乃年例出產職貢。難同馳驛急索之例。今後合無自初起程。如遇水路從舟起運。果值陸程隘道。以馬接運。及至平川復以車力濟之。且如車一輛用馬六匹。可以抵乘駄馬一十五疋。及牽引馬八匹之力。省馬一十七匹。以備馳驛之用。一年之內。可減起馬八百餘匹。如准所言。庶幾站戶鋪馬俱得寧息。都省議令兵部照勘所屬各路站赤。可減馬匹。增設車船。而通政院以爲摘滅鋪馬。增設車站。似爲重複。省部准擬行移通政院。照會施行。三十一年六月二十四日。平章政事刺真帖木兒等奏。楊賽因不花求差使鋪馬聖旨。臣等以爲如賽因不花之流。不會給與。若與之他人必援例乞姑緩之。奉聖旨准。是日平章刺真帖木兒等奏給福建運司鋪馬聖旨。起馬五匹。十二月四川等處行樞密院遣河東陝西萬戶府千戶李琇。起補逃亡事故軍役。資本萬戶府起馬一匹聖旨一道。其差劄內卻照遼陽行省先奉聖旨。不須給牌。但憑印信文書起馬指例爲據。令李琇通起鋪馬三疋。迤邐至廣平站爲本府所糾事上通政院。議得前事。卽係違錯。省部就令本院

行移取問。遍行合屬依例禁約。是年中書省議各道宣慰司各路總管府年例照算收支鈔錢糧。首領官免行止令經手人吏赴省所賚文卷依例應付站船遞運其餘不得擅給送通政院兵部爲例施行。成宗皇帝元貞元年正月二十日丞相完澤等奏去年緬國上言其邊界百姓漸入金齒國者甚多乞還其民願言九站先皇帝聖旨從其所請今又言止得九十戶其餘未還不曾立站雲南省卻咨立站之地側近無居民不可設置今也先不花新除雲南稱待身到其地相視可立與否奏來臣等亦以其言爲然奉聖旨准。二月陝西行省備陝西等處諸站總管府申鳳翔府提調站赤官不關本府照驗專設站官人等將公選定岐山站官祇受通政院劄付人李進玉替離未審合無提調官選用或從本府歸一區處設立先是中書省定擬各處行省站官提領受行省劄付三年爲滿副使從通政院於站戶內差設常令在職至是中書省議陝西站官擬與各處行省一體施行閏四月十一日河南行省言蘄州路經歷樊用赴省考較錢糧回至陽羅站爲脫脫禾孫所搜奪訖費用不盡銀四小錠銀光盞八枚絹五匹半羅三匹白氈一鋪鞦韆一副鞋一對木梳六枚若准設官久而爲例實非長便都省送兵部議得樊用盤費衣服等物盡爲脫脫禾孫搜去不還此例一開以後出使之人受害況兼脫脫禾孫中閒豈無循情不搜之人若令搜與不搜縱恣所欲誠恐非便如蒙欽依至元十六年聖旨不搜主意給還相應都省准擬遍行

照會施行。是月江西行省言至元二十五年龍興路樵舍等驛站船不敷增置九艘。該僉正貼水夫二百九十一戶總計糧田二百一十六頃八十四畝。至元二十六年吉州路五雲造口二驛增置船一艘。僉水夫四十六戶總計糧田四十六頃七十三畝。二十七年贛州路水西攸鎮二驛各增船二艘。僉水夫八十二戶總計糧田九十六頃。各站人夫當站數年稅糧未曾免除。如依本省元定則例以地三十畝差夫一名。依例除糧相應。都省下兵部通政院議得若從江南省例除糧僉夫誠恐更張動搖擬依江西行省已擬開除已僉入站田地相應。都省准擬施行。六月七日丞相完澤等奏雲南驛站臺官張閻等上言別有便道因改立站雲南省官也先不花等卻言無益以此奏遣普顏怯里迷失往視其地今回稱張閻所言立站之地險惡馬匹傷損已復舊道立站訖奉旨准。九月丞相完澤等奏哈兒賓地界舊立狗站一十二所前者安寧之時當站糧石出於百姓然其地不事耕稼數年以來站狗多死至站無以交換又赴前站轉致損乏站戶苦之臣與哈散議每戶以鈔十錠爲率准賜物貨聞其俗用青珠乞相兼與之奉旨准。十二日丞相完澤平章刺眞等奏甘州咨本省先領起馬一匹聖旨七道上寫尚書省令尚書省廢乞換寫中書省字別給臣等議乞行移各省似此聖旨盡令發來一例倒換奉旨准十八日中書右丞相完澤等奏江浙省咨福建泉州路上言朝廷差來及過海使臣每至泉州不居官驛宿於民家。

不計有無文憑。雖從者亦需正名分例。又過海舊制遠使。預支二年分例。近者一歲。今不問遠邇例。求二年之給。請降聖旨。臣等謂其言有理。但細微何煩聖旨。但從都省申明舊例。移文戒飭之可也。奉旨曰善。

九月兵部言下番使臣多係欽奉聖旨差委。其所支分例。本部無憑照勘。合移咨行省。劄付通政院。照依下番人員。合起馬數分揀應付相應。都省議得。今後下番使臣。經由都省分揀正從。行移合屬應付。其有不經都省。徑於通政院取給鋪馬。及到行省者。亦仰就便分揀應付相應。遍行照會依上施行。十月三日丞相完澤等奏。雲州出白金。初給聖旨起馬四匹。續增三道。今又來言出產金銀之地尙多。乞增鋪馬十四。臣等議得追收續增聖旨。別給起馬四匹。聖旨從之。十二月五日平章政事刺真等奏。出伯言哈班的妃子入朝乘已馬長行。度其力不能回請於沿途秣飼。別給鋪馬赴都。回日卻乘己馬似爲便益。奉旨准。二年正月七日降聖旨宣諭內外。不得隱占站戶。上都大都兩路站戶。免其和雇和買。各站草地。諸人不得侵占。使臣到站。不得擇駕馬。從通政院奏請也。七月二日中書兵部准吏禮部關奉中書省劄付御史臺呈。福建閩海道肅政廉訪副使商中順言。福建行省所轄八路。每遇朝廷遣使頒降聖旨。詔條前來本省。必須經由建寧南劍二路。亦有就開讀者。次至福州行省。其興化漳泉州汀州等路。不係使臣經由去處。例從行省差人開讀。今體聞差來使臣。每每自福州親至興化泉州開讀。方回赴江西者經

過邵武。亦就開讀。汀漳二路。未嘗親去。且泉至漳。係是鄰境。相離四站。驛程不及三百。捨而不往者。蓋有其由。泉州乃舶貨所聚之地。不無希望。汀漳係烟瘴幽僻之方。遂憚其行。漳在正南。汀居西北。行省差人必須各別。去漳州者。又復經過興化泉州。不惟鋪馬首思重併。抑亦有失奉使大體。今後如遇使臣頒降詔旨。福建開讀者。除經由處得許就開。其餘不係經過路分。合從行中書省欽依選官前往隨路開讀。來使不應往而往者。理宜禁止。若本宗事。必合親赴泉州開讀者。不拘此限。都省准呈。遍行依上施行。六月丞相完澤。左丞相吉丁等奏。雲南福建行省言。赴任之官。雖準給驛。然得代而還。則自備鞍馬。且歿故者。妻子不能得出。誠可矜憫。臣等議得。任回庶官。在陸途則乘己馬。及至水路。官給驛舟送之。奉旨准。三年正月七日。通政院使只兒哈忽。中書平章政事刺真等奏。木憐等九站。去年起馬頻數。多致羸斃。又兼田禾不收。以是來請。臣等議。乞差人前去分別馬匹強弱。於附近燕只哥赤斤屯田糧內。應付芻粟。奉聖旨准。遂差怯薛解也里坤。詣各站。給散子粒四百五十石。大德元年四月。太原路脫脫禾孫。言本路站亦東接真定。南至平陽四達之路。時有雲南。四川。甘肅。陝西等處。往來之使。及諸王朝省官員。經行。比年鋪馬損斃。站戶困窮。其西番僧使駕駢。重者二三百斤。輕者不下百五十斤。又兀刺赤馬後附物。常行馳驟。今後乞從脫脫禾孫。及站官量定每馬許載百斤。非急務不得馳走。庶望站赤少甦。都省準擬。遍行

合屬依上施行。五月中書省據通政院呈。婺州路言福建任回庶官乘坐站船須求分例。若便應付恐後追徵。省部照得飲食草料已有定例。站船亦嘗定擬一品二品給三舟。三品五品給二舟。六品至九品令譯史通事宣使等給一舟。身故官妻子驗元受品職與先擬任回官一體應付外。仰依已擬施行。一議擬到下項官吏止許應付正分例一名。餘皆粥飯并馬匹草料三品以上正從不過五人。馬不過五匹。四品五品正從不過四人。馬不過四匹。六品至九品正從不過三人。馬不過三匹。令譯史通事宣使等正從不過二人。馬不過二匹。六月一日通政院據靜江路脫脫禾孫申本路接鄰蠻洞廣海極邊重地。路里遠於雲南福建。其任回官員或故官妻子俱求站船分例。若便應付慮恐違錯。請區處事省部議得海北海南兩廣四川任回及歿故官員家屬卽與雲南福建一體。仰依奏準例應付站船分例相應。七日中書省奏前者各投下斡脫營運爲不應給驛。已嘗奏準拘收鋪馬聖旨。已後營運買賣各從己馬常行。今聞各投下諸王駢馬又給斡脫戶公文乘傳搔擾百姓理體不宜。合無依先制拘收給驛文書奉旨可拘收。省部欽依下合屬施行。仍令脫脫禾孫遇有此等給驛者就便拘收去訖。七月桓州昌平等十一站達魯花赤泊灤陽站。言各站額設車馬正站人戶內有富實者擅將弟分房家口呈獻諸王投下或投充人匠校尉等戶規避站役。止著見戶應當。若不別僉補替或追復避役之人誠恐久而不改損廢站赤。

二十二日。通政院官只兒哈忽刺木真八刺沙等奏請與各投下頭目分揀之。果奉上命者勿論。如有自獻之人。乞懲撻仍令當站。奉旨可重撻之。回與站赤。本院欽遵關兵禮部遍行訖。十二月二十六日。中書平章政事賽典赤刺真等聞奏三事。一奏前者嘗令站赤人吏每歲資祇應文卷赴省會計。至今不廢。臣愚以爲百姓稅賦課程年終固當赴上考校。最爾分例。何足算也。今後若令各處廉訪司所至照刷祇應文卷。有理無理。隨卽整治。似合中道。宜能會計之政。一奏上都至大都及宣德府等一十三站。在先站戶出備祇應首思。免其差發。去年下議和雇和買。軍民站赤均當。遂令管民官應付各站分例。今站戶兩有所出。誠爲重困。又有司所委幹辦祇應者非其人。不無耽悞。使臣首思。若除免一十三站和雇和買之役。仍舊令站戶自備祇應。似爲便益。一奏外路使臣首思。管民官以物賤時營備孳畜。令民生養。似此殊省官錢。而廉訪司糾其動搖百姓。且如去年真定姚八兒思修葺官舍。置立水碾。裨益祇應使臣往來實賴之。本道廉訪司亦以爲非。臣等議得隨處管民官。若有營私害民受贓入己。合從廉訪司體察。有如省減錢物。從長規劃有益之事。憲司合置之。並奉旨準。閏十二月中書省會驗腹裏諸路年銷祇應錢糧。除額撥外。民間多有借貸之數。蓋額少不敷。官吏或致侵刻。每歲赴都照算。其各路官先期追集府州司縣。及驛傳人吏。名曰置局查勘。因以遂其姦利。深爲未便。於十二月二十六日奏準聖旨。除上

都大都隆興大同四處歲用錢糧數多難以定額以下半年放支其餘路分斟酌合增錢糧自大德三年爲額於大德元年稅糧課鈔內支撥若有不敷差人赴都關取仍委官從長規劃祇應務在足用毋致科斂擾民官吏人等亦不得營求私利若有諸王駢馬親行合用祇應等物卻於各處支持錢內應付二年二月中書省準陝西省咨王相府咨啓準安西王令旨四時朝會嘗奉上命省減鋪馬今王府常行鋪馬令旨乞皆令拘收又札忽真妃子懿旨本位下遣使乘驛辦事多不反命又且擾民今奉聖旨分揀鋪馬可將此處所執令旨拘收前來今令搠思八許都事二人與安西府行中書省共議擇人拘收之敬此除差人拘收外咨請照會驗都省準上遍行拘收仍行移各授下總管府依上施行三年十一月十三日丞相完澤平章刺真等奏江浙省言下海使臣未及去期先到行省比及行時日騎小鋪馬食分例閑居七八月又正從不分但差下海必給一二年祇應多廢錢糧今後合分正從斟酌合去時月相近遣來庶幾省減祇應鋪馬事臣等議得其言有理乞今後分揀正從人數斟酌時月明白發遣使當該官司知之奉聖旨準四年九月中書參知政事馬哈麻等賚奉詔書巡行各路問民疾苦據保定等八路言道居衝要驛程每遇各省及西番僧使進納官物必經所屬接運遂將槧管各縣車戶編立牌甲輪流勾集在府伺候起運去住資費每輛用鈔二三百兩官定腳錢端實不敷未免科斂借貸歲計不下千百擾民

爲甚。請區處置立車站。馬哈麻等以其言上於中書。從兵部通政院議定。就內丘縣安置車一十五輛。每輛於編民實有物力戶內。酌中僉差一十二戶。隨其高低。合配當役。元出差稅。依例除免。其車輛繩索。初年官爲照依時佔收買應付。整點完備。已後若有死損。站戶補置。委設馬站提領兼管其事。九月四日。同據順德路申。已僉內丘縣車站戶四百六十八戶。共當車役。十二月二十一日。通政院使只兒哈忽哈只等奏。致用院官沙不丁。言所職採取希奇物貨。合從本司公文乘傳進上。先嘗有旨於附近行省斟酌。應付鋪馬。今請遵行此制。令行省宣慰司官量所運物貨輕重。給發站船鋪馬。奉旨準。省部行移。鎮江通政院及各處欽依施行。五年正月十一日。太傅右丞相完澤等奏。羅羅斯土人亦朋。言雲南站道經四川地界。過禿獠蠻。形勢險惡。宜改立一十二站。事自梁王及雲南省官遣人相視。亦言其便。具以聞。臣等議。先是忙兀禿魯迷失怯來張閭。各言改站之便。以其道出三省之境。三省之人恐及其地。各欲自私。其論不一。若準此說。卽令改立。恐不能定。不若降旨令都省選人與雲南使者及建言土人及各省所委之人。親身遍歷。凡所言改立之路。相視何處可立。卽當改立。託故不立者罪之。制可。乃賜亦朋等二人各裘帛二。從者半之。遣還。二月遼陽行省大寧路。言諸王位下送納鷹隼高麗王位下。押運物貨駕駢。及回官等走驟日三五站。致將鋪馬損斃。今後合無令送納鷹隼回還人員。并押運物貨者坐車遞送。省部照

擬如不係急使。宜從所擬相應。回咨照驗施行。四月省委點站官苗好謙。言桓州等處。一十一站。提領百戶人等。結攬站戶身役。逼取傭錢。是致被害困乏。擬合禁治。及憑藉應役。都省照得已於大德元年四月。定擬內外水陸站赤。須令正身應役。管站官吏結攬者。除科罪外。工價追沒。提調正官取招。申呈送兵部。依上施行去訖。六月御史臺備監察御史言。伏惟國家設置站赤。本以幹辦急務。布宣號令。古人所謂置郵而傳命者也。其所乘駒騎。皆站戶所買。凡遇倒死。責限隨卽補完。在國家所係非輕。在百姓所關不易。竊見各處行省宣慰司等。任滿得代官員。前來求敍。或閑人經營私事。往往囑託營求差使。主者看徇。不問緩急可否。卽許。因而馳驛。又事體可以並行。以私意而分行。或文字可以入遞。以私意而馳驛。起數頻煩。疲以奔命。去畱縱意。走驟任情。以致馬匹羸斃。站戶逋逃。又一日走五七站來大都者。指公務爲名。經營己事。將御寶聖旨於客館頓放。不慮疎失。比回已十數月。亦有經年者。本處遇有應合給驛。爲無鋪馬聖旨。耽悞官事。深爲不便。合行立法禁治。仍令各處廉訪司監察御史。常加照勘。鋪馬起數。但有違犯。究問斷罪。警戒其後。如此。則站戶可以蘇息。憲臺具呈都省。遍行照依。累降詔旨。事意禁約去訖。七月御史臺準監察御史上言。都大都站赤。多有使臣妄需長行馬匹芻粟。稍若違慢。筆監站赤人員略舉。洪贊站四月十七日。承接不答失里公主位下。闢闢解乘驛到站。將長行馬一匹。需求芻粟。管站者稱定。

例。四月一日住支。遽遭鞭撻應付芻粟車輛而行。似此違例。又無文憑理。宜禁止。今後若有犯者。聽站官申覆合屬上司。追價治罪。本臺具呈都省送兵部。依上行移禁約。九月通政院敬奉晉王令旨。針線娘子女兒火者餧食。在先用幹耳朵馬驅起運。今年兩次倒死頭疋。可令通政院應付驛馬。本院移咨河東山西道宣慰司。於民戶內遞運。關兵部照驗本部以前件米麪腳力。在前不會應付。其呈都省照得大德二年正月六日奉準諸王駙馬位下合關五戶繇軍器歲賜段匹。官爲起運。其餘諸物。初無運送之例。通政院不應輒擅行移河東宣慰司。於民戶內遞運。送兵部行移欽依施行。是月隴北廉訪司僉事梁承事言亦集乃路所管七站。除在城至川口二站山外。口至本路五站。係官和買鋪馬。或三十五十以付站戶飼養。秋夏牧以青芻。春冬取粟官廩。其人復侵食之。設若倒死。官司又議補買。蓋是物不干己。致罹此弊。今後合令本路正官分輪提調。有損斃當該官與站戶補買。果如走遞病死者。申覆上司覆驗補置。如此庶省官錢。站赤必奉職。省臺准擬下合屬依上施行。又四川道宣慰司都元帥府。言兩廣海北海南。身故軍官遺下家屬。例給站船起遣。四川亦合一體。省部照擬得四川宣慰司都元帥府。身故軍官拋下老幼。比依入番等處。一體斟酌應付站船腳力。回還相應咨陝西行省施行。十月兵部奉中書省判送宣徽院照磨崔用。查勘出柴炭。提舉司多有未支柴薪廩給司多有未支羊酒米麪等物。俱作已支。按月

申報擬合收作見在立法關防送兵部。查照到未支柴薪羊酒米麪等物移準通政院關上項物色各倉庫急無見在使臣飯食除緊急人員廩給司措借應付緩慢者收執花闌直候物到纔能支付似難議擬本部議得廩給司支持鈔定米麪柴薪等物今後每上下半年通政院預爲申關撥降差人收管遇有出使人員合支物色就發花闌勘合隨卽支付年終通行照算若有銷用不盡數目收作見在下年支用所據查照出未支物色擬合追徵還官已發花闌五日內不行支取者不許放支庶革前弊具呈照詳都堂準呈連送依上施行十一月保定路定興驛言本站見設車一十五輛輪流遞運不會少休今夏水潦驢出餓死者五十餘頭站民千禾傷勞朝不謀夕雖貧若此亦已勉力補買驢畜當站略舉八月二日至二十三日御位下來使及茶忽真妃子位下鈔車應付過一百餘輛於內轉雇民車四十四輛逋負鈔錠卒無所措又有西番送布施回車七十五輛涿州續運方去西番送布施車五十餘輛卽今應付不敷非徒悞事誠恐站戶逃亡墮廢驛運乞區處事都省議除不敷站車別行僉撥外委官自定興縣真定路點視各站應有合運諸物先儘站車挨次盤運果若不敷令本路官司於見在係官錢內依例和雇長行腳力起運施行是月遼陽行省減較定擬到周歲祇應可用錢糧額數都省準擬依上施行一遼東道宣慰司中統鈔一百錠白米三十石一大寧中統鈔一千六百錠白米四百石一遼陽路中統鈔一

千錠。白米二百石。一瀋陽路中統鈔一百三十錠。白米四十石。十二月湖廣行省備播州宣慰司言。
近摘撥湘川驛馬前赴琅洞重萬麻峽等站供應軍事走遞。征收八百媳婦。又值新增站赤馬少。以所摘
鋪馬什物。越過貴州不還。除令八戶勉力補置外。若復出備祇應。誠恐重困。已於本司見支未盡糧鈔內。
斟酌支銷。本省亦爲播州經值供億軍馬。征討八百媳婦。宋隆濟使臣頻數。劄付本處宣撫司。於係官錢
糧內。係正官一員提調祇應。請照驗事。都省回咨本省。依上施行。是月通政院備雷家站等驛。言先蒙
奏準站戶自備首思。除免和雇和買。今欽奉聖旨。節該各州縣各授下軍站匠人等。並依先行聖旨。皆令
供應和雇和買雜泛。似此當役重複。具呈都省。照得大德元年十二月二十六日。已經奏準聖旨。上都大
都。及宣德府等一十三站。除免和雇和買等役。依舊令站戶自備首思。欽遵施行訖。今據前因連送兵
部。就行合屬審實。如委係自備首思站戶。欽依元奉聖旨。主意施行。又江浙等處行中書省。言杭州路
在城驛。近承接使臣答朮丁等。欽賚聖旨懸帶虎符。前赴馬合答東番國。徵取獅豹等物。往回應付二年
分例。不受山羊。不需北羊首思。及過求禁屠一百五十日肉食。又愛祖丁等使四起。正從三十五名。前往
刁吉兒地。取豹子希奇之物。往回應付三年分例。各官亦需北羊肉價。本路申言首思祇應。累有聖旨約
束。北羊本非南地所產。雖或有之。其價甚貴。今年正月時。估北羊肉價。每斤中統鈔一兩五錢。山羊肉每

斤一兩。準用此則。周歲省鈔甚多。站赤便益。本省參詳除答朮丁等俱係欽奉聖旨出使人員。令本路權支北羊肉外。今後下番使臣。如準杭州路所擬應付山羊肉價。庶望省減官錢。卽係爲例事理。請區處事都省送兵部。議得北羊旣非南地所出。宜準行省所擬應付相應。六年正月二十日。通政院使禿滿答兒哈只等奏。諸官府遣使至隆興府。所委公事住滯。卻乘小鋪馬妄行。合無禁止之奉旨。今後也忽里提調小鋪馬勿得給與。具呈都堂送兵部欽依施行。又通政院官奏。諸僧使臣每將重物裝乘。以致鋪馬倒斃。乞依舊制驅馱一百斤以上者。不許裝載。奉旨可。令宣政院各分揀之。欽此。都省遍行照會訖。二十二日。通政院使察乃等奏。諸使及西番僧人所過站赤。旣乘鋪馬。復將常行己馬需求芻粟。合無禁止。聖旨勿與之。可也。省院欽依移咨行省施行。是日通政院使察乃哈只同知通政院事撒的迷失等奏。各站在逃戶計。前者不曾定罪。止令依舊入役。今臣等議得似此。逃戶杖七十七。追納合該差稅可否。取裁奉旨。卿言是也。其行之。又河南行省備汴梁路脫脫禾孫言。襄陽南陽等處遣使部押稅課除欽賚聖旨起馬外。亦有以差劄起馬赴省者。比其返也。仍復給驛。不審可否。應付省部議得。今後除進上有顯驗物色。欽依聖旨事意施行。其餘出使人員合賚聖旨給驛相應。是月陝西行省言。諸官府及西僧給驛頻數。駄物太重。今後請禁止濫給鋪馬。及長行馬芻粟。但有進呈物色。自起程權其輕重。不過百斤。差劄

內明書經過去處。許脫脫禾孫盤詰減卸。具押物官姓名申上懲戒。通政院官奏準聖旨。令宣政院官分揀之。省部欽依施行。又打捕鷹鵠官薄得信。言至元二十三年欽奉聖旨打捕鷹鵠。每歲秋季七月十五日入海。本處官司給食。採得鷹鵠乘坐鋪馬到館。每鷹一連日支鷹食肉四兩。至九月十五日出海。大德五年站赤止給鷹食。而本處官司以無省部明文。不與粥飯。乞區處事。兵部參詳薄得信等。下年捕鷹時。比依脫懶沙例應付粥飯相應。省準依上施行。又中書下兵部安置站車。初大德四年六月都省照擬大都至西安。沿路未立車站遞運官物。往往科擾於民。於當月十五日奏准聖旨。差官前詣各路與正官酌量。僉戶安置車站。回據所委官兵部郎中答里必等呈。保定至河南閼鄉縣安置車站一十六處。同整點得彰德迤北諸路。運物輜輶。站車不敷。其押運人員起起民家車牛。無者出錢轉雇。體究每站不過一百八十戶。卻當向日一路差發。誠爲勞苦。請議增設相應。又河南府新安縣車站至峽石一百八十餘里。山路險惡。如值泥潦。一去十日不還。若於澗池增設一站。庶得通濟。既而保定等路申。每站置車十五輛。遞運不足。未免轉雇民車。每輛用鈔七十八兩似此重併。請量增車輛事。至是省部定擬安置如左。一各處合起錢物差人管押。須於差劄內明書運物斤重。可用車數。所至驗實應付。不得踰越過站。及半途增索車力。凡物至衛州從本路提調正官依驗差劄。除金銀寶貨鈔帛急需之物。載以車輛。其餘

纏重閑慢物色。以舟運之。若無求文。或所書不明。又非站車合運之物。其押運人及所在官司。並不得用小帖子口傳言語起給車輛。管站人亦毋得應付。苟有持勢挾權者。具名申部。一各處行省并腹裏瀕河路分。應入水站物貨依例船運外。不拘河道去處。擬自涿州至宜溝二十站。量擬再增不項車輛。每輛許僉一十二戶。同力應當。除其差稅。差去官與各路正官照籍於酌中戶內僉取高下。分配供役。合用車輛驢畜繩索等。官爲買備。已後死損。站戶補償。涿州至宜溝車站二十處。除見設外。量添下項車輛。每輛須載二千斤。驢一十二頭。涿州十五輛。定興十輛。保定一十輛。中山一十輛。真定在城一千十輛。趙州五輛。內丘五輛。臨洛五輛。磁州五輛。宜溝五輛。一見設車站元係馬站。提領兼管。今改擬不隸馬站。從差去官與本處管民官一同詢眾於車站戶內。選差諸練官事二人充提領管領站戶。飼養驢畜。仍委路府州縣達魯花赤長官提調成就。一車站戶數。卽與馬站無異。雜泛差役。已有定例。仰一體照會施行。一在都設立車站日久。整治條格。從兵部就便照勘依例施行。一河南府新安縣至峽口。路險且修。今於灤池增設一站。置車一十五輛。照得汴梁南至黃州襄陽兩道站車。除先撥付河南府管下。站赤安置外。其餘車數已盡革罷。人戶未曾收差。咨河南行省。依例僉撥安置。二月江西省咨廣東道。德慶府判官合麻。因病作闕。宣慰司照依任回官員例。應付站船出廣。廣州路副脫脫禾。

孫。言其難同得替任滿之例。本省看詳病患作闕。終是到任人員理宜應付。都省準擬依上施行。八月廣平路。言近蒙朝廷差來官。及通政院所委官整治站赤。計點館內闕少鋪陳什物。立限增修祇待。已經定擬到合增物件。申通政院照驗外。若於本路大德五年。額撥祇應錢內放支買置。緣已銷用無餘。擬候大德六年撥降官錢置造。請區處事。兵部照擬得各路館舍鋪陳什物損壞去處。正官相驗是實。計其物價。令不干礙官司體覆。於年銷錢內從省收買修補。中閒若有情弊。廉訪司糾察已有定例。今據所申。擬合各路於逐年額撥年銷祇應。從長規劃息錢。逐旋修置。不惟於民無擾。抑不省官官錢相應。呈奉省準依上施行。又江浙等處行中書省。言嘉興等路逃亡消乏站戶一百餘戶。合無從廉訪司體覆補換。省部議得逃亡消乏站戶。合令親管州縣保勘。具申總管府。委不干礙五品以上管民官。體覆是實。開具元僉增損。目今實有丁產。申覆省部區處。從監察御史廉訪司體察。但有不實。將保勘體覆官等。驗戶多寡責罰標附過名。任回降等遷敍。主典吏人勒停行移合屬照會施行。十一月三十日。通政院使禿滿答兒察乃哈只等奏。塔察兒脫脫禾孫。言諸使臣非有公事不還站道。經由秦中鞏昌府。鳳翔府等處城池。於埋體若不相似奉旨。若曰。果有公事。則從城邑經行。無所事而自過城邑者罪之。欽此。具呈都省施行。

站赤五（永樂大典卷一萬九千四百二十）

經世大典大德七年二月十九日中書省奏軍上諸王駢馬不審事之緩急一槧遣使及萬戶千戶與無干礙之人並給鋪馬差劄以故站赤兀魯思輩應役困乏臣議得乞今後諸王駢馬元帥萬戶千戶若有給驛之事未經出伯議者不得行今既委命前去方當站赤消乏之際但凡不急之務就令出伯較計奉聖旨準三月河南行省備汝寧府言通政院每歲差官於補換站戶名下追徵津貼鈔赴上都通政院交納止給駕鈔鋪馬其押運官自備騎乘不迭程況有起離之後尋復計構回還虛準差遣有妨公務竊見省府樞密院差官馳驛前來催取諸翼軍人封裝追徵數足仍付來官收管乘驛以送止差弓兵防護站需卽與封裝無異又本府至上海往復六千餘里徒勞押運乞比照封裝事例今後令通政院差來官就交站戶役鈔乘驛前去有司應付防送弓兵誠爲便益都省準擬行移合屬依上施行五月二十八日中書省奏追甘肅隱占站戶依舊當役初大德六年甘肅行省言甘州甘泉站戶役充僧人禿魯花軍匠答黑下牧羊等戶窺避站役負損見戶等事中書省奏準聖旨同樞密院宣政院遣使至甘肅行省追勘得六十年前立站之時撥戶三百四十八卽今當役者止存一百七十六除實逃亡事故四十六戶外

隱占投下計一百二十六戶。隨時復役者已二十五戶。尙餘一百一戶。係初定站籍見種贍站地土。卻屬各投下戶計。請區處事。都省送部議擬合改正。依舊當站。以此於是日奏奉聖旨。依卿等所擬令當站役劄付各處。欽依施行。六月行通政院。言兩浙行宣政院僉院吉祥判官劉伯顏等給鋪馬赴杭州之任。又浙東宣慰使答吉孫都運等起給船馬赴浙東平江之任。爲無通例。乞都省定擬送兵部。照得至元二十四年七月二十四日。尙書省奏準雲南四川甘肅福建兩廣赴任官員許給鋪馬。其餘去處難擬應付。呈蒙都堂定擬除各處運司官員如委急闕辦課之任。鋪馬臨時斟酌應付。餘准部擬施行。九月管領諸路打捕鷹房總管府。言打捕達魯花赤蔡榮鍾德。元歲捕鵠鶲合用載網索竹竿站車及打捕人飯食。依例出給部字事。兵部照擬去年爲採捕野鴨頭目人等。粥飯部字議。除軍民自願充役。及支請衣糧戶計不須應付。其除差不請衣糧者。依例應付。都省已嘗準行。今捕鵠鶲戶宋秀張子熊等。每歲宣徽院照依鷹房昔寶赤例。驗實有家口支請五箇月糧及衣裝布帛不闕。卽合依例住支粥飯。其載網索站車別議施行。今後似此打網人戶。如是支請衣糧。一體住罷相應。省準依上施行。十一月江浙省宣使呂從善等承差馳驛押送金銀貨物到都。事畢當回通政院。不給鋪馬。擬以驢畜應付。其人以爲大都至杭州五十餘站。約行兩月餘。今之回也。難同禮任官員納物回程庫子閑慢之比。赴省陳訴。都堂議得閑慢使

臣給驢本革泛濫之弊。各省宣使事畢回還聽差。難同閑慢人員回日依例給馬。除軍情急務無得走驟。日行不過三站。宿頓去處於起馬關文上明白該寫某站起程。至第三站止宿。如違站官宣使各笞二十七。再犯罷役。連送兵部行移。通政院依上施行。八年正月御史臺備監察御史言各處站赤合用祇應官錢。多不依時撥降。又或數少不給。遂令站戶輪當庫子陪備應辦。今又預定周歲額數先支其半。規畫祇待。有司往往抑配行鋪收市諸物剋期取息。利已害民。所支官錢十不及一。今後若驗使臣起數實支官錢。所在官司依時撥降。令各站提領收掌祇待。毋得科配小民。濫差庫子頭目似爲便益。及江南湖廣等處。奉使宣撫言巡歷歸州澧州等路。每以站赤祇應官錢妄敷行鋪科取擾民。宜令所司每月赴路關領從實銷用。庶革害民之弊。都省送兵部照擬規畫祇應之事。累經奏準聖旨整治。及都省定議長便施行。其弊終不能革。蓋因給驛冗濫糜費錢糧。且如增給支持曷若本源。省事合從都省減節諸官府各投下出使人員禁約。假公冗食之害果有不敷。合議增給。所據減價抑配虧損百姓一節。宜令各處提調上司預撥州縣各該鈔數從長規畫。驗彼中實直乘賈和買祇應諸物立法關防從公銷用。若或官吏刻剝抑配作弊。令廉訪司隨事糾治。任滿於解由內標寫以憑黜降。除諸衙門省減出使已於整治站赤事內別議施行。至於祇應不便事理。乞劄付御史臺依上體察相應。都省議得各處站赤祇應合用錢糧預爲

撥降州縣官司。果有不行從長規畫減價科民。一切不應事理。依已行從廉訪司體問究治。仍依期照刷。餘準部擬施行。三月二十八日中書省奏在前爲諸王駢馬各枝遣使事畢不回。久占鋪馬分例。遂奏定限期。大事七日程。小事三日程。出此限外。不及鋪馬祇應。後廉訪司以爲太嚴。奏令再議未果。今陝西行省咨謂如各投下使臣以軍情錢糧。及干有司之事。比及完備。請依舊制應付鋪馬祇應相應。大都省臣議果有如此公事。合依先例給與。若或事畢託故不回者。鋪馬祇應不當再給。如各投下催徵斡脫錢債地租造作。與管民官無相關係之事。則從已定條例與之。臣等以爲不立限期。事涉弛靡。合無定擬。有軍情及干民訟者。限以半月令行省與各路提調官。不以是何投下早完其事。若不係管民官司。大事八日。小事三日。許支鋪馬祇應限外。不得再給。奉聖旨準。四月大都路總管千奴言。見問訴良人等於內多有轉發河南腹裏。必須差人遞押。乞令經過去處應付粥飯。兵部議得經官轉發之人。擬合令經過官司驗前路公文。從實應付粥飯。官吏人等。不得多冒支破官錢。其監押者亦不得遷延擾民。違者各治其罪。都省準擬。依上施行。六月陝西道奉使宣撫言。五臺僧潘提點者。齋闈闢出太子令旨。又索羅察兒賚諸王阿只吉令旨。欲赴大都於官司取求飲食芻粟。防送弓手前路關文。竊詳此等出使人員。宜令合于上司明給公文書。其正從人馬芻糧之數。行移有司應付。但有不應。則於元給文憑官吏追償抵罪。都

省送兵部議得各位下授。除軍情急務已有應付鋪馬首思定例。其乘己馬人員事因出使擬合經由省部驗事開寫可畢日期給之公文於所過取給飲食限滿赴部繳納仍嚴加禁約不得擅自取與遍行照會相應都省依上施行七月陝西道奉使宣撫言諸官府遣使頻繁鋪馬倒死太原路管下站赤年例首思錢一千餘定科配人戶減半買物不便省部照擬年銷祇應已令各處從長規畫內外官府濫差使臣亦於整治站赤事內禁治乞惟各處行省任滿得代無祿之人或因起納諸物或指計稟公事濫起鋪馬赴都因而求仕直至得除馳驛回還不惟虛費首思實恐害於站赤以此定議今後任滿得代無祿之人不許差使赴都如違定將當該首領官吏究治移咨各省劄付御史臺體察及下合屬依上施行又御史臺備山南廉訪司言荆湖一道路府州縣年銷祇應自大德五年撥降規畫官錢祇待至今三年不見接支亦無增給鈔數加之有司不遵原行規畫收買米麪羊酒雞猪等物銷用但將鈔定科配層沾店肆之家存本取息出物供待會計到今息過於本者數倍略舉江陵一路祇待錢散科所屬司縣百姓買養牝猪六百隻每隻官給價鈔一十兩計官本一百二十定半年一次抽分猪一隻限重五十斤周歲抽分猪一千二百隻如無本色徵鈔一十五兩計取鈔三百六十定如此害民不便請懲革事兵部擬令河南行省照依都省原行事理令宣慰司各路周歲預爲額撥州縣鈔數從長規畫驗彼中實直趁賤時

月兩平收買祇應。立法關防。從公銷用。年終通行查勘照刷。相沿交割。若有不爲用心規畫。減價椿配。虧損人民。徇私動眾。侵使入己者。令廉訪司隨事體察究治。任滿解由內明白開寫。以憑黜降。庶得省減官錢。民不被擾。都省議得各處祇應鈔數。每年依額撥降。廉訪司依時照刷。餘準部擬。九年八月三日。陝西行省咨平章政事明安答兒言。在先諸王駢馬各投下差遣使臣。與各路有司相干公事。當時應付鋪馬祇應。初無程期。近者中書省奏準聖旨。諸王駢馬遣使事干軍情。又關係管民官司者。限以半月。其餘大事八日。小事三日。許支鋪馬祇應限外。不得再給。除欽依外。伏見諸王駢馬多係邊藩鎮戍。其所遣使乃爲軍需營造期會錢糧之務。閒有卒急不能成就者。所司無問事完與否。纔過程期。卽依新例。不給鋪馬祇應。使其人市食步趨辦事。且如朝廷出使與州郡所差人員。無分內外。一體應付。何獨宗室之使。計其程期非所宜也。況今迤北土哇等遣使入覲駢騎往來。儻若揚聞于外。誠非國家柔遠人懷萬邦之良規也。今後若定擬諸王駢馬使臣經過驛程。除常例外。若有各路相干公務。欽依前例。當該總司并各路委官提調催督其事。果有未完。亦合照依舊制應付鋪馬祇應事畢止截似爲長便。丞相阿忽台平章政事賽典赤八都馬辛等奏奉聖旨。準其所言。都省欽依施行。十一月五日。中書省奏準事理。行移合屬欽依施行。一奏前者。太原等處地震。田禾不收。百姓闕食。站戶自言去年諸王阿只吉使臣給驛者。七

百五十餘起。今年春夏凡三百四十餘起。尋常無此。頻數困乏不支。曩者聚會之時。雖嘗奉旨令大枝諸王量事遣使。毋致冗亂。猶尙如此。今合以此緣故言於阿只吉。及諸王駢馬咸使聞知。奉聖旨。卿言是也。可諭之。一奏諸王駢馬分地城邑。及其餘事務委命達魯花赤等官。各給常行鋪馬令旨。其人以己私。不以遠近輒乘鋪馬。往還站赤消乏職此故也。乞拘收此等鋪馬令旨。今後各授下命官遣使常行起馬之制。一切禁止。奉聖旨準。閏十二月二十一日。丞相完澤等奏。去年怯來上言雲南經由亦奚不薛改站道平。又捷水路二十餘站。今賽因不花卻言若改此道。經由已地。其民卽日差稅軍站。猶且勞苦。若又重立此站。民不能存。臣等謂賽因不花私其民之說如此。若果順便。其言可聽。今乞令雲南湖廣兩省各差一人。同往相度。合改與否。擬定上奏至時決之。奉聖旨準。十年正月二十日。中書省奏外路爲官者。多因己事託故。令近行人員奏請給驛赴上舍。其所職使私人覲墮廢事務。乞定擬。今後如此託稱事故。近行人員不得奏請。省諭禁約之。奉聖旨準。三十日宣政院使沙的同知宣政院事桑哥答思等奏帖。本解兒前者傳奉聖旨。諸王駢馬非奉上命。毋得遣使西番。欽此。今各授下出使馳驛者。多擾民尤甚。上位嘗有旨。乞依先制給降聖旨二道。諭寧河臨洮府脫脫禾孫禁止。奉聖旨準。本院具呈都省。欽依施行。五月十日通政院使察乃言。迤西站赤不便。自大德九年至十年正月。西番節續差來西僧八百五十。

餘人計乘鋪馬一千五百四十七疋。至甚頻數。竊照天都至衛輝二十二站。若將此等回程西僧從水驛以達衛輝。人則換馬。物則行車。從本院官更相提調起發。脫脫禾孫所至辯驗。庶幾減省鋪馬。站戶少甦。又站車每輛載物一千斤。馬負不過百斤。今使臣載物過多。壓損頭畜。各處脫脫禾孫弛心曠職。曾不之察。宜定黜降之罪。以繩不迨果能奉公者。驗功陞賞。庶有激勸。省部照擬驅馱車輛。舊制已禁重載。所言脫脫禾孫守法不嚴。合從所擬斷罪黜降。仍令各處達魯花赤正官。常切提調。毋致害於站赤。十四日以察乃所陳奏準聖旨。遍行合屬依上施行。七月通政院廩給司言。東西館使客合用柴薪。宣徽院三年不支。使當館人夫出備。兵部呈奉都省議得。宣徽院柴炭局見收柴薪供給內府不敷。據使臣人員合用柴薪量擬每名日支中統鈔三錢。呈準日爲始。就於已降廩給司支持錢內通行除破施行。又河閒路言江浙行省納物回使哈答辛百戶王宣使等。非理走死鋪馬六匹。兵部議得合咨本省取招追斷。隨處馳驛納物回使。宜準通政院以擬應付站船。遍行照會相應。都省準擬施行。十一月遼陽行省備諸王阿只吉令旨言。在世祖時女直哈里賓水達達等處。每年進送鷹鵠給驛。後值乃顏叛亂。站赤因廢。今來合無依舊應付鋪馬。進送鷹鵠趕上通政院議得。大德十年五月十八日奏準聖旨。非軍情錢糧急務。必合乘驛者。其餘毋得濫給。呈奉省準欽依施行。是月河南府路申。昨爲晉寧冀寧地震。站赤被災困乏。

朝議出使人員十分爲率。六分經過河南。四分經由平陽太原。卽今地震已寧。乞依舊例給驛。似不偏負。兵部照擬平陽太原。未經地震之前。與河南府路均給使臣驛傳。合自大德十一年。依舊例中半應付相因。都省準擬。依上施行。是年冬江浙行咨松江府嘉興路水驛。常有兩浙運司官吏及行都水監人員存坐日支分例。又鎮守嘉興邳州萬戶府出鄉巡捕私鹽盜賊。已有哨船復乘驛舟有妨遞運。本省擬得兩浙運司及行都水監官吏乘坐站船。所至卽令回船合支分例。於元倒驛內關取及至事畢。預關前站隨時應付船隻以行。其萬戶府巡捕私鹽盜賊。止乘哨船相應。省部準擬回咨依上施行。又言大德七年五月十一日。兩浙奉使宣撫與本省講究規畫。祇應錢糧。每歲預於春首支撥均給。各州縣從長規畫。趁賤買物孳生。逐旋發付各站收管。將民閒差設祇應頭目庫子。截日罷去。令站官管領祇待。合用收支庫子。就於站戶餘糧內差設二名。就準本戶里正主首身役上下半年更替。至大德八年二月中書下令比依江南倉庫攢司例。於司縣及巡尉鹽司吏內選差祇應庫子。二歲爲滿。發補各州司吏。已下各處依上施行外。近者福建道宣慰司呈。小吏管辦祇應多係無籍之人。攜家蠶食。其弊多端。及據杭州常州等路申亦言不便。至有悞於應辦逼臨人命者。竊詳站赤之設。事甚繁劇。來使知理。猶且庶幾。有如化外諸番人員。不諳法禁。過求飲食。稍有違忤。動遭笞撻。今司縣捕盜小吏素無抵業。惟務貪饕。預領官錢。必致

侵剋逃竄。無從追理。既失官錢。又悞祇應。誠爲不便。如蒙照依元議。令站官管領祇待。選差站戶之有餘糧者。以充庫子。止設一名。上下半年更替。就準本戶里正主首身役。允爲便宜。都省準擬回咨本省。依上施行。武宗至大元年正月。江西行省咨撫州崇仁縣。元僉雲山馬站貼戶楊汝玉入站田土六頃七十畝。七分九釐。免糧四十五石二升。因當站困乏。節次出賣田產。不堪應役。委官體覆相同。若令得業人通行津貼。卻計二十餘戶地里遙遠。田糧崎零不便。止於得業人內點差陳成之趙嗣諒二名。其人又係在城站戶。以所買之數及下戶餘糧。併得四十五石二升。抵承楊汝玉當站。本省看詳。若不準令得業人當站。恐致倒斷。站赤劄付本路令陳成之等當站外各路亦有此等消乏站戶。保勘體覆是實。合無令得業人應役。惟復別僉。卽係違例事理。咨請照詳都省送兵部。照得站戶消乏。例合覆實替補。如楊汝玉初賣地土。委曾經官告據。令本管及不干礙官司體覆。端的消乏。開坐本戶元僉目今丁產擬定咨省僉補相應。今後若有似此戶計。亦合一體施行。都省擬江南站戶賣乞地土。先令所買之家隨地納稅。餘準部擬。三年五月八日。尙書省奏徽政院言。嘉興松江瑞州三路。又汴梁等處管民總督府。凡有錢糧公事。合來計稟者。俱無鋪馬聖旨。啓過太后懿旨。每一路起馬二疋者與一道。起馬一疋者與兩道。臣等議從所請。之數與之上。曰可依太后之命與者。八月十一日。詹事月魯鐵木兒朵解奉皇太子令旨。站赤墮廢。

凡火者欲取站車。悉勿與之。敬此。仰籍錄敬依施行。十一月河西隴北道廉訪司言。按治色目應當站赤。比因給驛頻繁。補置鋪馬。因而破家蕩產。典鬻親屬子女爲軀。不得完聚。乞矜憫區處。省部議得。管站頭目典賣站戶親屬。已曾欽奉詔書給親完聚。其權豪勢要人等。典買站戶兒女爲軀。卽係違法罪經釋免。合改正給聚。免追元價。至如河西站戶消乏。官爲賑恤相應。四年二月六日。通政院察乃榮年等啓於皇太后。皇太子曰。完澤篤皇帝暨曲律皇帝登寶位時。各處使臣有營己私事。託言進鷹來者。合無禁約。懿旨曰。鷹堪好者。給驛前來。其不堪者止之。令旨曰。此何必言。除海青之外。餘鷹皆勿進。各處可差人喻之。又特奉懿旨令旨。令百官庶民亡故及娶婦送女者。皆起鋪馬而行。今後似此。皆可禁止。三月十三日。樞密院特奉潛邸聖旨。各處行省并各枝推稱事故。給驛來者多有之。此閒各衙門推稱事故。給驛差出者亦有之。因此站赤消乏。今後似此之人罪之。又具主張押與文字官員姓名以聞。當議責罪。可行移遍諭各處。欽此。十八日欽奉詔書內一款。站赤消乏。蓋由使客繁多。失於檢察。除海青外。應進獻鷹隼犬馬等物。並令止罷。各處歲貢方物。有司自有額例。其餘非奉宣索。不得擅進。應有執把聖旨令旨。盡行拘收。諸王駢馬投下及各衙門鋪馬聖旨。仰中書省定擬以聞。諸賚物爲驗者。今後無得給馬。不應差使營幹已私罪。及給馬判署正官。監察御史廉訪司常加糾察。欽此。中書省部契勘內外諸司。設立宣

使奏差。蓋爲幹辦公事。其各處行省宣慰司等衙門。比年以來。置而不遣。故委府州司縣正官。或無職役營私不應之人。託以軍情錢糧貢物爲由。驗其品職多給鋪馬道途之閒。源源不絕。是致站赤消乏深爲未便。擬合遍行各處。今後凡遇押運官物計稟公事。必合遣官給驛。雲南甘肅四川和林差使給馬二疋。其餘行省給馬一疋。量立程限結罪于官。令在都諸官府如承此等來使。亦仰依期發遣。庶幾事無壅滯。省減鋪馬。移文合屬依上施行。二十三日中書省奏。前者站赤隸兵部。後屬通政院。今通政院怠於整治。站赤消乏。擬合依舊令兵部管領。奉旨准。四月二十四日。中書省奏。昨奉旨以站赤事屬於兵部。今右丞相鐵木迭兒等議。漢地之驛。令兵部管領。其鐵烈干納鄰末鄰等處。蒙古站赤仍付通政院管。上曰。何必如此。但令罷去通政院。悉隸兵部管領。三十日中書省奏。腹裏江南起運官物浮河而來。自李二寺水站入閘河迤哩起都往回四五句。不得達上下。驛程不接。事涉停滯。乞將李二寺遞運之舟。分撥通州。墳河安置。有餘船隻令作站車。以車船戶撥充墳夫官。蓋墳房使之就役。奉聖旨準。五月十一日。中書省奏。準聖旨。拘收元與各官司鋪馬聖旨。據都水監言。汴梁分監年例。分摘官吏壕寨人等。於都省欽領起馬劄子。前去巡視黃河御河修築堤堰。至十月還監。隨卽繳納及河道提舉司。亦無鋪馬劄子外。惟東平路景德鎮分監一所。自開河以來。中書省給降鋪馬聖旨二道。內起馬一疋一道。起馬二疋一道。每

自堽城兗州下至金溝沽頭。以達臨清。往來一千五百餘里。乘驛巡視河道堤堰。攢運船隻。但有衝決。卽便修理。未審合無存畱。請區處事。兵部議得都水分監。元領鋪馬聖旨二道。令給差使似與在都官府不同。宜令依舊收掌。仍將差過起數。每季關部。以憑稽考相應。省準依上施行。十二日中書省奏。在前管首恩官與通政院官同事。今請依舊隸于兵部。上從之。是月山東東西道肅政廉訪司言。省院委官與高唐州劉州判至夏津縣補僉。吳成充榆林站戶。王仲充失八兒禿站戶。吳成隱匿人丁二口。地一十二頃三十畝。住宅牛羊資產。結構官吏。以所擬榆林站役。改更王仲失八兒禿名次。事敗詞伏。外照得所僉籍冊已申上司。請依例改正事。下通政院。兵部前後擬議不一。都省照得吳成始初僉爲站戶。隱漏人產。致令王仲告發。又且物力居高山東憲司已取元僉官吏。不應改換招伏。及吳成承管應當榆林站役。擬令改正送兵部照會施行。六月通政院言。昌平驛見置鋪馬一百三十七疋。接應乘傳。常無二三十疋在站。今尙書省委官六人起馬十疋。監視瓮山工役。相去大都不及二十里。徒占驛馬首恩。兵部議得今後瓮山工役。及抽分羊馬攔截營帳等官。令令自備常川馬疋。所在官司應副首恩駕粟相應。呈奉省擬。依上施行。是月赤城驛言。瑞雲寺有西溫湯。凡遇諸王后妃公主駢馬西僧朝省內外出使人員到驛。枉道澡浴。多支分例。損斃鋪馬。雖經禁約。終無畏憚。合無奏定罪名。出榜懲治。庶望站赤少甦。中書省奏。

準聖旨除上命及賚省部公文前去外其餘人員鋪馬首恩皆不得給敢有違者依例科斷都省欽依備榜下本驛禁治訖又李好謙言釋道不量緩急來往馳驛死損鋪馬驅逼車丁及將站官筆撻多取分例合議裁減誠爲便益行下通政院及兵部議得宜從都省劄付宣政院集賢院分揀差遣令御史臺糾治若有不應給者罪及元分揀官司至如走死鋪馬筆撻站官已有累降詔條禁治相應都省準擬依上施行又甘肅行省左右司郎中楊傑言各處站官侵剝站戶放富虐貧等事兵部定議合從提調官治罪重者罷役使臣經過筆辱站戶擬合禁治仰令監察御史廉訪司體察站官額設已定以次濫設人員革去相應呈奉省準遍行合屬依上施行又中書省據兵部呈高州民匠總管所於至大三年正月十八日僉人戶呂忠充榆林馬站戶抵替貧難趙松戶役僉華秀充失八兒禿牛站戶補代逃亡馮進當站其呂忠累詞訴於本所及省院官謂忠元係段千戶所管邊民與元僉失八兒禿牛站戶劉敬馮進同籍二人逃亡後本管有司已令忠免納大德十一年至大元年站需錢物卽合以忠抵補馮進戶役理所當然若華秀者乃民匠總管所戶計榆林站貧難戶趙松元從本所僉定其華秀人丁物力又在忠上以之抵補馬戶趙松於事公當今乃更互僉撥不便事經高唐州體勘得華秀比元僉供報丁產時餘地一頃七十二畝牛四隻羊五口多於呂忠物力已取各人承伏華秀入於榆林呂忠復於失八兒禿如此定擬

改正申奉通政院及兵部前後所議不一。都省擬呂忠籍而男子十名。內成丁七名。不成丁三名。俱是親口。華秀戶下男子七名。內婚二名。不成丁一名。比呂忠丁數不及華秀。雖曰地多。其差發絲料孳畜座業所爭不多。僉籍既定。不須更改。送兵部就便施行。七月一日中書省奏遼陽省左丞教化的言行省官內各有提調公事故給鋪馬聖旨圓牌。今或恃眾不得預。不詢同僚而輒差人者。先嘗有旨。以圓牌董督軍情急務。餘事不得發遣。合無自今定擬。似此元與鋪馬聖旨圓牌。並追收之。但凡庶務。詢于同僚。明以文字施行。庶不紊亂。臣等以其言爲然。乞依上拘收。奉聖旨准。十四日中書省奏。通政院旣已罷去。站赤事歸兵部。今兵部言各處站赤路官提調。惟蒙古站前此通政院官提調。每歲車駕還幸大都。通政院官分住上都。今當還幸之時。乞定擬木憐站。自察罕尼柳溫鐵里干站。自失兒古魯以裏。令上都留守司官提調察罕尼柳溫失兒古魯以外。至杭海站。赤令和林省官提調。又隆興路西京宣慰司。就提調管內站。赤甘肅行省提調納憐站。如此區處。庶不悞事。上從之。是月中書兵部呈通政院併入本部事宜歸一。而各處提調之官。尤爲切要。若不從新委自各路府州縣達魯花赤長官提調整治。則恐勞逸不均。輕重失倫。都省照得至大元年正月十九日。已經奉准聖旨。令路府州縣達魯花赤長官提調站赤。仰兵部行移合屬。欽依提調人馬船車鋪陣什物館舍。須令一一如法。或不測差官點視。但有不完決罪標附驗。

輕重黜降。又于忠信陳言隨處軍站出鞍馬。備物力服役於千萬里之外。其民良苦。今外路進納鷹鵠者乘驛馬食官祿。又如西番河西高麗動以赴上拜見爲辭。遣使馳驛不下百餘疋。其閒裝馳已物。以營私利。每馬所負或二百斤。損斃之故。若此。今後莫若除送獻海青人員外。其餘進納諸王公主駙馬鷹鵠之人。自備腳力致之。若西番等使達法。將物脫脫禾孫管站提領知而不舉。許本管站戶赴省陳告。於沒官錢物內一半付告人充賞。似望官民便益。兵部議得所言事理。擬合欽依累降詔旨。禁治相應。呈奉省準。閏七月十九日。兵部呈。近奉省劄各處水站安置年深。除差官馳驛從宜拯治外。照得通州至臨清水驛。近者二百里。遠則三百里。過會通河以至揚州。不過七八十里。使臣往來。止經一站。則換舟。其綱運官物。必越三四站方至交換之所。卒無見在站船。未免又過數程。有旬月不得回者。以此各處滯積官物。接連愆期。合令已委官取勘各站船。分別遞運船料例梢水人丁數目。逐一點視。若有不完。卽令補置。仍責有司設法關防。毋致似前關悞。具呈照詳。都省準擬行移。已委官及各路提調官。依上施行。又都省復奉聖旨。復立通政院管領達達站赤。八月五日。兵部呈。大都至上都站赤。每歲車駕行幸。諸王百官往復給驛頻繁。與外郡不同。除設驛令丞外。設提領三員。司吏三名。腹裏路分衝要水陸站赤。設提領二員。司吏二名。其餘閑慢驛分止設提領一員。司吏一名。如無驛令量擬提領二員。每一百戶設一百戶一

名從拘該路府州縣。提調正官於站戶內選用三歲爲滿。將濫設官吏頭目人等。盡行革去。據行省所轉站赤。令各省依上選保相應。都省準擬施行。九月陝西行臺監察御史袁承事呈。甘肅等處驛路係西邊重鎮。定西會州平涼涇邠通驛。臨洮土番東西往來之使。日逐起馬不下百疋。晝夜未嘗少息。常見鋪馬不敷。停畱使客。或有非法選馬筆署站赤。及州縣官吏站戶被害。鬻產破家。賣及子女。誠可哀憫。往者經由寧州慶陽站赤。自環州至寧夏萌井站。以至永昌道路。盡皆沙漠。遙遠艱阻。四無人煙。驛使自負首思露宿野食。馬乏芻粟。如此奔馳數日。是致人瘦馬斃。又許速都雙松等驛。俱是蒙古河西人戶當站。所致闕少馬疋。祇應站官人等避匿。使者往往停滯。蓋因直隸永昌王傳提調。因循苟且。失於拯治。今後乞減省起發鋪馬。將許速都等蒙古站赤。責令所屬總管府提調增置寧夏站赤。命通政院常加整治。誠爲官民便益。事省部議得定額給驛提調整點之事。累奉詔旨施行。今據前言擬合常加檢察。仍於河南陝西甘肅行省。又腹裏懷孟河中府東勝州等處。黃河渡口提調止截。毋致泛濫。其許速都雙松等驛。令王傳與永昌路達魯花赤總管提調。從新整治。其路遠增設站赤等事。未經行省議擬移咨各省。依上施行。四年鎮守福州路亳州萬戶府軍人封裝鈔定。卽欲應副鋪馬。卻緣欽奉詔書節該諸寶物爲驗者。無得

給馬。誠恐差池看詳軍人封裝鈔定。所以供給衣襖急用之物。若使有司應副腳力。中閒差池展轉擾民。耽誤軍需。合無以鈔爲則。五十斤之上。至一百斤。應副鋪馬一疋。驅運五十斤之下。令差來官順附前去。實爲官民兩便。乞明降事。知院月魯鐵木兒。同知樞密院事鐵木兒。脫買驢等。奏準聖旨。依上施行。既而陝西行省亦言安西路追到四川省軍人封裝。依例應副鋪馬。省部議得軍人封裝各處行省差人催取。既有欽賚聖旨。據駕鈔鋪馬。擬合欽依應副施行。二十三日御史臺奏。監察御史自各省來沿路經過。驛傳得站戶之言。謂皇帝登寶位罷進鷹犬希罕物貨。革通政院而任兵部。比之前時使馬少肥。戶亦獲安。已後若不更改。止令兵部管領。則吾曹感恩永得安寧。臣等不敢不聞。上曰。言之是矣。只依已定之法行之。又奏監察呈說。各站往來西番僧人尙多。伏望憐憫站戶。令宣政院及西番官府凡此往來者。研究分揀。果有德行僧人則來。餘者禁止。馬上囊橐毋令過重。省惜鋪馬之力。誠爲便益。奉聖旨準。十一月十一日。中書省奏。今春拘收各衙門鋪馬聖旨。時中政院亦已拘收。奏準別寫與之。乃者脫脫木兒等傳皇后懿旨。謂在前中政院給與四十道。今還依數與之。或減元數取裁。奉聖旨寫與二十道者。是月中書兵部照得諸官府。凡遇遣使赴部給發鋪馬。合詳緩急之宜。於蒙古字別里哥文字上以漢字書其正從。及兀刺赤人數然後發遣。今腹裏行省諸官司所給差劄前路關文。多以從作正。標寫兀刺赤在外似

此濫給鋪馬。若不拯治。惟恐害於站赤。擬合移文行省及腹裏諸官府。今後事當遣使。須於差劄上明書正從。及兀刺赤人數。不惟革去泛濫之弊。亦可省惜官錢。優卹站赤。都省準擬依上施行。又中書兵部照擬今後進賀表箋。各道廉訪司如舊例。腹裏路分差官馳驛赴都。其餘司屬及隸省部官司。附納各路來上行省宣慰司。都元帥府宣撫司。轉運司。各路總管府五品已上官司。止赴所隸行省總府。通行類咨差人馳驛赴中書省樞密院呈貢。不許別行給驛。都省準擬遍行各處照會施行。十二月江浙行省備衢州路總管朱嘉議言。鎮守軍官每取封裝貯以荆箒。中閒多附己物壓損鋪馬。乞以站船腳力應付便益。省部議得今後凡取軍人封裝者。令各路正官權其斤重。用印關防。依例應付鋪馬。脫脫禾孫嚴加檢察。若有附帶物貨。沒而罪之。行移合屬依上施行。是月御史臺奏。薛禪皇帝在位時。御史臺行臺廉訪司官之任二千里之外者。驗品秩給驛。今乞照依舊制就於啓行之處給與鋪馬。奉聖旨準。本臺呈省送兵部欽依施行。仁宗皇慶元年二月十一日。中書兵部照擬至元二十八年三月四日。奏準聖旨各處來使省給鋪馬斟酌令去。又二十九年正月二十三日。都省定擬減定遠方之任官員鋪馬數目。如通河路給以站船。非水站則自備腳力。至河閒真定。然後官爲應付鋪馬。今內外諸司差使浩繁。京畿站赤難於供給。合遵舊制減定數目施行。都省準呈。一品元定八疋。今擬五疋。正從二品元定六疋五疋。今

擬四疋。三品四品元定四疋三疋。今擬三疋。五品已下元定三疋二疋。今擬二疋。是月中書省準四川行省言舊制任回官員水程給船陸途應付長行馬芻粟今改前制以人夫腳力送之差及百姓不便請依舊制應副又江浙行省咨任回官員每船一隻陸路更給站轎一乘人夫二名今二品與巡尉人員一體得船一隻尊卑失序擬合欽依已定品給應付相應湖廣行省又言八番順元等處任回及身故官員家屬相離大都七十餘里若與河南腹裏官員一體自備物力優苦不侔又據御史臺備各道廉訪司言雲南福建兩廣等處赴任官員歷涉險阻度越荒僻及至任滿或身故者家屬往往無力回還合無欽依先奉聖旨應付站船庶不負朝廷優恤遠臣之意各言如此送據兵部照到至元二十五年二月十三日都省奏準聖旨定擬應付福建任回官飲食常行馬疋芻粟之制三品以上正從不過五人馬五疋四品五品正從不過四人馬四疋六品至九品正從不過三人馬三疋又元貞二年七月八日奏準聖旨定擬應付雲南福建任回及身故官家屬站船之制一品二品船三隻三品至五品船二隻六品至九品令譯吏宣使等船一隻今來參詳遠方任回官員及身故家屬合依前制陸路應付長行馬疋芻粟水路站船出還本貫相應都省準擬施行又兵部議擬各處差官押運諸物如站船未得交換止於轉集要津或州府都會處存止仍恣行省今後量程責限須要依期赴都不許蹉打紅隻行下合屬禁約都省準

擬施行。又禮部呈何元閔陳言。諸有司提調站赤錢糧圍岸水利打捕急遞鋪道路橋梁等事。往往委付子弟吏卒無役之人。不時計點侵漁爲害。今後理合禁止令各官親治爲便。省部議得隨處站赤及諸庶物例。合職官親行提調。若差無役之輩。不時計點求取錢物。宜準所言禁止。今後關會總司公同連署躬親計點相應。遍下合屬依上施行。又大都路驛言。近起馬遞送土番宣慰司使臣監藏兀卽等至良鄉驛。所發駝駄鋪馬四疋。俱約重二百斤。及其回程腰脊損傷。至今不能當役。今後如遇僧人出使西土。合令當該脫脫禾孫與宣政院官眼同監視。權其駝駄斤重。方許起馬。庶幾便益。省都議得分揀西番給驛禁約駕駄過制。已經奏準聖旨。行移宣政院及諸有司欽遵訖。今據前言。可照已今事理施行。三月七日。河東山西道宣慰司備冀寧路申。諸王鐵木兒不花。差曲里麥思等二人。乘驛徑赴忻州等處開讀令旨。和買湯羊。初無坐到數目。止從差人多寡爲則。情弊難明。又不見各投下境內買物給驛通例。乞定擬遵守事。兵部參詳。今後如遇本位下合用湯羊。從王傳官明白開寫數目。移文本處總司下合屬依例兩平收買。既不出境。不須給驛。都省準擬就行合屬依上施行。十月通政院奏。在先除軍情外。其餘不急軍上來。使令太師月赤察兒分揀經由和林之使令丞除答刺海分揀。今朝廷遣使出外不急者。乞令臣等分揀軍上來。使令迭里哥不花。鐵木兒不花。忽刺出等分揀。除軍情急事外。不令乘驛。奉聖旨準。

二十九日參議中書省事。禿魯花鐵木兒郎中欽察等奏。近者或有官員亡故。官爲出殯。蓋搭路祭於百姓之家。科取諸物。至甚搔擾。復令鋪馬遞送靈櫬者有之。似此理宜革罷。奉聖旨是也。今後此等皆令住罷。勿得再行。都省欽依施行。五月十三日中書省奏。去年罷通政院時。以失兒苦魯迤北蒙古站赤。令和林省掌領近南者。上都留守司領之。既而復立通政院。管領蒙古站赤漢地者隸于兵部。皇帝行幸上都。諸王駙馬使客。蒙古兀魯思各千戶及軍上使臣來者。乞令通政院應辦宿食之事。以鋪馬屬之。兵部掌管。奉聖旨從之。是月中書兵部照議。近據監察御史言。寶雞鳳等處令人戶顧賃腳力。應付雲南四川之任等官。又雲南右丞阿忽已乘鋪馬復需車力。每輛令百姓出馬十疋。陝西行省平章哈刺孫之任。該起正馬九疋。兀刺赤三疋。多起馬二十四疋。雲南四川之任官員。從大都應付站車至安西興平分道。別無更換。科取於民。每車一輛用馬八疋。或驢一十六頭。擾民不便。自皇慶元年二月爲始。四川廉訪使夾谷之任。援鞏昌總帥府達魯花赤闔關木例。於都省請給站車一輛。又節次應付之任站車不一。以此參詳雲南甘肅四川之任官給驛已定品秩之制。所據裝載行李家屬車輛。別無定到通例。中閒品職不同。多寡無定。本部何以遵守。況兼此事。又似泛濫。將恐害於站走。深爲未便。今後擬除行省平章應付站車二輛。左右丞參政一輛。餘官皆是外任。不須應付。呈奉省準依上施行。六月良鄉縣提調站赤達魯

花赤迷里火者等言。至大四年十月七日。有陝西四川甘肅行省馳運鈔本。用鋪馬一百二十五疋。爲馬數不敷。於押運官處稟說用馬七疋。貨車七輛。拽車用馬四十九疋。通計五十六疋。遞運前去。省減鋪馬六十九疋。皇慶元年四月二日。甘肅省和糴糧鈔三運。每運用馬六十三疋。回馬二十一疋。計八十四疋。欲行前策。不果。到將鋪馬損傷。今後裝運鈔本。若容依前用馬一疋。顧車一輛。載鈔一十五駄。用拽車馬六疋。每運可用馬二十八匹。省減馬五十二疋。實爲官民便益。省部準擬。行移合屬依上施行。事若急速。不拘此例。八月十六日。監察御史哈散沙奏。回回地界取駱駢西馬驥子虎豹藥物之人。無非徼功幸賞。乘驛美食。而行買賣之私。宜罷此等。勿令前去。又自彼方貢獻虎豹等物赴上。至此給馬館穀。有逗遛一二年不去者。合亟返之。奉旨若曰。題說甚善。來者速遣回。此閒亦無令人去。是月中書省準陝西行省咨。奉元路脫脫禾孫呈。亦都護高昌王位下差都事雷澤宣使朵兒只二人。起馬二疋。資本位下王傳差劄前去大都進賀表章。若便應付。慮恐差池。送兵部議得。今後出使人員。如無欽賚御寶聖旨圓牌。毋得給馬。都省準呈。九月十五日。兵部尙書脫忽解奏。昨日寬徹院使及阿魯傳旨。兀曾兀解探寶骨殖無力出殯。令省部斟酌給驛。緣今春省官奏言整治站赤。已嘗奉旨禁止鋪馬出送靈輶可否取裁。奉聖旨毋與之。今後似此去送靈輶。諸人皆不得給鋪馬。朕雖令與。卿亦回奏可也。十一月十八日。中書省

奏樞密院官鐵木兒不花言。所隸軍士至脫火赤之地。凡三十站。每站備駒馬二百疋。牝馬五十疋。首思羊二百口。帳房二十。陳設之物不等。皆軍人之物力也。其始以民戶立站首思。並降官錢。今軍站之役。皆自己出。安有不困乏者。乞令軍人出備當站馬疋。其餘首思羊二百口。及陳設什物。依百姓例支與官錢。臣等議當存恤。官爲應付鋪陳。以彼方抽分羊肉。每站各支二百口充首思。更或不敷。從此給錢令行省買與之。又奏去年西面川兩接界地。今軍當站至甚貧乏。往者軍站各別。乃蒙立站赤之役。已嘗遣使至甘肅行省督令追復元戶。有闕則僉補百姓。未見回報。今諸王寬徹暨司徒闢闢出太傅鐵哥塔失鐵木兒知院等會議川地東西兩界所置驛站。預宜斟酌給錢買與馬驥。仍於近境官羊內支撥供應。以濟軍站物力儘用之外。或遇諸王駢馬。及使臣往來數多鋪馬不足。則令附近軍人增置。至於闢役蒙古站戶從行省。與諸王南忽里寬徹委官追收以復初役。至日具奏上悉從之。是月江浙湖廣行省言。本省凡起運諸物。每運乘船七十八艘。經涉江河。更換盤載。必用人戶往來管視。設如所委人員在途病患。失於照應。事係利害。比之甘肅雲南四川和林行省事體不同。今後押運諸物人員。請量給鋪馬二疋。似爲便益。都省議得。江浙江西湖廣河南陝西等處行省公差宣使押運官物赴都斟酌。所運物色獨員不能照略者。許給從人鋪馬一疋。其餘使臣依舊例應付施行。十二月二十八日。中書省奏諸王公主駢馬各

官授下。先爲撥與江南田地。有請給驛徵收子粒者。已嘗奏準禁止之。今忽勝海妃子之女班丹公主。亦欲差人江南催租。將元降付鋪馬聖旨來請給驛。似此私務。恐違治體。乞禁止。仍拘收所執鋪馬聖旨。奉旨皆令拘收者。是年中書兵部照議雲南四川之任回還官員腳力不便事。今後照依行省官之任車輛通例。如遇不通站車去處。所在官司驗各官實有家口行李斤重。每車一輛。和顧驢六疋。如無以馬四疋更接遞運。仍約束禁治多餘取與科擾。就令監察御史廉訪司官嚴加糾治。如蒙劄付御史臺移咨四川雲南陝西行省。照會相應。都省議得雲南四川行省之任官員鋪馬。已有定數。合得腳力車輛。除設置站車去處依例應副。如遇山路不通。所在站赤。每車一輛。例給鋪馬四疋。餘準部擬施行。二年正月十五日。參議中書省事不花。特奉聖旨。朕采郭完者篤之言。謂往來使臣。筆撻站赤。其民良苦。中書其移文整治。毋令站赤被害。欽此。省部移咨行省。及下宣慰司各出文榜曉諭。出使人員。毋得輒將管站官吏人等。非理笞撻。管站之人。亦不得因而怠慢失悞。鋪馬首思違者究治。二十六年知樞密院也先鐵木兒等奏。福山海牙新除雲南萬戶。自都至雲南一萬餘里。乞依管民官赴任例。三千里外軍官亦與鋪馬奉聖旨。卿等言是矣。軍官比民官尤爲辛苦。可諭省官。但是軍官赴任。依例給馬。是月和林總管府推官張奉訓母喪丁憂。本省已經斟酌應付腳力外。兵部議得嶺北和林。乃邊遠酷寒重地。別無旅館。險阻艱。

幸不可勝言。特與他方不同。除張推官起發去訖。今後本省又所屬官員親喪丁憂。卽係以理去官。若令自備腳力出還中原跋涉良苦。量擬應副站車一輛。都省準擬依上施行。四月七日御史臺奏。陝西行臺咨前者奏奉聖旨。增設監察御史四員。察院書吏四名。其差遣鋪馬聖旨。合增八道。計馬二十疋。臣等以爲旣增監察書吏。鋪馬亦宜增給。奉聖旨可增與之。二十一日中書省奏。樞密院言軍官之任。請依民官例給驛。兵部謂各處鎮守軍官承襲父兄職事。初無應付鋪馬定例。難同流官之任。奉聖旨如兵部所擬軍官之任。不得給驛。二十九日御史臺奏。中書省總領百司御史臺扶持眾務。在前爲省臣等。不達此意。惟圖沮抑臺察使不得行其政。謂如阿合馬桑哥阿忽解三寶奴等專權擅政是也。今聖天子在上。幸無似此之人。乘此之際。臺察之政有不便者。合更新之。使政行事治。百姓乂安。前者有旨令臣於中書省議事。臣嘗言三事窒礙臺察者。其一風憲用人多是清苦無力之士。赴任之閒。相去二千里以上者。許給驛。雖少百里不及。卽不得給。是故困滯莫前。各處常是闕官。不能扶助政事且亡金一小國耳。其委付臺察官員。不以遠近皆與驛馬。蓋以其司存於國於民有益故也。乞自今後臺察之任官員。不以遠近往回。咸許給驛。奉聖旨準。六月七日御史臺又奏。臺察之任官員。往回咸許給驛。其始行則從此給降。起馬聖旨。到任之時。仍復繳回。設如任滿得代。及有事合赴闕庭者。不可於此再給。乞令賚照各官所受。

宣勅爲之憑驗。所司依元去驛馬數目給據應付似爲便益。奉聖旨準。二十二日中書省奏諸王妃子公主駙馬及千戶各枝人員有事奏言輒起鋪馬或乘己馬前來大都害於站赤糜費芻粟乞照在前之例諸有事奏言者以夏月草青之時令至上都奉旨準且曰若不奏知勿令輒入大都都省欽依施行。

是月江浙行省咨福建宣慰司言。庶官致仕者。寄食遠方。風土異宜。懷歸無力。比之任回身故官員家屬。亦合一體優恤應付腳力。省都參詳任回及身故官員家屬已有定例。其遠方以理致仕官員擬同一體。

應付腳力。照會各處依上施行。
九月中書省奉旨札刺兒台昌童已死。可斟酌應付鋪馬。送至其地。欽

此尙書脫火解員外郎關關出奏曰。札刺兒台昌童之死。上命給驛送之。曩者嘗奉旨似此遞送骨殖者。

勿與鋪馬。今昌童乃老臣也。何以處之。上曰然。則勿與是也。都省可移文諸官府。今後不以何人但送骨

十月十四日中書省奏。近年以來。諸王位下使臣。初無給驛定額。每起一
殖者。勿得給驛。欽依遍行訖。

百疋之上。沿途站亦困乏。到部蠹費錢糧。臣等會議於脫火赤八秃兒寬徹之地。擇廉慎人充脫脫禾孫。

合賜物力津遣。今擬選拜住怯薛內札撒孫唐兀解。充迤北悅火赤悅脫禾孫。武備寺阿八赤。充寬徹脫。

脫禾孫副之者各一人。識會文字吏二名。鑄給印信。斟酌物力發遣。可否取裁奉聖旨準。十五日兵部

呈見欽奉聖旨印訖普賢行願品疏抄科經文分散諸路使者合起鋪馬五十一疋照得別無欽賚起馬

聖旨。呈省給降都省。照擬至大四年三月十八日。欽奉詔書拘收應有執把聖旨令旨。諸寶物爲驗者。毋得給馬。不應差使管幹已私罪及給寫判署正官。欽此自至大四年十月至皇慶二年七月。功德使司及提調印經官。節次遣使送經計四十五起。給馬二百七十八疋。載經站車一百七十六輛。事誠冗濫。今次所差人員多因探家營私。初非公選。必致擾亂。僧俗侵損。站赤合令各處回使就便押經俵散。不惟省減鋪馬首思。抑且僧俗無擾。今後上命布施經文。從提調官照斟所指去處。關發合干部分。呈省依上發落。便益於十九日奏準聖旨。依上施行。二十三日中書省奏。唐兀解阿八赤等。各充脫火赤寬徹地脫脫禾孫之職。前去所據起發物力。唐兀解阿八赤各與鈔四百錠。其副二人各與鈔三百錠。吏四人各與鈔二百錠。衣服番皮弓箭鞍轡家屬口糧。斟酌津遣。預借一年俸鈔。鑄給從三品都脫脫禾孫印信宣命。仍給鋪馬聖旨。每一人一疋二道。二疋二道。奉聖旨準。是月朶解禿堅不花奏。臣自五臺往復。據站戶告言。嘗有使臣四五輩。白日過站食訖。首思羊世祖皇帝聖旨。使臣白日經行飲以馬漬解渴。夜宿則給首思。似此若何。奉旨若曰。可依薛禪皇帝已降聖旨定例。言於中書省施行。且令通政院整治之。若不遵行。乃通政院官怠慢之罪。十一月浙江省咨會福院爲玉山普安寺。大護國仁王寺。闕少供具。本院官安普就杭州給價。令兩浙都運采兒只置買奏啓聖旨。皇太后懿旨。令江浙行省應付站船遞運。會福院徑

咨本省及朵兒只呈索遞運船三十隻。本省照擬爲會福院。不經都省徑直行移。於例未應。若候移文咨會緣奉上命成造物件。應副船隻事意。會福院差官守候起運。除下杭州路會計物數應副外。其事干繫站赤通例。又有續起船數移咨照詳回示都省。照得皇慶二年九月三日奏準聖旨。但是干礙省都公事。毋得徑直移文各處。今普安等寺供具什物。旣奉上命成造起運赴都。別難議擬。所據會福院不經省部徑咨行省應付站船一節。若便取問。卻係奏準已前事理。下兵部就行會福院照會施行。十二月嶺北行省檢校官李廷玉母喪丁憂。本省應副鋪馬一疋。站車一輛。兵部照議嶺北省及所屬官員親喪丁憂。例合應副站車一輛。中閒品級尊卑不分。今來參詳。合無比依至元二十五年。元貞元年。奏準福建雲南任回官員品級站船定例。一品二品車三輛。三品至五品車二輛。六品至九品令譯史通事人等車一輛。應付回還。其任回官亦從此例。似爲便益。據李廷玉丁憂腳力不應濫給鋪馬事已往矣。今後若復似前違錯。當該首領官吏取招議罪相應。都省準擬下兵部依上施行。

站赤 六（永樂大典卷一萬九千四百二十二）

經世大典延祐元年二月十一日同知通政院事燕鐵木兒兀魯思不花奏乃者木憐等三十二站消乏故議遣使賑給鈔二千錠米二千石今聞關闢出掃憐之外六站困乏尤甚貧戶之糧力不能致乞令站戶之有牛驅者爲之運送奉聖旨準都省給降鈔米從通政院遣使給散去訖二十五日中書省奏關闢傳旨先立中政院時曾與鋪馬聖旨在後革罷中政院其聖旨盡行拘收尋改立典內院復給起馬聖旨今中政院既復立可將典內院鋪馬聖旨於都省送納以前時拘收聖旨同付中政院欽此竊照先立中政院計與一百一十三匹共四十道聖旨典內院減半給與五十六匹二十道聖旨今將典內院名字所與者拘收冊寫中政院名字八十四匹聖旨與之若何奉聖旨準是月保定路言定興等驛至柏鄉皇慶二年旱災人民至食木皮草葉路當南北衝要使客繁多車力不敷鋪馬損斃站戶當役不前逃竄者眾若不補換賑濟誠恐墮廢站赤都省議得良鄉至柏鄉馬站一十二所車站六所每馬一匹支芻粟錢中統鈔三錠車一輛支鈔六錠總支六千三百錠以賑之奏準聖旨差官馳驛同各處正官點視各站實有車馬數目欽依給散所據在逃人戶督勒合屬招諭復業馳鈔腳力依例應付三月十五日中書

兵部準提調印經官關。欽奉聖旨。已印經文。選速古兒赤王安童寶兒赤脫火赤等。前去江西江浙等處散施。請給驛事。又都功德使司關奏。準杭州所進品次錄等經文。委毛法師徒第二人送至李王朝。漢河西僧寺。合用站車鋪馬。省部應副。都省照擬。去年差官諸路送經者四十餘起。猶有未回。保定等站。因值水旱之災。人戶逃徙。其送經人員多因還家營私。既非公送。必擾僧俗。一則郡縣迎接。妨廢公務。二則出無定處。恣其所向。三則事無程期。經年不返。站亦消乏。皆由於此。二十七日奏。閒者遣使降香念經。所過行省路府州縣迎接。科斂僧寺錢物。以此之故。嘗奏所差者每至城邑。與行省官開經焚香纔畢卽回。及將印訖經文。就命各處行省來使因便附去。今提調印經官復奏專使前去。臣等議得。各處似此送經者太多。又蹈迎接科斂之弊。今後宜令提調官明具經數所散何寺。從中書省公差有職役之人送至行省。轉遞散施。似爲便益。奉聖旨準。都省欽依。送兵部施行。閏三月二日。崇祥院使野訥等奏。所管平江鎮江兩路常住錢糧。各設提舉司幹辦。每處請給常行鋪馬二匹。站船二艘。奉聖旨鋪馬令翰林院書寫聖旨給與。站船取於江浙行省。及翰林院出給站船鋪馬劄子。後關兵部照驗。本部呈上項提舉司係外路五品。未有給降鋪馬站船劄子通例。似難議擬。宜從都省移咨江浙行省。并劄付崇祥院拘收。照會翰林院欽依。禁止相應。都省檢會諸衙門不得隔越。中書省奏事之制。送兵部欽依。

施行。六日中書省奏寬徹言塔失之城立站。去年奏準支給駱駕一百隻。馬三百匹。以充轉送。隨有使臣自哈兒班答來進豹子者。盡數起發鋪馬。其時馬馳方從遠來。脰力未充過川。其閒斃者大半。未免將軍人馬匹當站。今存者又無幾矣。臣等議謂死損鋪馬。不可不補置之。如令行官驗其倒斃之數。給價和買補置。庶幾便當。上從之。又奏哈兒班答也先不花等使臣進送葡萄酒來者實頻。驛傳勞費。乞諭典酒之官。今後如何較量供送。與都護府官議奏裁處。奉聖旨準。是月江浙等處行中書省言本省總攝兩浙江東福建四道地廣且重。使客頻繁。近據杭州路照勘到在城馬站。見在使臣五十三起。日支分例計中統鈔八錠。一十五兩有餘。皆是各位下差來印經蓋寺。成造供器。催徵田糧等事。每起給馬三五匹。驛舍充滿。僨賃民居。動經年餘不還。日乘小鋪馬一百三十餘匹。常支羊肉分例。馬無停閑。戶多死徙。蓋是各位下及在內官府不經都省徑直遣使給驛。以致斯弊。又有於所起馬內轉移摘撥。換易關文。或冊增兀刺赤等馬匹。因循不便。宜從都省立法闢防給驛。優恤站赤。省部議得各位下及諸官府除軍情錢糧急務。量事給驛。禁約出使人不得於所起馬內轉行摘撥。冊添兀刺赤馬匹。行移徽政院及合屬依上檢察禁治施行。又大都驛及舊運糧提舉司步站所言。各站驥馬倒死。人戶逃竄。今年旱澇闢食。乞接濟事。都省以大都之驛繁劇。甚於他處。量擬每馬一匹。日支陳紅粟五升。舊運糧提舉司步站所拽車。

驥。每頭日支粟二升。接濟兩月。大都驛馬九百八十八匹。每匹日支粟五升。兩箇月粟二千九百六十四石。驢二十頭。每頭日支粟二升。兩箇月粟二十四石。舊運糧提舉司車五百八十九輛。每輛驥七頭。計四千一百二十三頭。日支粟一升。兩月支粟二千四百七十三石八斗。步站所車一百九十四輛。每輛驥八頭。計一千五百五十二頭。兩月支粟九百三十一石二斗。四月三日。中書省奏給中統寶鈔一萬錠。賑濟西番站赤。初皇慶二年十二月。擲思班武靖王令旨。言於宣政院。謂烏思藏。朵甘思。朵思麻。三路站赤。近年以來。馬匹病死。人戶貧乏。請聞奏賑濟事。本院啓奉皇太后懿旨。令興都省同議賑濟之宜。檢會得至元二十九年。元貞二年。小只愛亦伯朵甘思烏思藏等站。經值寇擾。中書亦嘗給降馬牛寶鈔。差官接濟。今烏思藏等除小站七所勿論。其大站二十八處。遞送西番布施。來往之使實繁。人戶數少。驛程近者不下三五百里。年深未曾給惠。省院公議。依例接濟。又爲在京錢物不敷。定擬二十八站。各給中統鈔三百錠。總計八千四百錠。若或不足。就於宣政院所轄西番課程錢物內斟酌增給。都省官啓奉皇太后懿旨。宣政院官晤普等言。前站重困。非增多賑濟不可。宜支鈔一萬錠以與之。至如西番出產物貨。及供奉於我者。亦可增與整治。站赤敬此。奏奉聖旨。準上給降賑濟去訖。七日。中書省奏。通政院言。脫忽脫大王位下。撥出鐵里干站。自關斡禿至小只。凡一十驛。今春值風雪沙土。鋪馬多倒死。站戶乏糧祇應。無從

所出。若不少加接濟。愈見困乏。今議每站各與白米百石。中統鈔百錠。令上都留守司通政院差官給散之。上曰可。五月八日。中書省奏功德使司言。奉旨遣答里馬失里等前詣杭州懶靈等寺降香。請給鋪馬。臣等議得。五嶽四瀆名山大川。歲時降香。固當乘傳將命。其餘小寺院。或所不宜合。無罷行。上曰。答里馬失里勿去。省差宣使一人可也。對曰。此等寺院非大刹。上位如此致香。恐不宜。上曰。朕實命之。但勿令僧司遣使。從爾差宣使賚行。今後似此令人降香。爾再奏者。又奏杭州所進八藏經文。前者月魯鐵木兒奏。令送至河西之地。移文省部逐旋發去。今又奉旨復送六藏經文前去。所慮大都迤西驛傳遞送西番僧人舍利往返頻數。困乏莫甚。請停六藏經。俟秋收之後。徐議發去。奉旨今姑止之後。收量各站氣力。逐旋遣送。十七日。中書左丞相阿散等奏。保定真定二路所轄定興至柏鄉十站。去歲值災。田禾不收。站戶貧乏。逃徙者多有之。若不整治。誠恐墮廢。風憲有司屢嘗陳說。今擬至大四年已前逃亡消乏站戶。於相應民戶內僉補。委真定路總管馬恩忽。保定路總管教化二人提調。毋令動眾。其在皇慶元年已後逃徙者。招誘復業。六月十二日。中書省奏。御史臺言。奏準行臺及廉訪司官之任。今後不以遠近。往回咸許給驛。其去也。則從此給降起馬聖旨。回時驗所受宣勅。但令所受宣勅。但令所司依元去驛馬數目給據應副。臣等議得遠方地面之任。回還合與驛馬船隻。已有定例。乞只依先例行之。奉聖旨準。二十二

日中書省奏。在前典瑞監除掌金字圓牌外復有鋪馬聖旨三百餘道。至大四年將此聖旨納于翰林院。以此金字圓牌遣發不敷續已奏請增置五十面。自去年以來但干細務并商價之事皆佩圓牌而行。至今未收入者有之蓋圓牌遣使初爲軍情大事而設豈可濫給。自今餘事求給牌面不經中書省樞密院者宜勿與。上曰卿等先取勘數目安有此理。今後只令軍情公事差使者。二十三日中書省奏先爲西邊過川兩界軍人馬匹傳送頻數物力消乏已嘗奏准各與馬三百匹駱駢一百隻以當站役尋值風雪勞苦喪馬一百九十九匹駱駢二十四隻。今甘肅行省來請補置臣謂彼方川石之地馬駢之斃可知若不補置必損軍力。宜令行省隨所闕者補之不敷之數卻用軍人馬匹添助。上曰可。七月十八日中書省奏前者以西邊川地軍人當站消乏奏準令甘肅行省買馬駢應副支遣仍追復蒙古站戶當役。今本省回咨欽遵上命追究元當站員吉刺準行哈等戶仍令復役及於曲尤沙州瓜州上戶內僉補一百戶以充察巴站役既而諸王納忽里執把聖旨云屬本位下種田戶有司不得侵犯於所僉站戶內指揮位下戶計者取去。咨請照詳臣等謂元降聖旨止以百姓數目屬之豈可不令當站合依元僉民戶仍復其役奉聖旨準。是月中書省奏邇者議將元僉站戶發遣答失城當站數內有四枝滅吉憐民或稱屬阿八赤昔寶赤因以避役者據諸王南忽里來文稱當時百姓眾多故充阿八赤昔寶赤今百姓數少合令

當站。此議誠然。又減吉憐民有散居各處者。宜從彼省與南忽里差人收聚。悉令當站奉聖旨準。十九日中書省奏。整治迺北軍力。令聞鐵里干站地草生。計時合給戍軍錢物。須藉站力遞運。公議自大都至李陵臺。漢地之站。各與鈔一百錠。鐵里干至和林蒙古站。各與鈔二百五十錠。桓州灤陽兩站。各與鈔七十五錠。總支鈔一萬錠。前去給散。上曰可。二十四日中書省據御史臺備西臺監察御史言。甘肅納憐驛係蒙古軍人應當專備軍情急務。其餘非關緊要。但懸金銀圓牌。往往取便經行。若不禁止不可。下兵部通政院議。今後除懸帶金銀字牌面通報軍情機密重事。使臣使行納憐站道。其餘一切出使人員。俱合兀魯思兩道。漢站遞送及葡萄酒。依在前年分令駝驛般運至漢站接遞赴都。誠爲便益。都省準呈。二十七日中書省奏。乃顏叛亂時。水達達女直等站皆廢續爲進呈海青。故收聚舊來站戶。及僉撥開元路編民乃顏戶計。同當站役已經奏準。世祖皇帝聖旨。但是已當定站戶諸人毋得替換。今遼陽行省來言。開元路官以王雪兒等驛程遙遠。擬於水達達萬戶內撥一十五戶更代王雪兒等。共當站役。蓋緣前站乃世祖皇帝定制。毋得替換。是則水達達戶內不當差撥。止合王雪兒等依舊當站奉聖旨準。是日中書省又奏。西番僧乞刺思八班等六人。元起鋪馬十一匹赴都。今欲回還。止有三人復索元來馬數。兵部止給八匹。駕駛過重。行至涿州爲監察所劾。每駄稱斤一百七十。事下刑部詞伏。擬杖六十七。宣

政院官俺普言于上曰。是僧遠來所將囊橐乃上所賜物也。以此過重。請增鋪馬三四匹。速令回去。奉旨準。又奏西番僧人駄子定製一百斤之上勿令負載。今所駄過制多索鋪馬三四匹。罪當六十七。臣等以爲僧人權擬免罪。多索鋪馬不可復給。若有御賜之物。則從驛傳。每駄不過一百斤。其餘餽贐之貨。不得以官力行。上曰可。又奏沙瓜州立屯儲總管萬戶府掌管屯田公事。請給差使鋪馬聖旨。內起馬二匹者二道。一匹者四道。奉聖旨與之。都省送兵部行移翰林院。欽依譯寫給發施行。是月。兵部呈爲保定中出真定等處站戶消乏。西僧給驛繁數。人馬被害。宜從都省劄付宣政院。行下土番宣慰司都元帥府移咨陝西行省。令臨洮府等處脫脫禾孫欽依累降詔書分揀禁約。毋致泛濫重載。及令御史臺照會廉訪司查勘各站遞運使臣糾其非違。都省準擬施行。十一月二十六日。翰林承旨滅怯禿等奏諸府官各枝遣使先定鋪馬。賚別里哥來索起馬聖旨。從之則爲數過多。不與則懼違上命。今後乞依都省定例隨其品秩。出給鋪馬無品級怯薛人員給馬四匹以下本院議書四品以上者奏。又其餘官府不經都省照奏。通政院言納憐一道二十三站人戶闕食。請接濟事。臣等議得當站之人各與三月口糧。近倉者給以米粟。去倉遠者量價給鈔。上曰可。都省遣使與甘肅省委官親詣二十三站取勘戶數。每戶五口爲則。少

者從實。大口月支二斗。小口月支一斗。接濟三月口糧。就於各處附近倉分見在糧內支給。去倉遠者。照依時值準支官錢。支訖米三千七百六十七石四斗。鈔五千二百七十三錠二十兩。是年冬。通政院準也可札魯花赤口干僉通政院事那懷言木憐站迤裏苦鹽泊至劄哈站。今歲天旱。禾苗不發。戶口饑餓。鋪馬贏損。凡有使客。靡不失悞。所以賑濟人馬芻糧者。院官其圖之。又據興和路脫脫禾孫申。苦鹽泊至燕只哥赤斤等四站。經值霜雹。阿察火都至寬迭憐不刺等五站。自春至秋。旱暵無雨。禾草不生。站戶消乏尤甚。皆請接濟糧料。本院關兵部照九站實有戶口馬匹接濟米粟。似望不致廢斷。本部以前站卽與川中察罕懸赤海等一十七站接連。彼既接濟。此亦一體。具呈中書省區處。都省奏准。每站各與糧一百五十石。令通政院差官同河東宣慰司官前去體勘。分別端的。貧下站戶就與附近官倉支付。去倉遠者。驗時價給鈔賑之。二年正月。翰林院欽奉聖旨。換寫諸王沙藍常川起馬四匹聖旨。除欽遼外錄連漢字檢目呈省。都省尋議拘收行據本投下。隨路民匠總管府中。年例五戶繇於大都關支。其陝西奉元路所設打捕鷹房民匠總管府掌管怯憐口戶。辦納軍器皮貨物色。及河南府路人戶賦稅。每年差官欽賚起馬四匹聖旨。前去各處催徵。於八月內特奉聖旨。令沙藍大王赴迤北稱海住。冬去訖。卽日春首。方當催辦。如蒙照依前例給降鋪馬四匹聖旨備用。似不失悞。今賚元降起馬四匹聖旨一道。回納省庫收貯。

省部議得本位下元給起馬聖旨。既以拘收。今後果有合行差使鋪馬。從本府申部呈省應副。二月二十四日宣政院奏。諸出使西番者。自京兆臨洮府附帶碧甸子銅器。椀楪。靴履裝。駢鋪以營市利。如此冗濫。合令京兆臨洮府泥河所設脫脫禾孫提調檢察。東有商販之物來使科罪。其貨沒官。奉旨準。是日中書右丞相鐵木迭兒等奏。諸王公主駙馬頻數遣使前赴西番之地。以故站赤困乏。若不奏聞。恐宣政院隔越中書遣使。乞令省約奉旨可。委臨洮府能幹脫脫禾孫一員提調。二十七日中書省奏。前者翰林院奏奉聖旨。今後依都省定例。隨品秩出給鋪馬。無品秩怯薛人員。給馬四匹以下。本院區處。四匹以上奏。臣等已準來文。今議依先例。諸王附馬。并蒙古各千戶。合給鋪馬聖旨。翰林院議之。除此之外。諸官府庶務遣使。乞依舊制。令白於中書。然後行之。制可。是日中書省又奏。去年典瑞監爲差使。金字圓牌不敷。增造五十面。當時曾奉聖旨追究。往前已發未納之數。且謂今後非軍情事。不得差使。未幾典瑞取勸。初置圓牌。總二百七十二面。自至元十五年以後。給付諸人未納。及值諸王失列吉要木忽兒等叛亂。賚帶前去。或爲兀魯思隱占行使者有之。難以窮究。以此世祖皇帝不用舊來門面。別置此項圓牌。及造小圖書鈐印馬數以爲記驗。今請依前旨。金字圓牌除軍情大事外。不令差使。似爲便益。奉旨是也。宜令追之。都省欽依行。移各處照會施行。是月嶺北行省咨。任回官員腳力止依品級應副站車。邊方酷寒。

重地。實比雲南。福建。風土不同。若依舊制應副元來鋪馬站車回還。庶見優恤。省部照擬元行舊例。職官依驗元去鋪馬站車數目應副。令譯吏宣使人等。元給鋪馬二匹。內量減一匹。卻就站車一輛回還相應。回咨嶺北行省。依上施行。三月二十四日。通政院準木憐阿失不刺察罕忽魯渾察罕悉亦海三站言。從壬子年至今天旱。芻草不生。去年遞運軍器。雖曾給散鈔物。皆以銷用。自冬徂春。連值大雪。黑風飄散。積草鋪馬缺食倒斃。所存不過二三十四匹。以供走遞。大率羸瘠。亦將死損。馳驛者既已失悞遞運。又且住滯。站戶及妻子往往饑餓喪亡。乞救濟事。本院關部議得。川中阿失不刺等三站。接連嶺北一道。通報軍情緊重急事。擬合斟酌接濟。具呈中書省議得。每站增給馬五十四匹。准支價錢中統鈔三百錠。從通政院委官關領前去。同河東宣慰司官給付各站買馬當役。仍接濟米糧各一百石。以給貧下站戶。就於靜州等處倉內放支。其去倉遠者。驗時直準鈔與之。於四月十七日奏奉旨準。二十六日。中書右丞相鐵木迭兒。左丞相阿散等啓於皇太后行幸之時。沿途納鉢。常令準備車輛。或先期一月之前。膏車秣馬俟候。致令頭匹損瘦。又奪農時。臣等今議起發之時。各枝合與車輛。就此應副。其沿途納鉢增索之數。不須與之。已奉聖旨準奏。故再啓請奉懿旨勿與可也。都省敬此。送兵部依上施行。是月江浙等處行中書省言。平江路站亦多有各投下差來使臣。催徵撥賜田糧。日乘鋪馬。坐食分例。動經半載不去。其田既有差

設莊官。合無定擬。不須差官就令莊官將收到糧斛變鈔起解。實省鋪馬祇應。請區處事。省部議得所言。出使人員乃在都徽政院等官府所遣。而各處俱有所屬之司。回咨江浙行省照勘差去官委有所屬司存。照依定例。大事應付首恩鋪馬八日。小事三日。餘外不許支給。其無所屬。及各授下人員督責。有司欽依至元新格程限。早完其事。發遣以行。五月武備寺言。蒙古行營甲匠成造到。皇慶二年皮甲一十九副。照依年例於保定路取給鋪馬一匹。站車一輛。本路教化總管爲押運人。別無欽賚聖旨。不準應付。有礙起納。本寺卿闢關出等奏奉聖旨。軍器乃大事也。何故阻之。可移文都省下各路。今後納皮甲鋪馬。毋得阻當。請欽依施行。兵部以武備寺隔越中書奏事。干係政務。上項皮甲卽係年額之物。若押運人員欽賚聖旨。依例應副鋪馬。如無則以快便腳力起發。以此議得。今後軍情急務。起發軍器等物。押運人員果合乘驛者。於本路已降差使聖旨內。就便給發相應。呈蒙都省準擬。連送兵部依上施行。仍關武備寺回奏。六月二十日。中書省奉旨。遣朵解也先帖木兒亦納失里往五臺散莽齋給鋪馬一十五匹。又遣闢兒魯班丹等至五臺山開讀藏經。給馬八匹。欽此擬給金字圓牌二面。左丞相阿散。以爲舊制金字圓牌。乃軍情大事所用。今讀藏經。散莽齋恐不宜給。二十二日。尙書乞塔以其言奏聞。奉旨權宜令去。今後軍情公事外。其餘毋得行用。中書省送兵部欽依施行。二十五日。平章察乃通政院使寒食等奏。哈思哈。

那禿一十四站廢絕。奉聖旨。每站各與馬一百匹。每匹價鈔六錠。計鈔八千四百錠。都省欽依給降。委通政院判帖木兒不花。前赴各站給散訖。是年冬。湖廣行省備興國路判官朱承直言。江南赴任。及任回。官員宜令鎮守軍官巡尉捕盜官相參防送。所至於官舍宿泊。量給粥食。庶便往來。且免盜賊劫掠之患。中書兵刑部議得。鎮守巡尉司弓兵本以禦賊盜。若令防送往來官員。有妨警捕。加之各處年銷錢糧不敷。難議供給粥食。宜令所在官司驗所授宣勅文憑。止宿官舍相應。都省準擬。三年正月十四日。都功德使輦真乞刺思站班奏。奉聖旨。擗思羅師父門徒唆南監藏者。欲回朶甘思之地。本僧每年率三十眾。爲朕起建具送好事。一月其令省部斟酌應副鋪馬以行。兵部議得。所索鋪馬別無欽賚御寶聖旨。具呈都省給降。四月十二日。丞相阿散平章李道復兀伯都刺等奏。班吉斡節兒講主之下。三丹講主有疾。奉旨令同輦真乞刺思師父回還西番。三丹及其徒共四人。起鋪馬四匹。又擗思羅師父徒弟唆南監藏等六人。起馬六匹。都省見存鋪馬聖旨不敷。若與此僧亦難拘收。合無定擬西番回僧令翰林院斟酌擇節譯寫聖旨與之。奉旨准都省欽依施行。二十六日。通政院言。納憐二十三站消乏。除晃忽兒月良九站已濟芻粟外。哈溫至東勝一十四站。未有與甘肅行省非奉都省明文。率不津濟。今每站有馬二百匹。去年天旱無草。廩不贏瘠。設有軍情給驛。豈不失悞。都省遣本院通事徹里。前去甘肅省等處。給散料粟。

七千九百九十六石七斗。二月二十二日。武備寺言于中書省。本寺統領各處局院。催督軍器。舊制上都大都。各給鋪馬聖旨八道。去年拘收入省。嘗以軍器公事爲重。奏奉聖旨。累次移文兵部。請給不至。今來軍器趣起。難俟兵部取發。請依已降聖旨。早賜給降事。都省送兵部。照得皇慶二年七月二日。已經奏準聖旨。除樞密院。御史臺。宣政院。徽政院。也可札魯花赤外。其餘衙門鋪馬聖旨。皆令拘收。若議再興。似成偏負。如武備寺果有差遣。移文都省給驛。除欽遵外。合令武備寺依上施行。六月十一日。將作院使哈撒不花傳奉聖旨。朕聞諸王駙馬。各枝兒遣使至五臺降香。及西番僧人。指以降香遊五臺爲名。乘占小鋪馬站車。多取分例。使堅州臺州兩處官司百姓被擾。其令殊祥院分揀各枝來使僧人。有事者量給鋪馬分例。無事者三日之外不得給。從彼赴都之人。亦分可否給驛。中書省宣政院功德使司。皆令移文照會欽此。殊祥院移關兵部依上施行。九月。湖廣行省備廣西道宣慰司言。遠方之任官員。父母亡沒。奔喪丁憂。因病作闕。卻令自備腳力跋涉江河。若貧薄無力。畱滯邊遠。有失親喪。誠可憐憫。兵部參詳。合準行省所擬。照依已定品級。陸路長行馬匹芻粟。水路斟酌應副站船。出還相應。都省議得見任遠方官員。因病作闕。難準所擬。奔喪丁憂人員。照依任滿得代。一體應副腳力出還。移咨行省。及下兵部依上施行。是月。江浙行省咨。差撥祇應庫子。令各路照勘正貼戶。實有餘糧。除下戶外。下至十石。多者積算通。

融計日應當。周歲輪流一次。請照驗事都省準擬回咨依上施行。十月衛輝路言于河南道奉使宣撫。

及本道廉訪司。本路車站正當衝要。所設車一十五輛。遞運不敷。竊照鄰郡彰德路宜溝站額置車二十輛。卽與本路一體。兼本路水站置船三十艘。人丁二百五名。雖備而少用。奉使與廉訪司公議。摘除站船二十艘。人丁六十名。每船二艘。丁一十二名。改設站車一輛。總增五輛以備遞運。官民皆便。呈省請區處事。省部議得。旣經奉使宣撫。及本道廉訪司定論準擬。依上施行。四年正月九日通政院使末吉等奏。苦鹽泊至迭連不刺九站。消乏數內寬迭連不刺喃塔兒兩站。馬戶爲叛戶所奪。來請接濟。臣等議得彼處答吉倉見貯官糧。其閒七站。乞各與米一百石。可自取之。寬迭連不刺喃塔兒兩站。各與一百五十石。就令答吉倉佃戶送致之。仍委都事完者帖木兒給散。奉旨準。總計給米一千石。二月一日通政院使塔海忽都魯太僕寺丞幹羅思奉使回奏整治帖里干站。自阿蘭至小只一十六站。給散馬五百八匹。馳二百五十五隻。先是上命幹羅思馳驛。拘刷民間馬匹。以給帖里干站。如無則與係官馬馳。及於阿木哥掃兀阿思罕。惹刺哈兒等。斷沒馳馬數內支給。至是返命。旣而太師中書右丞相帖木迭兒平章政事兀伯都刺拜住等。又奏。前者以帖里干站消乏。故遣塔海忽都魯接濟馬馳。今聞各站頭匹又復瘦損。太后懿旨。嘗令整治之。請就上都庫支鈔五千錠。遣通政院使撒台乞兒海牙二人。前去買馬接濟。奉旨準。

都省給降鈔五千錠。買馬八百三十四匹。分給帖里干三十站當役訖。十四日御史臺奏行省官之任。除合給鋪馬。又復應副車輛腳力。今西臺赴任官合依前例鋪馬之外。大夫給車三輛。中丞侍御二輛。治書一輛。以後爲例。奉旨可移文都省施行。都省照議行省之任官除合起鋪馬外。丞相平章例給站車二輛。左右丞參政車一輛。今次御史臺奏準行臺之官站車俱爲通例不同。劄付本臺就便回奏下兵部依例應副施行。是月中書兵部照得遼陽行省懿州不應支過皇慶二年使臣上馬分例鈔四十七錠。三十二兩六錢四分已擬減駁追理。今本省咨謂出使人員上馬分例擬合減半支付所據前鈔係延祐二年十一月二十七日已前減駁之數。伏請欽依革撥已後減駁數目著落追徵。本部議得出使人員經過止宿已有祇應通例。旣已上馬又需當日分例似涉重複。合咨遼陽行省更爲照勘減駁支過分例。如委係延祐二年十一月二十七日詔赦已前事理。依準所擬欽依革撥已後不應支過數目著落當設人員追徵還官相應。呈奉省準依上施行。九月大都路良鄉驛言自閏正月二十五日涿州驛送到晉王位下來使鎖禿等四人。又西番大師加瓦藏卜等七人到驛各索走驥馬匹。提領百戶皆被鞭箠。越次選取驥馬供給。二月一日復有西番僧短木察罕不花八哈失等二十一人。起正馬三十二匹。回馬十四匹。需求走驥馬匹。筆撻站赤恃威選馬無所控訴。竊照本驛置於輦轂之下。南北衝要供給浩繁。似此被害。何以

堪命乞禁治事。省部照擬得國家設置驛傳所以通邊情備急務。近年以來諸官府給驛繁數。姑民匱乏。至於今歲尤甚。且大都南北六道站亦比之各省又重苦之。朝廷每加優恤。今此所陳良可哀憫。若不嚴行禁約。誠恐逼臨站戶逃竄廢絕站亦深爲未便。都省出榜諸站及下各路依上施行。仍咨行省一體禁治。十月甘肅行省言。本省地在極邊。往來經涉沙漠。官吏人等之任已蒙給驛。任回則備己力。人稀路迥。所過艱險。比之嶺北荒惡尤甚。如準已擬除所轄居住人員不須應付。其得出出境者照依嶺北省例。官爲給驛回還。使庶官得受均惠。無回顧之憂。誠爲合義。兵部參詳本省道逕不通舟楫。如準所擬本處土居人員不須應副。其餘任回官員腳力照依嶺北省例職官驗元去鋪馬站車應副。令譯吏宣使人等止給鋪馬一匹。站車一輛。身故家屬一體應副回還相應。都省議得。甘肅行省任回官吏除犯贓解任者不給外。餘人並依元去腳力回還。餘準部擬移咨甘肅行省依上施行。是年中書兵部言。各站設置提領止受部劄行九品印職專車馬之役。所領站戶多者三二千少者五七百。比之軍民體非輕細。得其人則戶安事集。非其人則民困事墮。柰何俸祿不給。三年一更。貪邪得以縱私。廉能無以激厲。站亦消乏。職此之由。今擬各處館驛除令丞外見役提領不許交換。敗事者依例追斷停罷。廉能者雖歷三載聽民舉畱。庶望所任盡職。站亦相安。都省準擬連途兵部依上施行。五年二月十五日中書省奏帖里干站亦。

老溫哈刺。至察罕。曲律阿答出等二十站。馬驅損斃。今議各站給與駱駝二十隻。每隻價錢中統鈔二十五錠。委官前去收買。給散各站相應。奉旨準都省差通政院經歷伯都前去買給駱駝二百七十二隻。十二月二十六日。通政院使察乃失刺脫端。僉通政院事八的兒等奏。世祖皇帝時。給發圓牌聖旨。驗差劄起與鋪馬。今來官府書立印信案驗。方準給馬。致急使住滯。失悞公事。奉旨可依舊制給與使臣圓牌聖旨。各驛驗差劄起與鋪馬。不須立案。六年正月十日。宣政院使月魯帖木兒八刺脫因答兒麻失里等奏。烏思藏納憐速古兒赤宣慰司言。往者烏思藏等站赤消乏。嘗奉上命。每站與馬一百二十四。準支價錢。今來各驛消乏尤甚。雖議於魯瓦富民之家。抽分馬匹應副。恐不能濟。乞津濟物力。又奉帝師法旨。烏思藏撒思加答籠宋都思亦思答四站無營盤。數年田禾不收。頭匹倒死。至甚消乏。藏卜八國師等并宣慰司數次移文上言。在先世祖皇帝成宗皇帝時。以此數站消乏。曾令官給物力。今宜依先例濟之。臣等議今不賑濟。直至斷絕。卻行勦立。愈見費力。乞依先例賑給。奉旨準欽此。本院具呈都省於三月四日奏。四站各與五十四馬價。每匹六錠。上從之。總計烏思藏撒思加等四站。每站馬五十四。該價錢中統鈔三百錠。計一千二百錠整。撒思加答籠宋都思亦思答。四月中書兵部承奉中書省劄付。通政院官稟說。帖里干站道內。伯只刺懸赤海兩站。頭匹倒死。失悞走遞。又苟赤人也。速答兒以己馬七匹。與伯只刺。

站添力事。於三月二十九日參政燕只哥通政院使禿魯哈帖木兒等奏。每站各與馬五十四匹接濟。奉旨準。又奏也速答兒回賜表裏。奉聖旨可賜銀一錠。以勸後人。欽此。迤北收買駒馬。每匹給中統價鈔六錠。欽奉前因。都省議得上項馬匹。委上都留守司達魯花赤只兒哈郎。留守賀開府。不妨司事提調。與通政院官照依官定價直。就便從宜。欽依收買堪中馬匹。責付各站走遞。毋致失悞。具收買交付訖馬數日期。用過價錢。通行呈省。所據回賜也速答兒銀一錠。於係官銀內支付。依例除破。七年四月四日參議速速以丞相帖木迭兒之言上奏。前者爲諸王駢馬乘驛聚會之故。整治東西兩道站赤。與訖物力。今諸王欲各歸鎮地。當此站赤消乏之時。經過徵求分例草料。乞各與鈔二百錠。奉旨準。二十九日參議速速奏。昨奉旨令寫進通政院兵部所管站赤緣由沿革來上。今謹進呈上覽畢。曰。世祖皇帝時。達達漢人站係通政院管領。今可依舊制。悉歸之通政院。五月十一日。中書右丞相帖木迭兒。平章政事拜住等覆奏。上曰。可依前旨。令通政院領之。九月十四日。通政院判官伯帖木兒。奉旨赴木憐站取勘貧富站戶數目。呈省區處。十月十七日。奏請接濟貧戶。上是而從之。都省委官與本院同知不顏前赴木憐三十站。給散訖。中統鈔三萬八百錠。糧五百石。十一月。通政院官李欒解等奏。奉聖旨。節該世祖皇帝時。腹裏江南漢地站赤。例從各路達魯花赤總管提調。近年令州縣管領。似此站赤受害。今可依前例。皆令

各路達魯花赤總管提調。州縣官勿得預。省部欽依遍行。照英宗皇帝至治元年十一月二十九日納憐道哈刺兀孫脫脫禾孫客滅拙解言哈刺溫至哈必兒哈不刺一十四站。初無田土可耕。自薛禪皇帝時。官給馬匹草料。站戶口糧。延祐七年八月以來。雪重草死。官無芻粟。以致馬匹瘦弱。遲悞驛傳。請接濟事。都省差通政院宣使朵兒赤赴甘肅行省河東宣尉司給散訖粟料三千五百六十四石。二年通政院言。近年諸官府遣使皆執聖旨及差劄起馬中閒泛濫無憑稽考。今後除樞密院御史臺也可札魯花赤。宣政院。徽政院外。其餘遣使給驛者合遵至大四年已降聖旨主意經由省部關會本院應副。省部準擬依上施行。三年正月一日中書右丞相拜住左丞速速等奏和林之南沙蘭禿等六處馬站。連年經值風雪。芻草不生。人馬瘠乏。合無差官取勘戶數。每戶接濟中統鈔三十錠。奉旨準都省差同知通政院事亦憐真馳驛。至沙蘭禿等站給散訖鈔六千二百錠。段匹折鈔三千一百錠。泰定元年三月一日中書右丞相旭邁傑。左丞相倒刺沙等奏帖里干木憐納憐站亦因諸王駙馬在店薛地聚會頻取物力以故消乏。臣等以爲站赤乃當時之急務。一次整治有法。站戶累歲獲安。今令通政院分別貧富等差。其有馬駕及二十羊及五十者。是爲有力。餘無此數者。官給中統鈔五十錠。補買與之。及支半年口糧。下年孳畜蕃息。可爲久計。奉旨準都省欽依委官分道馳驛前去給散訖鈔二十一萬三千三百錠。糧七萬六千一。

百四十四石八斗。木憐道三十八站。鈔八萬四千五十錠。糧一萬六千九百三十三石二斗。納憐站道二十四站。鈔四萬一千七百五十錠。糧八千九百二十石八斗。帖里干五十七站。鈔八萬七千五百錠。糧五萬二百九十石八斗。三日通政院使察乃脫兒赤顏等奏。世祖皇帝時。漢地站赤從各路達魯花赤總管提調。在後又令州縣官領之。既而站戶受害。依舊從各路正官提調。州縣不預。至治三年。英宗皇帝行幸五臺之時。左丞速速同知不顏復奏。令州縣提調站赤。今站戶告言。既隸通政院。又屬州縣官。於已誠有不便。臣與右丞相旭邁傑等共議。但凡政事並依世祖皇帝定制。已嘗詔告天下。今次站赤止合從各路達魯花赤總督提調。毋令州縣官領之。奉旨準。六月十日。詔書內一款。軍國之務。站赤爲先。除達達站戶消乏。已令接濟外。春秋車駕經行處所。使客比之他處繁多。大都上都自備首思者。每站給中統鈔二千錠。興和宣德拘該漢站各一千錠。驗戶接濟。仍仰中外諸司各務撙節。不許濫行給驛。違者。依條治罪。中書省下兵部通政院照勘到合接濟一十六站。給降中統鈔二萬九千錠。遣尙乘寺丞脫脫。通政院都事哈刺章支散訖。上都至大都昌平等一十三站。支鈔二萬六千錠。興和路三站。支鈔三千錠。二十一日。通政院使察乃等奏。春秋往來上都。各供帳內馬驅有闕。全仰站車以行。隨駕官府及各校人員。每年起發鋪車。站戶苦之。今將起離上都。回還大都。各供帳所須鋪車。欲乞矜憫住罷。令中書

省應副車輛頭匹。其餘各枝官員悉令自備物力起行。可否取裁。奉旨準。二年六月。兵部侍郎劉秉德言。諸王駢馬各投下給驛實繁。及隨朝諸官府多有未拘鋪馬聖旨。凡遇遣使假公行私徑赴通政院給驛。擬合從新分揀。諸王駢馬各投下鋪馬劄子。撙節與之。不許似前泛濫。除樞密院御史臺也可札魯花赤。宣政院詹事院外。其餘官府應有鋪馬聖旨。盡數拘收。果有公事給驛。移文省部應副。不經省部者不得給。從監察御史廉訪司糾察相應。省部準擬施行。三年二月二十三日。中書右丞相塔失帖木兒等奏。京畿道奉使宣撫言。昌平縣站戶差役頻數。自備祇應。以故物力消乏。漸致逃徙。臣等詳照往年。其地田禾不收。又爲路當衝要。驛傳倍勞。累嘗奏降鈔定津濟。今國家雖乏錢糧。亦宜賑恤。設若墮廢。愈難整治。請發鈔二千錠。委官驗貧富多寡給散之。奉旨準。又奏驛傳所以通報國家急務。近年以來。西番僧及工匠之徒。泛濫給驛。是致站赤疲弊。今後此徒凡有不切之務。乞禁止給驛。事果急速。三分車馬之數。應副一分以行。仍準當該官司公文起遣。似爲允當。奉旨準。四年五月十五日。通政院使脫亦納失龍灰等奏。上都周遭草地。及各站牧馬地內。舊例馬牛外來者。執之以供驛傳三日。後回付畜主。羊口入禁。沒爲館食。今議若畜主不出識認者。合無作不蘭奚數收係之。奉旨準。是年兩浙江東道奉使宣撫言。站赤消乏。兵部議得。各處水馬站亦消乏。例合有保勘不干礙五品官體覆。監察御史廉訪司體察。依例

僉補。然行移之閒。爲無所立程限。往復淹延。民受其害。今擬從申舉日爲始。至監察御史廉訪司體察畢。定期一歲完備。違限者。從監察御史廉訪司糾察。省準遍行。明宗天曆元年九月。通政院言。方今海宇混一。庶務浩繁。百色所需。全藉鋪馬辦集。近因迤北軍馬。將薊州夏店。昌平良鄉。涿州通縣。并北口榆林。洪贊。雷家等站閭散。焚劫畜產。房舍殆盡。今茲平定。諸王駢馬。各枝朝賀使客頻數。供給日繁。若不拯濟。恐致失悞。請以各路刷到馬疋。量給各驛走遞事。都省準擬。二十站總撥馬八百四十七疋。大都驛馬四百一十七疋。良鄉馬五十四疋。涿州馬五十四疋。昌平馬五十四疋。榆林馬五十疋。洪贊馬五十疋。夏店馬五十四疋。通州馬三十四疋。十月二十四日。太保左丞相別不花。郎中牙忽等。特奉聖旨。河南江西湖廣三省。打捕天鵝。乘驛進送。頻併站亦甚苦。今後斟酌。進一兩次。其餘加意鹽淹訖。以驛舟進來。令都省移文諭之。欽此。是月。兵部奉中書省劄付。行省腹裏。凡起運金銀鈔錠匹帛諸物。俱有定立程限。近來往往違期不到。以致河水結凍。舟楫不通。卻督拘該有司差倩民車。和雇腳力搬運。不唯破費官錢。重勞民力。其閒弊病多端。蓋因各處官司。不爲用心擇人押運。或至站所。不卽給船。停滯遷延。於事未便。都省議得起運物色。各處提調正官首領官。須要照依元定期。已裏差能幹人押運到都。如依前違限。定將押運官。庫官。庫子等痛斷。及取當該首領官更招伏究治。拘該站所。運物至彼。割時。

給船。若遷調怠慢。刁蹬停滯者。亦行斷罪。仰依上施行。十一月十日。右丞相燕帖木兒。平章政事欽察
解。通政院使寒食等奏。昌平。榆林。洪贊。鵬窩。赤城。龍門。獨石。失八兒。禿昔寶。赤李陵臺。桓州。灣陽。雷家。宣
德。西驛。白草灘。若鹽泊。小寨兒。乞兒。撒禿哈兒。懸赤忙吉兒。禿夏店。薊州。遵化等二十三站。經值兵戈消
乏。使臣頻數。站戶甚苦。乞賜矜憫。每站各與鈔五百錠。奉旨準都省欽依委官。同通政院使幹綽。同知通
政院事香山。欽依給散訖。二年三月九日。中書省奏。木憐帖里干。站赤消乏。臣等議。消乏甚者。與鈔一
千錠。次者與五百錠。賑濟之。奉旨準。數內帖里干。木憐兩道。消乏之甚者。亦乞烈等一十六站。每站各與
一千錠。其忽蘭赤斤七站。各與五百錠。都省委官。同通政院副使出判官禿帖木兒。馳驛前去散訖。
四月十四日。左丞相帖木兒不花。亦都護。右丞徹里帖木兒。參知政事王結等奏。通政院言。納憐四十七
站。消乏。每站擬乞與鈔五百錠。臣等議。得消乏甚者。各與鈔五百錠。餘站四百三百錠與之。奉旨準。都省
差官。與通政院都事哈散同詣二十四站。給散訖鈔一萬一千三百錠。哈必兒哈不刺。一十八站。每站五
百錠。計九千錠。潭禿等五站。每站四百錠。計二千錠。兀迷禿一站。三百錠。十五日。中書省判送兵部。據
大都申。大都至上都。一千里路。起運伯亦斡耳朶顏料。并竹地席。和雇車輛腳價斤重。依例支付。覆實司
提舉楊奉訓。體度得大一統志內。大都至上都。止是八百里路。合依典故改正。本部議。大都至上都里路。

跋涉山嶺。險阻崎嶇。車程搬運。難同垣途。若依典故。一概定論。似涉偏執。況兼此例。循行已久。合依大都路已擬相應。二十七日。中書省准甘肅省咨。鎮南管卜岐王位下火兒忽禿紅城兒兩站。與荆王位下蒙古七站。一路接連。見准都省咨文。接濟馬料。本投下二站。若蒙依例應副。似不偏負送兵部擬。合比依前例。官爲應副。冬季三箇月料票相應。都省準擬。至天曆三年正月。兵部別卷內。照得天曆二年六月二十一日。甘肅省言。先爲荆王也。速不干位下蒙古七站。求接濟量擬支撥冬季三箇月料栗。六千三百石。爲無見在。泰定四年折支價錢。致和元年。又行呈索依例支付。今照得元奉都省咨文。止是量擬撥泰定四年冬季三箇月料栗。即非常例。本位下自有設置倉敖。歲收稅石甚多。況荆王位下槩管軍民最爲富庶。若以常例。官爲支付馬料。實是費耗官錢。本部議上項七站。旣甘肅行省言料栗。自世祖皇帝以來。不曾應副。本位下多有錢糧。軍民富庶。如遇天災流行。站赤生受。合依行省所擬。從本投下自行接濟相應。都省準擬。今照得鎮南管卜岐王位下火兒忽禿紅城兒兩站。告求接濟。已蒙都省準擬。移咨甘肅行省放支三箇月料栗。其本位下與荆王位下站赤。卽係一體。旣荆王位下蒙古七站。已經呈準。例從本投下自行接濟。其岐王位下兩站。元準接濟三箇月料栗。擬合止當相應。宜從都省移咨甘肅行省依例施行。是月兵部奉中書省劄付。中書右丞徹里帖木兒郎中也孫脫奏。鷹房總管府。言各路打捕戶處貢天

鵝鸞鵠準備進赴上都。及影堂祭供。兵部自正月不給驛馬。今乞自用總管府鋪馬聖旨。差人各路依先例起解。奉聖旨準。欽此。都省仰欽依施行。六月二十六日。中書右丞闢兒吉思等奏。陝西省言。奉元路在城并臨潼同官等二十三站。四年蝗旱。田禾不收。人自相食。若不接濟。卽見廢絕。每站乞與鈔四百錠。以賑之。奉旨若曰。百姓消乏至此。微惠何能得濟。聞來使之言。謂站戶饑荒。大半逃亡。於已擬各站四百錠鈔之上。議增給之。仍啓于皇太子。就彼差人前去接濟。然後奏聞。既而中書復奏。每站增給鈔總爲五百錠。上從之。都省委官同通政院僉院雙台。馳驛至奉元等站。給散訖。中統鈔一萬一千五百錠。八月十三日。右丞相燕帖木兒。平章政事欽察解。參知政事阿榮趙世安等。特奉聖旨。站赤消乏。省中可與物力整治。聞濫騎鋪馬者多。若不仔細提調。將愈致消乏。今省官內令阿榮。趙世安。兩人提調。除中書省樞密院。御史臺。其餘大小衙門。不以是何公事。差人乘驛者。令通政院稟過提調官。必合馳驛之事。仔細分揀。過省中附簿斟酌與之。不合馳驛者勿給。通政院每月發馬多少。明白開寫關部呈省。可遍行文書諭人等。無宣政院文字。自索驛馬者多。今乞有宣政院印信文字。合與者。仔細分揀與之。奉旨準。欽此。關兵部轉呈都省施行。是日宣政院使禿堅帖木兒脫因公哥簇吉林伯顏也不干相哥失里。同知宣政院

事左吉等奏。諸王駙馬及各衙門無宣政院文書。於通政院泛濫給驛。差人赴西番者多。以此沿途站赤甚是消乏。今乞無宣政院文書者。不令應副鋪馬。奉聖旨是矣。拘該衙門可行與文書。又奏西番三路宣慰司等官。推稱起解講主。呪師大醫答魯赤。亦爲私己之事。來者多有。若聽其如此。站赤辛苦。若用此輩人。朝廷往取之。今後無聖旨。無宣政院明白文書者。乞不許來上。仍令臨洮府寧河脫脫禾孫。加意提調。如此乘驛來者。勿給驛馬。計稟宣慰司官奏來。奉聖旨從之。三年正月十七日。通政院使寒食言。至元七年。設立諸站都統領使司。十三年改陞通政院。管領蒙古漢人水陸站赤。至大四年。以漢站隸兵部。本院止領蒙古站赤。延祐七年。又併董之。大德至大年閒。爲各處站赤消乏。差官僉補。不失元額。又屢奉聖旨整治撙節。迄今六十餘年。未嘗廢弛。去歲兵興。通政院首先準備補馬。欽迎皇帝於江陵。使臣接踵馳驛至都。嗣登大寶。干戈未息。東至千民鎮。蘆兒嶺。北至虎北口。居庸關。西至白羊峪。紫荆關等處隘口。軍兵守把。應用軍器糗糧等物。並給站車輓運。計用四千餘輛。以軍情起馬一萬七千餘匹。起洪贊。榆林。雷家三站。於昌平立黃花鎮。石槽站。摘馬走遞。大都驛馬紛奪不敷。稟奉都堂鈞旨。摘撥良鄉涿州。新城。雄州。河閒站。赤鋪馬赴都協濟。本院官吏晝夜供給。未嘗頃刻輒離。亦無分毫失悞。平定之後。站民之家。室廬焚蕩。人馬喪亡。無聊甚矣。幸承恩命。賑濟以寧。略舉大都。通州。薊州。夏店。遵化。昌平。榆林。洪贊。雷家。

良鄉涿州易州深水馬步等站。并北口蒙古站赤接濟訖。中統鈔一十五萬七千四百六十五錠。糧四千六百四十六石八斗。馬一千二百六十四駒五百隻。又護都忽皇帝還自朔漠。豫王太平王答刺罕。太師右丞相送寶。本院官吏前去迤北蒙古站赤排辦鋪馬。及差官赴陝西奉元路等二十三站賑餉。每站給散中統鈔五百錠。計一萬一千五百錠。奏乞知之。二月二日。兵部奉中書省劄付。刑部呈奉省判江浙省咨。宣使阿散起運福建運司鹽課銀赴中書省交納。天曆二年正月二十一日辰時至保定路雄州驛。令人等俱不在站。久之李驛令張提領等帶酒引百戶等二十餘人來至。不肯照前站關文應副駄銀馬匹。牽馬人夫。但索差劄聖旨辦驗。意恐催督。恣行罵詈。拽阿散至州衙。知州首領官亦不助力成就。耽誤至申時。仍前不肯應副。就令牽馬人騎駄銀馬起運。至二十三日到富寧庫寄收。阿散已於天曆二年正月二十七日具呈中書省。省發下通政院取問外。本省歲辦一應錢糧軍器段匹。并計置橫造進呈諸物。俱有定立程限。每年不下五六十運。實爲繁重。全以宣使押運赴都設置站赤專一遞運官物。雄州站官不以官物爲重。放肆兇暴凌辱使人。有司不肯助力成就。若不嚴加懲諫。遍行各處禁約。慮恐已後倣此。看同泛常。阻滯未便。都省送刑部議。上項事理係在天曆二年八月十五日已前。擬合欽依詔赦革撥。宜令通政院遍行禁治。站官人等今後敢有違犯。痛行斷罪相應。都省準呈。是月兵部奉中書省劄付。

御史臺呈。江南行臺監察御史言。朝廷設立驛站。陸則乘馬。水則備舟。點僉籍民俾充站戶。具船馬備什物。恐致廢弛。今有司親臨提調。廉訪司常加點視。此誠良法也。近年以來。各處官司雖有所孳生鈔本數少不能充用。又差人出使合減省而不減省者有之。不當給驛而濫給者有之。差出之人搔擾站赤。毆打官吏。需索錢物。有司提調之官。視為泛常。廉訪司出巡之際。置于度外。是致站戶靠損。馬弱船漏。什物廢壞。卑職近因公差赴都。竊見河閒。保定。南北站赤。多有廢弛去處。馬盡瘦損。不堪走遞。詢其所由。蓋因兩淮起解鹽本鈔本一運不下四十五匹。驅馳甚重。如一站馬匹不敷。則轉遞前站。是致靠損。況今使臣往來頻併。若不整治。恐遇軍情急事。遲悞。關繫非輕。行臺看詳諸處站赤。消乏積非一日。況河閒。保定。東西會于涿州。直至京師。至爲辛苦。泛濫給驛。雖有禁條。然法行自貴近始。當此之際。尤宜撙節。今後在都應有給驛。除軍情重事外。如有宣喚官員。非朝廷知識急用人才。必合乘驛者。從中書省聞奏減省。庶使站赤稍甦。事關緊切。不致少悞。餘準監察御史所言相應。御史臺具呈照詳。本部移準通政院關立站之由。本以宣布致令。通報軍情急事。近年以來。各衙門不體事之緩急。泛濫給驛。及兩淮起運鹽課鈔錠。靠損馬匹。今後除軍情重事必合乘驛外。其餘緩慢細事。不許泛濫給驛。兩淮等處起運鹽課。舟楫既通。合依舊例用船遞運相應。準此。會驗到大元通制內一款。大德八年七月。中書省照得各處行省。不依都省元

行。往往泛給鋪馬。雲南四川尤甚。中閒多有任滿得代無祿之人。或因起納諸物。或指計稟公事爲名。馳驛赴都。因而求仕。直至得除。騎驛回還。不唯虛費官司分例。實恐迤漸消乏。站赤深爲不便。都省議今後任滿得代無祿之人。不許差使赴都。如違定將當該首領官究治。移咨各處。及劄付御史臺體察。又一款。至大四年二月。兵部契勘內外諸司。設立宣使奏差。蓋爲幹辦公事。其各處行省宣慰司等衙門。比年不行差遣。故委州縣正官。并得代不應差使營幹己私之人。或以軍情爲重。或以錢糧爲大。或以貢物爲急。驗其品職。多起鋪馬。道途之閒。源源不絕。站赤消乏。蓋因於此。若不整治。深爲未便。擬合遍行各處。今後凡遇押運官物。計稟勾當。應合給驛之事。須遣宣使奏差人員。量立程限。仍取甘罪文狀。在都諸衙門。如遇各處起納官物。計稟公事之人。依期發遣。事無壅滯。省減鋪馬。都省准呈。今奉前因。本部議擬到逐項事理。具呈照詳。本省議得近年以來。各處饑荒。站赤生受。蓋因拘該官司。泛濫給驛。使客繁多。中閒假公營私。往來沿途住滯。及不詳事體緩急。一概走驟。倒死鋪馬。若不定立程限。從宜撙節。深爲未便。今定擬到使臣日行馬程里路。禁治事理。仰遍行依上施行。三月九日。中書兵部準通政院關。天曆二年八月十九日。欽奉詔書。內一款節該站赤消乏。比及僉補以來。其令中書省撙節冗濫名件。除中書省樞密院。御史臺。及一切軍情緊急重事外。諸衙門應給鋪馬。必須經由省部通政院。毋得濫行給驛。欽此。本院乃

京師輦轂之下。四方會同之所。置郵傳命。飛報軍情。邊關緊急。不爲不重。除中書省。樞密院。御史臺。及一切軍情緊急重事。欽此給驛外。其餘諸王公主駙馬。行省路府州縣。并各處納物回還者。往往赴院倒給站車船隻驛馬。別無所守通例。未審合無應副。宜令合干部分定擬明白。遵守相應。本部議得。在都諸司應給鋪馬。除中書省。樞密院。御史臺外。其餘衙門。并諸王公主駙馬。欽依詔書。並須經由本部斟酌所辦事務。擇節定擬合騎馬數。移關通政院應付外。據行省路府州縣各處稟事納物回程。合給鋪馬站車船隻。如元來差劄前站關文。及納獲朱鈔。并差委公事。回文明白。於例別無冒濫爭差不應者。從通政院照勘。就便給付相應。呈省準擬。十四日太師太平王答刺罕。右丞相燕帖木兒。對通政院官傳聖旨。近者奏詔書。除中書省。樞密院。御史臺外。其餘諸衙門差人。無省部文書。勿給驛。今若候省部文書。公事必至遲悞。奉聖旨。今後其餘諸衙門。不必經由省部。徑直移文通政院給驛。本院子細分揀斟酌與之。欽此。本院關兵部欽依轉呈都省照詳。連送本部就行欽依施行。是月中書省準江浙省咨。監察御史言。江浙江西湖廣三省水陸站。亦供給繁重。祇應錢物不敷。以站戶餘糧內。差充庫子貼備祇待。似爲靠損。合照依舊例。於巡慰司見役司吏內差充。二歲陞州吏。一歲陞縣吏。本省看詳各處庫子。元擬餘糧站戶內輪日應當。尙且失悞。今改巡尉小吏管辦。關領官錢。中閒不無侵漁。委是不便。如依舊例相應。送兵部議得。

江浙行省水馬驛祇待庫子。既與腹裏事例不同。合準本省所擬餘糧站戶內差撥。上下半年交替就準。本戶里正主首身役相應。呈省準擬。又太師右丞相燕帖木兒。平章政事欽察解阿禮海牙。趙世延。右丞撒迪。參知政事和尙蔡文淵。參議中書省事忽都海牙等奏。兵部言。以站赤消乏之故。不應給驛者。省官分揀。見於皇帝登寶位之詔。在前賜田收穀。身故送喪之人。不會給驛。令各衙門官員爲營私事。不肯遵守法度。搬取家屬。收拾子粒。遷葬娶妻。送靈嫁女。泛濫給驛。以致站赤消乏。臣等謂站赤本爲轉達國家政令。通報邊境軍情而設。今後似此。但凡私事。奏乞驛馬着禁革。一切不應給驛者。依詔書體例分揀爲宜。奉聖旨。卿言是矣。可移文各處。勿令泛濫給驛。欽此。都省遍行照會。

中華民國二十五年四月重印

(實價國幣壹元貳角)